

Leukah' mun' ren'kawn tem' Lu'ka

Leukah' la ri tem' ri tuil' ri Htaw' hpi' lu eun

¹ Htaw' hpi' lu, peue heun' peue na' ce seun' pen' yeuh cang yeuh ce a, ce tem' lawng ku' kue' ku' meuh hk'a' naee e' na' ce hawc'. ² Ce tem' a seun' peue guil leukah' mun' ren'kawn na' lah' ce e' mhawng' lawng ku' pun ce ri nyu a tang' neum yamla ka ri na' hawc'. ³ Kopti saec' ui' ri, ui' ku sawn' ri nawk caet ri nawk ku' kue' ku' meuh tang' neum yamla ka ri na' ce hawc'. Punta kaw a kue' mun' pun mi, ui' kaw htuk' ri lah' a meuh htan ri ri mi. ⁴ Tem' ui' a yeuhki' na' ko', meuh a punta kaw mi yawng lawng ku' lah' peue ri mi aen' cawp' nyawk' ka meulamlam ri na'.

Yo' han cawo' tuil' hk'a' cum' kaw eun keut'

⁵ Yam hkun' haw' hkam' Herot' u' peung eun kuing' Yu' da na', a kue' peue jhawp' rit ti peue. Eun muis Yahkari'. Eun ut' hk'a' naee muk eun peue jhawp' rit muis Abi' ya na'. Beun' eun na' eun meuh ceucat Aron. Eun muis E' li' sabae'. ⁶ Ka meuh peue leupaws seumeu' nanggal' Eun Peucawo' gawm' lal' peue ri. Ka hot' leukah' ritroe Eun Peucawo' na' gawm' euc' ka. Ka yeuh a un' laee kue' vang cut vang yawm'. ⁷ Daecti ka un' kue' kon', kopti E' li' sabae' meuh eun peue tan' na'. Ka ku kawt gawm' lal' peue ri hawc'.

⁸ A rot yam muk Yahkari' na' yeuh ce kan' na', eun yeuh kan' ka peue jhawp' rit ri nanggal' Eun Peucawo' na', ⁹ seun' peue jhawp' rit na' kue' ce rit ka, ce pawk' muis puri. A caw Yahkari' eun. Eun ing' lec ri dum ku' tu' hom' nang nya hk'o' mun' keuting Eun Peucawo' na'. ¹⁰ Yam buih dum eun ri tan ku' tu' hom' na', peue heun' na' ce hk'o' mun' hk'a' nok.

¹¹ Yam awn' na, in'hpom Eun Peucawo' eun pucti lih cawng hk'a' a'tawm' ka vang dum ri tan ku' tu' hom' na'. ¹² Yam Yahkari' pun eun ri nyu eun na', eun tok'seupa lhat'. ¹³ Daecti in'hpom na' eun lah' a ri heun, "Yahkari', pawlaee lhat'. Peucawo' mhawng' eun seng' hk'o' mun' mi na' hawc'. Beun' mi E'li'sabae' kaw eun kue' kon' me pun mi ti peue. Mi kaw pun ri ghuk' kon' me awn' eun muis Yo'han. ¹⁴ Kaw mi pun ku' ren'kawn heun' nyawk'. Kopti kon' nyom awn' keut' eun na', peue heun' ce kaw pun hk'a' ren'kawn. ¹⁵ Kopti kaw eun meuh peue lung' peue keuting nanggal' Eun Peucawo' na', eun hkuin' kaw kah ri nyui leuum' pli' bui mae' ku' cang yuic' na'. Tang' neum ing' tang' eun bat'ti'san'hti ri na', eun kaw pun Cit' seung' chak' na' htonnuk.

¹⁶ Eun kaw va peue I'sarela' na' ce tang hpawt' ri ing' ri Cawo' Peucawo' ri na' Eun heun'heun'. ¹⁷ Hk'a'naee vang cu eun cit' mae' ti'ca seun' E'li'ya eun na', eun kaw meuh cawo' heul' nanggal' Eun Peucawo'. Punta kaw eun mhe' rangraen ri uin' ce meuh peue ceu pun Cawo' Eun na', eun kaw mhe' kuiing' kon' na' ka htuk'lung puri bae, mae' peue lheu' leukah' na' kaw ce pun cu'yi ce peue leupaws seumeu' na'."*

¹⁸ Yam awn' na, Yahkari' eun lah' a ri in'hpom na' eun, "Ui' ci' kaw cang yawng a yeuh sa'nhaw'? Kopti kawt ui' hawc'. Saec' beun' ui' na' eun ku a'yu cae' hawc'."

¹⁹ In'hpom na' eun tang top' a, "Meuh ui' Gabela', ui' cawng nanggal' Eun Peucawo'. Eun plo'e' ui' lih tuil' leukah' ren'kawn aen' na ri mi. ²⁰ Ku' lah' ui' na' a lawn rot yam ri ko', a kaw htonnuk. Kopti un' yum' mi a na', lawng aen' na rot ti seunyi na' a keut' kue', mi kaw dak' kawl', un' cang leukah'."

* 1:17 1:17 Malahki' 4:5-6

²¹ Kopti Yahkari' ut' eun nang nya hk'o' mun' keuting na' ling' na', peue ko' eun na' ce kvang'mawo. ²² Na' eun pucti lih, eun un' laee cang leukah' mae' ce. Ce yawng kue' eun ku' nyu nang nya hk'o' mun' keuting na' ti ri ceu. Eun un' laee cang leukah'. Eun kvae' ce nawk ti' ri.

²³ Yam seunyi yam yeuh eun kan' na' hawc' ka na', eun tang ing' ti nya. ²⁴ Hawc' awn' na, beun' eun Eli'sabae' na' eun nyhel'. Eun lhit' ri ti nya rot hpawn' chi'. ²⁵ Eun lah', "Peucawo' yeuh Eun pun ui' yeuhki' hawc'. Seunyi maet'maen' aen' na, tuil' Eun ui' nyu hk'a' leumeus'keus ri na' hawc'. Eun ti ri tec ku' cae'mae' peue ui' na'."

Yesu' kaw Eun keut'

²⁶ Yam rot a les chi' na', Peucawo' Eun cus' in'hpom muis Gabela' na' eun lih nang kuing' Galilae' veng Nasaraet' na' ²⁷ ri beun' plot'lon muis Mari' na' eun. Eun yeuh kati ri kaw ti Yo'saep ku' meuh ceucat hkun'haw'hkam' Davit' na' eun hawc'. ²⁸ Yam in'hpom na' rot eun ri heun na', Eun lah', "Beun' hit' hpum' Peucawo' na' mi, mun' keuting reu'. Cawo' Peucawo' ut' Eun mae' mi."

²⁹ Kopti meuh a leukah' eun in'hpom awn' na, Mari' eun kangkae nyawk'. Eun kuit ri mhawng' a nang hpum' ri, "Leukah' nap aen' a ci' sum' lah' keunhaw'?" ³⁰ In'hpom na' eun tang lah' a ri heun, "Mari', pawlaee lhat'. Kopti hit' mi hpum' Eun Peucawo' na', ³¹ kaw mi nyhel', mi kaw keut' kon' me. Mi kaw kah ri ghuk' Eun muis Yesu'. ³² Kon' me awn' kaw Eun meuh Peue keuting. Peue kaw klawng Eun meuh Kon' me Eun Peucawo' lhung' hk'ai' ku ceu gawm'euc'. Cawo' Peucawo' Eun kaw tuil' tenceo' mok' kuiing' eun Davit' na' ri kon' me awn' Eun. ³³ Eun kaw u'peung ceucat eun Yakop' na' ce cot'cu ri. Kuing' eun na' a kaw un' laee kue' vang sut'."

³⁴ Mari' eun mhaing' in'hpom na' eun, "Kopti kaw'n plot'lon uí, lawng aen' a cí' kaw cang meuh yeuh sa'n-haw'?"

³⁵ In'hpom na' eun tang top' a ri heun, "Cit' seunga' chak' Eun Peucawo' na' kaw a lih hk'a'pang mi. Tí'ca Eun Cawo' lhung' hk'ai' peue na' a kaw kuipkang' mi. Kop awn' na, kon' me seunga' chak' kaw keut' awn' Eun, peue kaw klawng Eun meuh Kon' ai' Eun Peucawo'. ³⁶ Saec' meuh ec'awng' mi E'li'sabae' eun, meuh eun peue tan', eun ku kawt. Daecti eun nyhel' a pun les chí' hawc'. ³⁷ Kopti ku' Peucawo' un' cang yeuh Eun na' a un' kue' saec' ti ceu."

³⁸ Mari' eun tang lah', "Meuh uí' mhai' Eun Peucawo'. Seun' ku' lah' mi na', kah a meuh hk'a'naee uí' reu'." Hawc' ko', in'hpom na' eun pucti heul'.

Mari' heul' glue eun ri E'li'sabae' eun

³⁹ Yam awn' na, Mari' eun kuh' heul' vaeveae ri veng nang gong nang bue' kue' nang kuing' Yu'dah na'. ⁴⁰ Eun lec nang nya eun Yahkari' na'. Eun lah' leukah' hk'eup' puri na' ri E'li'sabae' eun. ⁴¹ Yam E'li'sabae' pun eun ri mhawng' leukah' lah' eun Mari' na', kon' nyom ut' nang keuteul eun na' eun keulawn' jhuis'jhas' ri. Cit' seunga' chak' na' a htonnuk hk'a'naee eun E'li'sabae' na'. ⁴² Eun klawng ri lah' seng' laws', "Pun mi mun' heun' hk'ai' beun' seubu na' ce. Saec' meuh kon' kaw mi keut' na' Eun ku pun mun' heun' yeut. ⁴³ A cí' meuh kop keunhaw', uí' saec' pun mun'? Kopti ma Eun Cawo' uí' na' ing' eun ri uí' na'. ⁴⁴ Yam mhawng' uí' leukah' lah' mi ri uí' na', kon' nyom ut' nang keuteul uí' na' eun keulawn' ren'kawn jhuis'jhas' ri. ⁴⁵ Beun' yum' leukah' lah' Eun Cawo' a kaw htonnuk ri ti na' mi, pun mi mun'."

Leukah' cai suk'seun' Mari'

⁴⁶ Mari' eun lah',
"Hpum' uí' na' suk'seun' a Peucawo' Eun.

- 47 Uí ku ren'kawn nyawk' hk'a'naee Cawo' htut uí Peuca-
wo' Eun,
- 48 kopti keue' nyu Eun ri mhai' tem nyawk' ri na' Eun hawc'
na'.
- Tang' neum maet'maen' na',
peue ti cu hawc' ti cu ce kaw lah' uí meuh beun' mun'
keuting.
- 49 Kopti Cawo' tí'ca keuting yeuh Eun ku' keuting pun
uí hawc'.
- Muis Eun na' a seunga' chak'.
- 50 Hk'a' tukyak Eun na' a kaw kue' hk'a'pang ce peue
hkopyawm' ri Heun na' ce
ti cu hawc' ti cu.
- 51 Yeuh Eun ku' tí'ca keuting na' ri tí' ri hawc'.
- Eun yeuh peue hpum' lhung' hpum' keuting
hk'a'naee kamkuit ri na' ce taic'jah hk'ai' puri
hawc'.
- 52 Eun ruic' cawo' na' ce hk'uic' hk'ai' ten ri,
daecti Eun yuk peue tem na' ce lhung'.
- 53 Eun tuil' peue ngeup' ri na' ce hk'a ku' hk'a chak' na',
daecti Eun kah peue meuneum na' ce heul' jawngkui'
tu' seurak' ri.
- 54 Eun teum'kawm mhai' ri peue I'sarela' na' ce.
Eun keutuí' hpum' hk'a' tukyak Eun
- 55 ri Abraham eun mae' kon'hk'i eun na' ce cot'cu ri
seun' ku' lah' Eun ri a'ta' a'ya e' na' ce na'."
- 56 Hawc' Mari' ut' eun mae' E'li'sabae' eun hk'ao loe'
chi' na', eun keutah ing' ti nya ri.

Yo'han cawo' tuil' hk'a' cum' keut' eun

- 57 A rot yam E'li'sabae' kue' eun kon' na', eun kue' kon'
me. 58 Yam ec'awng' caonaó ka na' mhawng' ce lawng
Cawo' yeuh Eun hk'a' tukyak ri ka na', ce ku ren'kawn
mae' ka yeut.

⁵⁹ Yam rot a seudi' seunyi na', ce ing' tuil' kon' nyom na' eun ton' duing' hak' ri. Yam kaw ce ghuk' eun muis Yahkari' seun' kuiing' ri eun na', ⁶⁰ ma eun ka lah', "Uih', htuk' ri ghuk' eun muis Yo'han."

⁶¹ Ce lah' a ri ka, "Ec'awng' pa' na' ce hkuin' muis yeuhko' saec' ti peue."

⁶² Kop awn' na, ce kvaeé' tí ri mhaing' kuiing' eun na' eun, "Mi cí sum' ghuk' kon' nyom na' eun muis keunhaw'?" ⁶³ Eun mhaing' vang kaw tem' tu' ri ce. Eun tem' a, "Kaw eun muis Yo'han." Yam nyu ce a na', ce am' gam'euc' ri. ⁶⁴ Yam awn' na, Yahkari' eun keulawn' cang leukah'. Eun lah' leukah' suk'seun' Peucawo' Eun. ⁶⁵ Peue ut' keunam mawn' na' ce lhat'. Lawng aen' a seutuín seutan eo' nang gong nang bue' ka kuing' Yu'da na' ku duih' ka. ⁶⁶ Peue pun ri mhawng' a na' ce kuit a nang hpum' ri ku peue ri, "Hk'a' nha' eun kon' nyom aen' na, eun cí na' kaw meuh peue yeuh sa'nhaw'?" Kopti tí'ca Eun Peucawo' na' kue' a maeé' heun.

Leukah' suk'seun' Yahkari'

⁶⁷ Cit' seunga' chak' na' htonnuk a ri Yahkari' ku' meuh kuiing' eun Yo'han na' eun. Eun lah' leukah' lih neum Peucawo' Eun,

⁶⁸ "Suk'seun' Peucawo' ce peue Ísarela' na' Eun reu',
kopti ing' teum'kawm htut Eun peue ceu ri na' ce
lawtpon hawc'.

⁶⁹ Tuil' Eun Cawo' teum'kawm htut tí'ca keuting pun e'
keut' kue'
hk'a'naee nya eun mhai' Mi Davit' na' hawc'.

⁷⁰ (A seun' ku' lah' Eun Peucawo' ri peue suip leukah'
seunga' chak' Eun tang' neum leumah' na' ce.)

⁷¹ Eun teum'kawm htut e' hk'ai' dak tí' ce ransu e' na'
maeé' ku' nyu ce e' pereng ri na' ce.

- ⁷² A meuh yeuh Eun hk'a' tukyak Eun ri a'ta' a'ya e' na' ce
pucti lih glih'gleueng',
maee' kuit rot ri kati seunga' chak' Eun Peucawo' na'.
- ⁷³ Kati sat'ca' awn' na ko', a meuh ku' tang' Eun ri uin' ri
a'ta' e' Abraham eun na'.
- ⁷⁴ Punta kaw e' yeuh kan' Eun na', e' na' un' lhat'.
Eun teum'kawm htut e' hk'ai' dak ti' ce ransu e' na'
ce.
- ⁷⁵ Rot ti a'yu e' sut' ka na', e' kaw meuh peue leupaws
seumeu' seunga' chak' nanggal' Eun Peucawo'.
- ⁷⁶ Kon' ui', kaw peue klawng mi meuh peue suip leukah'
Eun Cawo' lhung' hk'ai' peue na'.
Kopti kaw mi heul' nanggal' Eun Peucawo', mi kaw
bai mhe' hk'a' Eun.
- ⁷⁷ Punta peue ceu Eun na' kaw ce yawng lawng kopti ploé'
Eun map' ce na',
ce kawn' tawl' pun hk'a' htut lawtpon na'.
- ⁷⁸ Kopti meuh a hk'a' tukyak onawn' Eun Peucawo' e' na',
ku' ceng' kuing' pang maó' na' a kaw lih ceng'
hk'a' pang e'.
- ⁷⁹ A kaw til' ku' ceng' ri peue ut' nang duim'lawng,
maee' peue ut' hk'a'ruim rum ka a'lawng hk'a' yeum
na' ce.
A kaw teuk' va e' heul' hk'a' vang kuit nyawk' kuit sam'ran
na'."
- ⁸⁰ Kon' nyom na' eun gawm ut' gawm keuting. Civit
eun na' a ku gawm ut' gawm kue' kaw'l'reng. Rot ti seunyi
puc eun ri nanggal' ce peue I'sarela' na', eun ut' vang
hk'oh'hk'oeng' na' palkoe.

2

¹ Hk'a'naee meuyam awn' na, cawo' keuting Kae'sa Aw'-gas'tas' eun tuil' leukah' ri vang peue Ro'ma na' u'peung ce gawm'euc' ka na', ce kah ri ti muis ca'lang' ri. ² Ti muis ca'lang' pok aen' na ko', a meuh pok nanggal' yam cawo' Ku'rini' meuh eun cawo' nang kuing' Su'ri' na'. ³ Kop awn' na, peue gawm'euc' ce sawng'sawng' heul' seue' muis ri nang veng a'nhaw' veng nang awn'.

⁴ Saec' meuh Yo'saep eun kopti meuh eun ceucat eun Davit' na', eun pucti neum kuing' Galilae' veng Nasaraet'. Eun huk' nang kuing' Yu'da veng eun Davit' muis veng Baelaehaem na'. ⁵ Ku' yeuh eun kati ri kaw ti Mari' eun na' ka va puri heul' seue' muis ri tiduih'. Mari' eun buih nyhel'. ⁶ Na' ka ut' nang veng Baelaehaem na', a rot yam Mari' kue' eun kon'. ⁷ Eun la ri kue' Kon' ai'. Ka bawl' Eun ri om', hawc' ka uin' Eun it' nang dong' som' ka a'moe na'. Kopti nya it' chec' na' un' laee kue' a vang ut' pun ka na'.

In'hpom na' lih ce ri peue go' kon'yung' na' ce

⁸ Keunam vang un' de un' seungai ka veng na', peue go' kon'yung' na' ce ko' muk kon'yung' ri na' nang mal' peunpul. ⁹ Yam awn' na, in'hpom Eun Cawo' Peucawo' eun pucti lih keunam ce na'. Ku' ceng' munhpung' Eun Cawo' na' a ceng' til' rop ce. Ce lhat' nyawk'. ¹⁰ In'hpom na' eun lah' a ri ce, "Pawlaee lhat'. Lih lah' ui' leukah' ren'kawn keuting ri pe'. A meuh ku' ren'kawn keuting pun peue gawm'euc'. ¹¹ Seunyaen', Cawo' teum'kawm htut pe' lawtpon na' keut' Eun pun pe' nang veng eun Davit' na' hawc'. Meuh Eun Cawo' Hkrit. ¹² A kaw kue' het' pun pe' yeuhki', pe' kaw pun ri nyu kon'nyom na' bawl' Eun ri om'. Eun it' nang dong' som' ka a'moe na'."

¹³ In'hpom muk heun' na' ce keulawn' pucti mae' in'hpom awn' eun. Ce suk'seun' Peucawo' Eun. Ce lah' a,
¹⁴ "Kah Peucawo' ut' lhung' hk'ai' peue na' Eun kue' munhpung' reu'.

Saec' pang bhen' keute' na', kah peue htuk' hpum' Eun na' ce kue' hk'a' kuit nyawk' kuit sam'ran cumyen' reu'."

¹⁵ Hawc' in'hpom na' huk' ce kuing' pang mao' na', peue go' kon'yung' na' ce lah' a ri puri, "E' lak' heul' nom'nawk lawng ku' meuh ku' Peucawo' lah' Eun ri e' na' nang veng Baelaehaem na' pawh."

¹⁶ Hawc' ko', ce heul' vaevae. Ce heul' nyu Mari', Yo'saep ka mae' kon' nyom na' it' eun nang dong' som' ka a'moe na'. ¹⁷ Na' ce nyu Eun hawc', ce tang lah' ris peue ku peue ce mhawng' lawng Eun na' seun' ku' in'hpom na' lah' ce na'. ¹⁸ Peue pun ri mhawng' ku' lah' ce peue go' kon'yung' na' ce am' gawm'euc' ri. ¹⁹ Mari' ka pawn lawng aen' ce gawm'euc'. Ka kuit ti mhawng' a nang hpum' ri meulamlam ri. ²⁰ Peue go' kon'yung' na' ce tang ing' suk'seun' Peucawo' Eun, kopti ku' pun ce ri mhawng' pun ce ri nyu na' ce gawm'euc' ka, meuh a seun' ku' in'hpom na' lah' ce ri ce na'.

Ap Yesu' Eun nang nya hk'o' mun' keuting na'

²¹ Yam kon' nyom na' pun Eun seudi' seunyi na', a rot yam ton' ce duing' hak' Eun na', ce ghuk' Eun muis Yesu'. Muis aen' na ko', in'hpom eun ghuk' a tang' neum ma Eun un' nang nyhel' ka Eun nang keuteul ri na'.

²² Na' a rot yam Mari' kaw ka yeuh hk'a' seunga' chak' seun' leukah' ritroe tuil' eun Mo'se na', Mari' mae' Yo'saep ka va ri huk' ap kon' nyom na' Eun ri Peucawo' Eun nang veng Yeru'salaem* ²³ seun' leukah' ritroe Eun Peucawo' na' tem' a ri yeuhki' na', "Ku' meuh kon' ai' ku peue na' ce, pun ri ap ce ri Peucawo' Eun"† ²⁴ Ka ku dum ri tan ku' tan seun' leukah' ritroe Eun Peucawo' na' tem' a

* 2:22 2:22 Fae' 12:2-8 † 2:23 2:23 Pucti heul' 13:2, 12

ri yeuhki' na', "Gui' ti ku, un' meuh ko', a'tuic seuyang lal' tu'."‡

25 Yam awn' na, a kue' peue ut' nang veng Yeru'salaem ti peue. Eun muis Si'me'on. Eun meuh peue leupaws seumeu' yumyam' Peucawo' Eun. Eun buih ko' yam Peucawo' kaw Eun ti peue I'sarela' na' ce pon hk'a' tuxhka na'. Cit' seunga' chak' na' a ut' mae' heun. 26 Cit' seunga' chak' na' a yeuh eun yawng, eun lawn un' nang pun ri nyu Hkrit ku' tuil' Eun Cawo' Peucawo' na' Eun ko', eun kaw un' nang yeum. 27 Eun lec nang kang' hkung' ka nya hk'o' mun' keuting na', kopti Cit' seunga' na' va ka eun na'. Punta makuiing' Eun Yesu' kaw ka yeuh a ri kon' nyom na' Eun seun' kue' a leukah' ritroe ka na', ka va kon' nyom aet' Yesu' Eun lec nang kang' hkung' ka nya hk'o' mun' keuting na'. 28 Si'me'on eun cem ri neng' kon' nyom aet' na' Eun. Hawc' ko', eun suk' seun' Peucawo' Eun. Eun lah',

29 "Cawo', seun' leukah' kati mi na' kue' ka, maet' maen' kah mhai' Mi na' eun ing' mae' kuit nyawk' kuit sam' ran cumyen' ri reu'.

30 Kopti nyu ui' hk'a' htut lawtpon Mi na' ri ngai' ri hawc'.

31 Hk'a' htut aen' na rangraen Mi a nanggal' peue ku ceu hawc'.

32 Meuh a ku' ceng' til' peue un' meuh peue ceu Yu'da na' ce gawm'euc'.

A meuh munhpung' pun peue ceu Mi I'sarela' na' ce."

33 Makuiing' na' ka am' ri lah' eun lawng Eun kon' nyom na'. 34 Hawc' ko', Si'me'on eun nap mun' ri ka. Eun lah' a ri ma Eun Mari' ka, "Kopti kon' nyom aen' Eun, peue I'sarela' na' ce kaw htang' meul heun' heun', ce kaw tang kuh' heun' heun'. Eun kaw meuh het' kaw peue ham' tap ri.

35 Ku' kuit peue nang hpum' ri na', Eun kaw hue' a pucti lih

‡ 2:24 2:24 Fae' 12:8

glih'gleueng'. Pa' ku na' pun ri kuit nyhap' nyawk' seun' seugon' sawt' a hpum' pa' na' roc' ko'."

³⁶ A kue' beun' suip leukah' Eun Peucawo' muis Ana' ti peue. Ka meuh kon' beun' eun Hpanoe. Ka meuh peue ceu Acheu. Ka ku kawt nyawk' hawc'. Hawc' ti ka ri is' me na', ka gup pun ri ut' mae' heun a' res neum. ³⁷ Ka meuh a' ya seunao rot ti a' yu ri pun a seudi' kul' pun' neum. Ka hkuin' duing rang' nya hk'o' mun' keuting na'. Ka eut' ku' hk'a ri, peunsum' peunnyi ka hk'o' mun' faee' Peucawo' Eun. ³⁸ Yam awn' na, ka ing' ri Mari' mae' Yo'saep ka. Hawc' ka mun' keuting ri Peucawo' Eun na', ka lah' peue mhawng' lawng Eun kon' nyom na' ri peue keutui' hpum' ko' hk'a' htut ri veng Yeru'salaem na' ku peue ce.

Keutah ing' nang veng Nasaraet'

³⁹ Yam Mari' mae' Yo'saep yeuh ka seun' kue' a leukah' ritroe Eun Peucawo' gawm' euc' ka hawc' na', ka keutah ing' vang ut' ti nang kuing' Galilae' veng Nasaraet' na'. ⁴⁰ Kon' nyom awn' Eun baet ti keuting. Kawl' reng Eun a ku keuting yeut. Eun kue' cu' yi htonnuk. Mun' Eun Peucawo' na' a kue' hk'a' pang Eun.

Kon' nyom aet' Yesu' kawn' ut' Eun nang nya hk'o' mun' keuting

⁴¹ Makuiing' Yesu' ka huk' nang veng Yeru'salaem yam pawe vel nya na' ku neum. ⁴² Yam Yesu' a' yu Eun pun a kul' leual' neum na', ce huk' nang veng Yeru'salaem na' seun' tawn huk' ka ku neum na'. ⁴³ Yam seunyi pawe na' hawc' ka na', ce keutah ing'. Kon' nyom aet' Yesu' Eun kawn' ut' nang veng Yeru'salaem na'. Daecti makuiing' Eun ka hkuin' yawng a. ⁴⁴ Makuiing' Eun ka hteum' Eun keutah ing' mae' peue heun' na' ce ti ri cum. Na' ka ing' ti seunyi hk'a', ka tang' eo' ri sok Eun mae' ec' awng' a' mawo Eun na' ce. ⁴⁵ Kopti un' nyu ka Eun na', ka tang huk' sok

Eun nang veng Yerú salaem ná' bae. ⁴⁶ Yam sok ka Eun rot loe' seunyi ná', ka hk'eup' Eun nang kang' hkung' ka nya hk'o' mun' keuting ná'. Eun mok' nang seuna' ce seura' ná'. Eun leuceng ku' lah' ce ná'. Eun ku mhaing' ce. ⁴⁷ Peue pun ri mhawng' ku' lah' Eun ná' ku peue, ce am' ri top' Eun na mae' heng' yawng ri. ⁴⁸ Yam makuiing' Eun pun ka ri nyu Eun ná', ka am' nyawk'. Ma Eun ka lah' a ri Heun, "A' ai', Mi cí' yeuh keunhaw', Mi vae' yeuhki' ri ya? Kuiing' Mi eo' sok ya Mi mae' kuit nyhap' kuit yak ri."

⁴⁹ Eun top' a, "A cí' meuh kop keunhaw', pa' vae' eo' sok Ui'? Un' yawng pa' kaw Ui' kah ri ut' nang nya Eun Kuiing' Ui' ná' aw?" ⁵⁰ Daecti makuiing' Eun ka un' doh' ri ku' lah' Eun ná'.

⁵¹ Haw' ko', Yesu' Eun keutah ing' mae' ka nang veng Nasaraet'. Eun leuceng leukah' ka makuiing' ri meulamlam ri. Ma Eun ka pawn ri uin' lawng aen' na nang hpum' ri gawm'euc' ka. ⁵² Peuyhá' cu'yi Eun mae' tu' Eun Yesu' ná' keuting ka ná'. Eun htuk' hpum' Eun Peucawo', Eun ku htuk' hpum' peue yeut.

3

Yo'han cawo' tuil' hk'a' cum' rangraen eun hk'a'

¹ Yam cawo' keuting Kae'sa Tiberi'as' u'peung eun kuing' ná' gawm'euc' ka a pun kul'hpawn' neum ná', Pontias' Pilat eun meuh kon' eun cawo' nang kuing' Yu'da ná', Herot' eun meuh kon' eun cawo' nang kuing' Galilae' na, Hpi'lip' awng' eun Herot' ná' eun meuh kon' eun cawo' nang kuing' I'tu'raet' mae' kuing' Trahkaw' nitis' ná', Lisianas' eun meuh kon' eun cawo' nang kuing' Abi'le ná', ² Anas' eun mae' Kayafas' ka meuh peue jhawp' rit keuting. Yam awn' na, Peucawo' Eun tuil' leukah' ri ná' ri Yo'han ku' meuh kon' eun Yahkari' ná' ri vang hk'oh' hk'oeng' ná'. ³ Eun heul' nang kuing' ut' hot'

keunam ka klong' Yaw'dan na' ku duih' ka. Eun pao' ri lah', "Taws' hpum' fuin map' ri rap ri ti hk'a' cum' na' reu'. Peucawo' kaw Eun plo'e' map' pe' na'." ⁴ Seun' nang htawm eun I'saya' ku' meuh peue suip leukah' Eun Peucawo' na' tem' a ri na',

"Peue ti peue pao' eun nang vang hk'oh'hk'oeng' na'.

Eun lah', 'Mhe' hk'a' pun Peucawo' Eun reu'.

Pleng' hk'a' Eun na' seumeu' reu'.

⁵ Kah hk'ok na' nuk ku duih' ka,
gong na' mae'e' leuang' na' kah a tem ku meul' ka,
hk'a' vok' na' lat a seumeu',
tang mhe' hk'a' lhung' tem na' seudap' raphpeng reu'.

⁶ Peue gawm'euc' ce kaw pun ri nyu hk'a' htut lawtpon
Eun Peucawo' na'."*

⁷ Yo'han eun lah' a ri peue cum heun' kaw ing' rap ri ti hk'a' cum' ri heun na' ce, "Kon'hk'i ka seueueng' sa'hao' na' pe', punta kaw pe' pon hk'a' seungeueng' kaw ing' rot na', a'nhaw' ci' deun' pe'? ⁸ Kop awn' na, kaw a meuh sa'hki' ka taws' pe' hpum' fuin pe' map' ri hawc' na', yeuh ku' chak' na' reu'. Pawlaee han' mae'e' Abraham meuh eun kuiing' pe' nang hpum' ri. Ui' lah' a ri pe', Peucawo' kaw Eun cang pleng' seumu aen' ce meuh kon'hk'i eun Abraham yeut. ⁹ Maet'maen', mue' na' uin' a ri keunam kleum' hku' na' hawc'. Kleum' un' pli' ku' chak' na' ku kleum' ka, kah ri gawl ri tec a, dum a hk'a'naee ngawl."

¹⁰ Peue cum heun' na' ce lah', "Yeuh keutit' ko', ye ci' na' htuk' ri yeuh sa'nhaw'?"

¹¹ Eun top' a, "Peue kue' hk'o lal' hpuin' na' ce, gvah ku' un' kue' hk'o na' ce is' reu'. Saec' meuh peue kue' ku' hk'a' na' ce, yeuh a seun' awn' na yeut."

* 3:6 3:6 I'saya' 40:3-5

¹² Saec' meuh peue cep' hkawn' na' ce ku ing' hk'o' ri rap ri ti hk'a' cum' ri heun yeut. Ce mhaing' eun, "Seura', ye ci' na' htuk' ri yeuh sa'nhaw'?"

¹³ Eun lah' a ri ce, "Pawlaee cep' hkawn' pe' na' pon lheu'." ¹⁴ Saec' meuh peue suik' na' ce ku mhaing' eun, "Ye ri sae, ye ci' na' htuk' ri yeuh sa'nhaw' yeut?"

Eun top' a, "Pawlaee rutrim' ri ti is' peue. Pawlaee lah' ku' un' kue' un' meuh chi' lai ri hk'a' peue. Cu leumuil ngos reng pun pe' na' hit' hpum' ri reu'."

¹⁵ Yam peue heun' na' keutui' hpum' ko' ce Hkrit Eun na', ce kuit a nang hpum' ri, "Yo'han eun ci' na' meuh Hkrit eun meuh un' meuh?" ¹⁶ Yo'han eun lah' a ri ce, "Tuil' ui' hk'a' cum' na' ri pe' ri leuum' na'. Daecti ku' ti'ca keuting hk'ai' ui' na' buih ing' Eun hawc'. Pal yawo kaw ui' un' kuing' ri kah' mu' jhaep' Eun na'. Eun kaw tuil' hk'a' cum' na' ri pe' ri Cit' seunga' chak' na' mae' ri ngawl na'.[†] ¹⁷ Eun jhawp' yai' yuip. Eun kaw yuip ri tec vang cap' ngho' ri na' hklel' seunga'. Hawc' Eun na' hk'on' ro ngho' na', Eun na' peus ri uin' a nang htuim' na'. Daecti dep' ngho' na' Eun kaw dum a hk'a' naee ngawl un' cang laic na'." ¹⁸ Lheu' awn' na, Yo'han eun ku sangsawn' ce ri ku' seubu heun' ceu mae' leukah' mun' ren' kawn na'.

¹⁹ Kopti Yo'han ram eun ri cawo' Herot' ti eun beun' eun awng' ri muis Herodi' na' mae' ku' rai yeuh eun na' ce na', ²⁰ Herot' eun seue' Yo'han eun nang htawng'. Ku' rai yeuh eun aen' a lheu' ku' yeuh eun nanggal' na'.

Yesu' rap Eun ri ti hk'a' cum'

²¹ Hawc' peue gawm'euc' na' rap ce ri ti hk'a' cum' na', Yesu' Eun ku rap ri ti hk'a' cum' na' yeut. Yam buih hk'o' Eun mun' na', kuing' pang mao' na' a dah'. ²² Cit' seunga'

[†] **3:16** 3:16 Vangdoh' ka ngawl lah' ka na' kue' a la' ceu. 1. Yesu' kaw Eun yeuh peue seunga' chak'. 2. Ngawl na' a lah' hk'a' ciyang Eun Peucawo' na'.

na' a ruprang seun' gui' na', a lih ut' mae' Heun. Seng' na' a laws' lih neum kuing' pang maó'. A lah', "Meuh Mi Kon' ai' leumeus' Ui'. Mi hit' ri hpum' Ui' nyawk'."

Ceucat Eun Yesu' na' ce

²³ Yam Yesu' la Eun ri yeuh kan' mun' na', a'yu Eun na' a pun hk'ao ri leuoekul' neum. Peue hteum' Yesu' Eun meuh kon' Yo'saep.

Yo'saep eun meuh kon' Heli. ²⁴ Heli eun meuh kon' Mathtat'.

Mathtat' eun meuh kon' Levi'. Levi' eun meuh kon' Melchi'.

Melchi' eun meuh kon' Yanai'. Yanai' eun meuh kon' Yo'saep.

²⁵ Yo'saep eun meuh kon' Mahtahti'as'. Mahtahti'as' eun meuh kon' Amó'.

Amó' eun meuh kon' Nahum. Nahum eun meuh kon' E'sali'.

E'sali' eun meuh kon' Nagai'. ²⁶ Nagai' eun meuh kon' Mat'.

Mat' eun meuh kon' Mahtahti'as'. Mahtahti'as' eun meuh kon' Semi'.

Semi' eun meuh kon' Yo'sec. Yo'sec eun meuh kon' Yo'da.

²⁷ Yo'da eun meuh kon' Yo'hana'. Yo'hana' eun meuh kon' Resa'.

Resa' eun meuh kon' Yeru'babel. Yeru'babel eun meuh kon' Shealtiel'.

Shealtiel' eun meuh kon' Neri'. ²⁸ Neri' eun meuh kon' Melchi'.

Melchi' eun meuh kon' A'di'. A'di' eun meuh kon' Ko'sam.

Ko'sam eun meuh kon' El'madam. El'madam eun meuh kon' E'ra'.

²⁹ E'ra' eun meuh kon' Yaw'su'. Yaw'su' eun meuh kon' E'lesa.

E'lesa eun meuh kon' Yaw'rim. Yaw'rim eun meuh kon' Mathtat'.
Mathtat' eun meuh kon' Levi'. ³⁰ Levi' eun meuh kon' Si'me'on.
Si'me'on eun meuh kon' Yu'dah. Yu'dah eun meuh kon' Yo'saep.
Yo'saep eun meuh kon' Yo'nam. Yo'nam eun meuh kon' E'lakim.
³¹ E'lakim eun meuh kon' Me'le'a. Me'le'a eun meuh kon' Mena.
Mena eun meuh kon' Matahta'. Matahta' eun meuh kon' Natan.
Natan eun meuh kon' Davit'. ³² Davit' eun meuh kon' Yesae'.
Yesae' eun meuh kon' Obet. Obet eun meuh kon' Baw'ya'.
Baw'ya' eun meuh kon' Samon. Samon eun meuh kon' Nason.
³³ Nason eun meuh kon' Ami'nada'. Ami'nada' eun meuh kon' Ram.
Ram eun meuh kon' Hes'ron. Hes'ron eun meuh kon' Hparae'.
Hparae' eun meuh kon' Yu'dah. ³⁴ Yu'dah eun meuh kon' Yakop'.
Yakop' eun meuh kon' I'cak'. I'cak' eun meuh kon' Abraham.
Abraham eun meuh kon' Tera. Tera eun meuh kon' Naho.
³⁵ Naho eun meuh kon' Seru'. Seru' eun meuh kon' Re'u. Re'u eun meuh kon' Pele'. Pele' eun meuh kon' Ebeu.
Ebeu eun meuh kon' Chelah'. ³⁶ Chelah' eun meuh kon' Kai'nan.
Kai'nan eun meuh kon' Afasat'. Afasat' eun meuh kon' Chem.
Chem eun meuh kon' No'ah. No'ah eun meuh kon' Lame'.
³⁷ Lame' eun meuh kon' Metusela'. Metusela' eun meuh kon' E'nawk'.

E'nawk' eun meuh kon' Yaret'. Yaret' eun meuh kon' Mahalalel.
 Mahalalel eun meuh kon' Kai'nan. ³⁸ Kai'nan eun meuh kon' E'nos'.
 E'nos' eun meuh kon' Seta', Seta' eun meuh kon' Adam.
 Adam eun meuh kon' Peucawo'.

4

Yesu' pun Eun ri hkam' hk'a' cop'long

¹ Yesu' kue' Eun Cit' seunga' chak' na' htonnuuk. Yam ing' Eun neum klong' Yaw'dan na', Cit' seunga' na' a va Eun heul' nang vang hk'oh'hk'oeng' na'. ² Teh' na', cawo' ka seuca' rai na' a cop' Eun ri ka pun'kul' seunyi. Seunyi yam awn' na, Eun un' hk'a' keunhaw'. Yam seunyi awn' euc' ka na', Eun sum' som'.

³ Yam awn' na, cawo' ka seuca' rai na' a lah' a ri Heun, "Mi lawn meuh Kon' ai' Eun Peucawo' ko', tuil' leukah' Mi ri seumu aen' na kah a meuh ku' hk'a' reu'."

⁴ Daecti Yesu' Eun top' a, "Nang htawm Seunga' na' tem' a ri yeuhki', 'Peue un' a'yu im' peue ri ku' hk'a' na' palkoe.'",*

⁵ Hawc' ko', cawo' ka seuca' rai na' a tang va Eun huk' nang vang lhung' na'. A tuil' Eun nawk kuing' ut' nang lok na' gawm'euc' hk'a'naee ti yam na'. ⁶ A lah', "An'nya na' mae' hk'a' meuneum aen' ce gawm'euc' ka, kaw ui' tuil' a ri Mi. Aen' ce kopti ap a ri meuh is' ui' hawc' na', ui' sum' tuil' a'nhaw' is' a ko', ui' tuil' a pun. ⁷ Kop awn' na, Mi lawn fae' ui' ko', aen' ce gawm'euc' a kaw meuh is' Mi."

⁸ Daecti Yesu' Eun top' a ri ka, "Nang htawm Seunga' na' tem' a ri yeuhki', 'Kaw mi kah ri fae' Cawo' Peucawo' ri na' Eun, yeuh mhai' Eun na' palkoe.' "†

* **4:4** 4:4 Sawn' leukah' mun' 8:3 † **4:8** 4:8 Sawn' leukah' mun' 6:13

⁹ Hawc' ko', cawo' ka seuca' rai na' a tang va Eun huk' nang veng Yeru'salaem na'. A kah Eun cawng pang seubul ka nya hk'o' mun' keuting na'. A lah' a ri Heun, "Mi lawn meuh Kon' ai' Eun Peucawo' ko', yawt' Mi hk'ui'c' reu'.

¹⁰ Kopti nang htawm Seunga' na' tem' a ri yeuhki', 'Peucawo' kaw Eun tuil' leukah' ri in'hpom ri na' ce.

Eun kaw kah ce roksa' Mi.

¹¹ Punta cung Mi na' kaw a un' cang pen seumu na', in'hpom na' ce kaw ko' ri cem Mi.' "‡

¹² Yesu' Eun top' a, "Nang htawm Seunga' na' tem' a ri yeuhki', 'Pawlaee long Cawo' Peucawo' mi na' Eun.' "§

¹³ Hawc' cawo' ka seuca' rai na' cop' long ka Eun ri ku ceu na', a pucti heul' hk'ai' Heun. A jing yam kaw htuk' lai na' ti vut ti yam.

Yesu' la Eun ri yeuh kan' mun' nang kuing' Galilae'

¹⁴ Yesu' Eun keutah ing' nang kuing' Galilae'. Ti'ca ka Cit' seunga' chak' na' a htonnuk hk'a'naee Heun. Lawng Eun na' a seutu in seutan laws' heul' nang kuing' caona' na' ku duih' ka. ¹⁵ Eun sangsawn' nang sa'la vang hk'o' mun' ce na' heun' duih'. Peue suk'seun' Eun gawm'euc' ri.

Peue Nasaraet' na' un' rap ce ri ti Yesu' Eun

¹⁶ Eun keutang rot nang veng Nasaraet' vang keuting ri na'. A rot seunyi Sin'* na', Eun lec nang sa'la vang hk'o' mun' seun' ku' tawn yeuh Eun na'. Punta kaw Eun lip htawm Seunga' na', Eun kuh' cawng. ¹⁷ Hawc' ko', ce tuil' bawl' htawm eun peue suip leukah' Eun Peucawo' htawm I'saya' na' ri Heun. Eun glas a, Eun sok ri nyu vang tem' a ri yeuhki' na',

‡ 4:11 4:11 Suk'seun' 91:11, 12 § 4:12 4:12 Saw'n leukah' mun' 6:16

* 4:16 4:16 Seunyi Sin' na' meuh a seunyi keului' ce peue Yu'da na'. Ce kam' hk'a'naee seunyi aen' na. Seunyi Sin' ce peue Yu'da na' meuh a les seunyi na'. A meuh seunyi tisut' ka vung ce peue Yu'da na'.

18 “Cit' seungá Eun Peucawó na' kue' a hk'a' pang Uí.
 Punta kaw Uí suip ri tuil' leukah' mun' ren'kawn na'
 ri peue hk'o'tukyak na' ce na',
 Eun leuk ri ti Uí hawc'.
 Eun saec' cus' Uí heul' na' meuh a punta kaw Uí pao' peue
 hk'awng' ri na' kaw ce ploé' ri,
 maeé' peue ngái' lec' na' kaw ce nyu hk'a' ri baeé,
 maeé' peue pun ri hkam' hk'a' keunhap' nokneh na' kaw
 ce ploé' ri,

19 maeé' kaw Uí pao' lawng rot a meuyam Cawó kaw
 eun htut peue ri na' ce.”†

20 Hawc' ko', Eun tang bawl' ri tuil' htawm awn' na ri
 ku' yeuh kan' nang sa'la vang hk'o' mun' na' eun. Hawc'
 ko', Eun mok'. Ngái' ce peue ut' nang sa'la vang hk'o' mun'
 na' a keue' ri Heun ku peue ri. 21 Eun tang lah' a ri ce,
 “Leukah' htawm Seungá pun pé' ri mhawng' na' htonnuk
 a seunyaen' hawc'.”

22 Peue gawm'euc' na' ce suk'seun' Eun. Ce am' ri
 leukah' hk'o' leuceng mun' pucti lih hk'ai' moeng Eun na'.
 Ce lah' a ri puri, “Hkaen' un' meuh a kon' me eun Yo'saep
 na' Eun aw?”

23 Yesú Eun lah' a ri ce, “Yawng Uí na' pé' sum' lah'
 leukah' lat aen' a ri Uí yeuh keutit' yeut, 'Cawó bai', bai'
 vang sui' mi na' meun reu'. Seun' mhawng' ye ku' yeuh Mi
 hk'a'naee veng Kapení'um na' yeuh a vang ut' Mi na' yeut
 reu'.”

24 Yesú Eun tang suip ri lah', “Kaw Uí lah' a ri pé'
 neumneum, vang ut' Eun peue suip leukah' Eun Peucawó
 na' un' rap ce ri ti Eun. 25 Daecti kaw Uí lah' a ri pé'
 neumneum ri baeé, cu eun E'li'ya na' nang kuing' ce
 I'sarela' na' a lheu' ri a'ya seunao. Yam maó na' sawng' a
 ri a un' lhe' pun loe' neum pai' na', kuing' na' gawm'euc'

† 4:19 4:19 I'saya' 61:1, 2

ka a meuh ut' ngeup' keuting. ²⁶ Peucawo' Eun hkuin' kah E'li'ya eun heul' ri a'nhaw' saec' ti peue. Daecti Eun kah eun heul' ri a'ya seunao ut' nang kuing' Si'don veng Sarehpat' na' ka koe. ‡ ²⁷ Saec' meuh cu eun E'li'sae' ku' meuh peue suip leukah' Eun Peucawo' na', nang kuing' ce I'sarela' na', a ku kue' peue peuyhat naw heun' peue yeut. Daecti ce hkuin' kue' nang kaw pun ri cuin saec' ti peue. A meuh yawo peue kuing' Su'ri' muis Naman eun ti peue koe pun eun ri cuin." §

²⁸ Yam peue ut' nang sa'la vang hk'o' mun' na' pun ce ri mhawng' ku' lah' Eun na', ce seungeueng' nyawk' gawm'euc' ri. ²⁹ Ce yuk ri kuh', ce ra Eun heul' hk'a'nok ka veng na'. Ce va ri kaw heul' cut' Eun hk'ui'c' hk'ai' leuang' ri gong ka veng na'. ³⁰ Daecti Eun lec nang seuna' ce na'. Eun pucti lawt mawn' na' heul'.

Peue seuca' hk'aw'jeuk lec

³¹ Hawc' ko', Eun lih nang veng Kapeni'um kuing' Galilae' na'. A rot seunyi Sin' na', Eun sangsawn' ce. ³² Ce am' ri ku' sangsawn' Eun na', kopti leukah' sangsawn' eun na' kue' a ti'ca na'.

³³ Nang sa'la vang hk'o' mun' awn', a kue' peue ti peue. Seuca' hk'aw'jeuk a lec eun. Eun ta'ul' ri lah', ³⁴ "O', Yesu' peue veng Nasaraet', Mi ci' kaw ing' hkvi ye meuh keunhaw'? Kaw Mi ing' yeuh ye lu aw? Yawng ui' meuh Mi peue seunga' chak' Eun Peucawo' yeut."

³⁵ Hawc' ko', Yesu' Eun hae' eun. Eun lah', "Dit' mi. Puc mi heul' hk'ai' heun reu'." Na' hawc' ko', seuca' awn' a yeuh peue awn' eun htang' meul nanggal' ce na'. A pucti heul' hk'ai' heun. A un' yeuh eun sui' saec' peunae'.

³⁶ Ce am' nyawk' gawm'euc' ri. Ce lah' a ri puri, "Leukah' awn' na, a ci' meuh leukah' keunhaw'? Eun tuil' leukah' ri

‡ 4:26 4:26 1 Hkun'haw'hkam' 1:1-16 § 4:27 4:27 2 Hkun'haw'hkam' 5:1-14

seuca' rai awn' ce hk'a'naee munhpung' ti'ca ri na', ce ku pucti heul'." ³⁷ Lawng Eun na' a seutuin seutan laws' heul' keunam caona' ka mawn' na' hk'awp'.

Yesu' bai' Eun peue peuyhat heun' ceu na' cuin

³⁸ Yam puc Eun ri lih neum sa'la vang hk'o' mun' na', Eun ing' lec nang nya eun Si'mon na'. A'oe' eun Si'mon peuyhat kuc' ha'lok ka nyawk'. Ce hk'o' Yesu' Eun hpot' ka. ³⁹ Yesu' eun cawng keunam ka a'ya na'. Eun kah peuyhat kuc' ha'lok ka na' pucti lih. Peuyhat kuc' halok na' a rai'. Ka keulawn' kuh' nghawm' ce hk'asom'.

⁴⁰ Yam seunyi lec ka na', peue va peue peuyhat heun' ceu na' ce ing' ri Yesu' Eun. Eun tang' ti' ri hk'a' pang ce ku peue ri. Ce cuin gawm'euc' ri. ⁴¹ Saec' meuh seuca' na' ce pucti heul' hk'ai' peue heun' na' ce. Ce ta'ul' ri lah', "Mi ri meuh Mi Kon' ai' Eun Peucawo'." Daecti Yesu' Eun hae' ce. Eun un' kah ce leukah' bae, kopti yawng ce Yesu' meuh Eun Hkrit na'.

Yesu' sangsawn' Eun leukah' mun' heun' duih'

⁴² Yam ceng' sumsam ka na', Yesu' Eun pucti heul' neum mawn' na'. Eun heul' vang yen'yong na'. Peue cum heun' na' ce sok Eun. Yam hk'eup' ce Eun na', ce un' sum' ploé' Eun. ⁴³ Daecti Eun lah' a ri ce, "Ui' ku kaw kah ri eo' sangsawn' leukah' mun' ren'kawn lawng kuing' Eun Peucawo' na' nang veng seubu na' ce yeut. Kopti Peucawo' cus' Eun Ui' kaw lih yeuhki' na'." ⁴⁴ Kop awn' na, Eun eo' sangsawn' leukah' mun' ren'kawn na' nang sa'la vang hk'o' mun' ce peue kuing' Yu'da na'.

5

Yesu' la Eun ri klawng tapae' cum nanggal' na' ce

¹ A kue' ti seunyi, yam Yesu' buih cawng Eun keunam glu Genesaret' na', peue cum heun' na' ce nui ri ing'

leuceng leukah' Eun Peucawo' na' ri Heun. ² Eun pun ri nyu reu lal' lam na' tah' ka ri keunam leuum' na'. Daecti peue sok ka' na' ce pucti lih hk'ai' reu ri na' euc'. Ce buih saic' reup ri na'. ³ Eun lec nang reu ti lam na'. A meuh reu eun Si'mon. Yesu' Eun hk'o' Si'mon eun sat reu ri na' heul' nang leuum' na' bae peunaeng'. Hawc' ko', Eun mok' ri sangsawn' peue cum heun' na' ce nang reu na'.

⁴ Na' Eun hawc' sangsawn' ce, Eun lah' a ri Si'mon eun, "Sat pe' heul' plo'e' reup ri na' vang rui' ka leuum' na' reu'."

⁵ Si'mon eun top' a, "Cawo', sae'cae' ye reup ri gawm' sum', daecti ye un' pun ka' saec' ti tu'. Kopti lah' Mi a na', ye kaw plo'e' reup ri na'."

⁶ Na' ce yeuh keutit' ko', ce pun ka' heun' nyawk'. A hk'o' reup ce na' la ri res. ⁷ Kop awn' na, ce faic' ti' ri klawng a'mawo ut' nang reu seubu na' ce ing' teum'kawm ri. A'mawo ce na' ce ku ing'. Kopti pun ce ka' na' nuk reu lal' lam awn' na, a hk'o' reu na' jom ri cum'.

⁸ Yam Si'mon Petru' nyu eun a na', eun nghup' ri mae' ngai'ngong Eun Yesu' na'. Eun lah', "Cawo', hk'o' Mi pucti heul' hk'ai' ui' reu', kopti meuh ui' peue map' keuting na'."

⁹ Si'mon eun mae' pu ut' mae' heun na' ce am' nyawk' gawm'euc' ri kopti pun ce ka' heun' nyawk' na'. ¹⁰ Kon' eun Yebedae' muis Yakop' mae' Yo'han, ka meuh pu yeuh kan' mae' Si'mon eun, ka ku am' nyawk' yeut. Yesu' Eun lah' a ri Si'mon eun, "Pawlae lhat', nanggal' aen' na meuh mi peue sok ka', daecti tang' neum maet' maen' na' heul', kaw mi meuh nang sok peue." ¹¹ Hawc' ce tah' ri uin' reu ri na' keunam leuum' na', ce tec ku ceu ri na' gawm'euc' ka. Ce hot' Yesu' Eun heul'.

Yesu' bai' Eun peue peuyhat naw cuin

¹² Yam Yesu' ut' Eun nang veng ti veng na', a kue' peue peuyhat naw gawm' tu' ri ti peue. Yam nyu eun Yesu' Eun na', eun nghup' ri pang keute' na'. Eun hk'o' a, "Cawo',

a lawn htuk' hpum' Mi ko', kaw Mi cang yeuh ui' seunga' chak'."

¹³ Yesu' Eun nyat' ti' ri paic' eun. Eun lah' a ri heun, "Htuk' a hpum' Ui' yeut, seunga' chak' reu'." Peuyhat naw eun na' a keulawn' rai'.

¹⁴ Yesu' Eun tuil' leukah' ri heun, "Pawlaee lah' lawng aen' a ri peue saec' ti peue. Daecti peuyhat mi na' cuin ka hawc' na' punta kaw a meuh sa' hki' ri peue heun' na' ce, heul' tuil' peue jhawp' rit na' ce nyu tu' mi na' maeé' heul' tan ku' tan seun' Mo'se tuil' eun ri uin' leukah' to' ri punta kaw yeuh ri seunga' chak' na' reu'."*

¹⁵ Daecti kopti lawng Eun Yesu' na' gawm seutuinn seutan laws' a heul' ku duih' ka na', peue cum heun' na' ce cu ri ing' leuceng leukah' Eun na'. Ngon' ce ku ing' bai' peuyhat ri. ¹⁶ Daecti Yesu' Eun ren' ri heul' hk'o' mun' nang vang yen'yong na'.

Yesu' bai' Eun peue ti' cung chuing' cuin

¹⁷ A kue' ti seunyi, yam Yesu' buih sangsawn' Eun ce na', peue Hparisae' maeé' peue guil leukah' ritroe na' ce ku mok' mawn' yeut. Ce ing' neum yung' ku yung' kue' nang kuing' Galilae', kuing' Yu'da maeé' veng Yeru' salaem na'. Punta kaw Eun bai' peuyhat na' cuin, ti'ca Eun Peucawo' na' a kue' ri Heun. ¹⁸ Yam awn' na, peue jong' peue ti' cung chuing' it' nang hk'eung it' ri ing' ti peue. Ce sok hk'a' kaw ri jong' ri ing' uin' eun nanggal' Eun Yesu' na'. ¹⁹ Kopti peue cum heun' na' ut' ce nuk na', yam un' yawng ce kaw ri ti eun ing' yeuh sa'nhaw' na', ce huk' yah pang lhung' ka nya na'. Ce ploé' peue peuyhat awn' eun lih nanggal' Eun Yesu' na' gawm' hk'eung it' eun na' nang ngon' ce peue heun' na'.

²⁰ Yam Yesu' nyu Eun hk'a' yum' ce na', Eun lah' a ri peue peuyhat na' eun, "A'mawo, map' mi na' ploé' a ri hawc'."

* 5:14 5:14 Faeé' 14:1-32

²¹ Peue Hparisae' maeé' peue guil leukah' ritroe ná' ce sawng' kuit a nang hpum' ri, "Peue lah' ku' un' nawpsang ri Peucawo' Eun peue aen' Eun cí' meuh a'nhaw'? A lawn un' meuh Peucawo' Eun koe, a'nhaw' cí' cang ploé' map' ná' gah'?"

²² Kopti Yesu' yawng Eun kuit ce a yeuh keutit' nang hpum' ri ná', Eun lah' a ri ce, "A cí' meuh kop keunhaw', pé' vaeé' kuit a nang hpum' ri yeuhki'? ²³ 'Map' mi ná' ploé' a ri hawc'. Na' Uí' lah' a yeuh keutit', a ná' sam'ran aw? A'ko', 'Kuh' mi ná' long hk'a' ing' reu'. Leukah' nangnhaw' a cí' ná' ca ri sam'ran? ²⁴ Daecti sum' kah Uí' pé' yawng, Kon' aí' peue ná' punta kaw Eun ploé' map' ná', Eun kue' tí' ca nang lok ná'." Hawc' kó', Yesu' Eun lah' a ri peue tí' cung chuing' ná' eun, "Kaw Uí' lah' a ri mi, kuh' klawm' hk'eung it' mi ná' ing' ti nya mi reu'." ²⁵ Eun keulawn' kuh' nanggal' ce ná'. Eun klawm' hk'eung it' ri ná' suk'seun' Peucawo' Eun ing' ti nya ri. ²⁶ Peue gawm'euc' ná' ce am' nyawk'. Ce suk'seun' Peucawo' Eun. Ce lhat' nyawk'. Ce lah', "Seunyaen', pun é' ri nyu ku' hk'o'am' ná' hawc'."

Yesu' klawng Eun Levi' eun

²⁷ Hawc' kó', Yesu' Eun pucti heul'. Eun nyu peue cep' hkawn' muis Levi' ná' mok' eun vang cep' hkawn' ri ná'. Eun lah' a ri heun, "Hot' Uí' heul' reu'." ²⁸ Eun tec ku' kue' ri ná' gawm'euc' ka. Eun kuh' hot' Yesu' Eun heul'.

²⁹ Hawc' kó', Levi' eun yeuh pawe hk'asom' keuting pun Yesu' Eun nang nya ri ná'. Muk heun' ce peue cep' hkawn' ná' maeé' peue seubu ná' ce mok' ri som' tiduih' yeut. ³⁰ Peue Hparisae' maeé' peue guil leukah' ritroe ná' ce tawk tapae' Eun Yesu' ná' ce. Ce lah', "A cí' meuh kop keunhaw', pé' vaeé' mok' ri som' maeé' peue cep' hkawn' maeé' peue map' ná' ce?"

³¹ Yesu' Eun top' a ri ce, "Peue ut' sam'ran ná' un' lo' ce seura' baí'. Peue peuyhat ná' lo' ce koe. ³² Hpaw Uí' ca'

lih kopti punta kaw Uí klawng ri ti peue leupaws seumeu' na' ce, daecti punta peue map' na' kaw ce taws' hpum' fuin map' ri na', Uí lih."

Mhaing' Yesu' Eun ri lawng eut' ku' hk'a

³³ Ce mhaing' Eun, "Tapae' eun Yo'han na' ce ren' ri eut' ku' hk'a ri hk'o' mun'. Saec' meuh tapae' ce peue Hparisae' na' ce ku yeuh seun' awn' na yeut. Daecti tapae' Mi na' ce vaeé kawn' hk'asom'."

³⁴ Yesu' Eun top' a, "Yam me pen' na' kawn' ut' eun maeé peue ing' hk'a chec' na' ce na', kaw pé cang kah ce eut' ku' hk'a ri pun aw? ³⁵ Daecti kaw a rot yam ti peue me pen' na' eun gah' hk'ai' ku' hk'a chec' na' ce. Yam awn' na, ce na' eut' ku' hk'a ri yeut."

³⁶ Hawc' ko', Yesu' Eun keutec leukah' leupong' na'. Eun lah', "Hpen' ka hk'o hk'u' na' a'nhaw' hkuin' duing ti ri leuplu a ri hk'o hk'im' na' saec' ti peue. A lawn yeuh keutit' ko', hk'o hk'u' na' kaw a roc' vawo. Lheú awn' na, hpen' hk'u' na' a hkuin' kaw hpaw maeé hk'o hk'im' na'.

³⁷ A'nhaw' hkuin' duing seue' leuum' plí' bui hk'u' nang huil' hak' hk'im' na'. A lawn yeuh keutit' ko', leuum' plí' bui hk'u' na' a kaw res huil' hak' na'. Leuum' plí' bui na' a kaw bah. Huil' hak' na' a ku kaw lu. ³⁸ Leuum' plí' bui hk'u' na' a kaw kah ri seue' ri nang huil' hak' hk'u' na'. ³⁹ A sum' meuh a'nhaw', eun lawn nyui leuum' plí' bui hk'im' na' hawc' ko', eun un' laee sum' nyui leuum' plí' bui hk'u' na'. Kopti lah' eun, 'Ku' hk'im' na' a ca ri chak'.' "

6

Leukah' mhaing' lawng seunyi Sin'

¹ Yam meuh a seunyi Sin' na', Yesu' Eun hpa' mal' ngho' na' heul'. Tapae' Eun na' ce sec' ti sip' seukuk ngho' na'.

² Peue Hparisae' na' ce ngon' ce lah', "A cí' meuh kop

keunhaw', pé vaeé yeuh ku' kleuc' ri leukah' ritroe na' hk'a'naee seunyi Sin' na'?"

³ Yesu' Eun top' a ri ce, "Yam Davit' eun maeé pu eun na' sum' som' nyawk' ce na', eun cí yeuh keunhaw' na' un' duing lip pé lawng ka na' aw?*" ⁴ Davit' eun lec hk'a'naee nya Eun Peucawo' na'. Eun ti ri hk'a' hkawomun' tan peue na'. Eun ku tuil' pu ri na' ce hk'a' a yeut. Hkawomun' awn' a lawn un' meuh yawo peue jhawp' rit na' ce ko', a'nhaw' hkuin' cang hk'a' a."† ⁵ Yesu' Eun lah' a ri ce, "Kon' aí peue na' meuh Eun Cawo' ka seunyi Sin' na'."

Peue tí chuing' ti plak'

⁶ A rot seunyi Sin' baeé ti sin', Yesu' Eun lec ri sangsawn' ce nang sa'la vang hk'o' mun' na'. Mawn' na' a kue' peue tí a'tawm' chuing' ti peue. ⁷ Peue Hparisae' maeé peue guil leukah' ritroe na' ce buih sok hk'a' kaw ri tang' map' ri Yesu' Eun. Eun cí kaw bai' un' bai' peue peuyhat hk'a'naee seunyi Sin' na', ce hot' ri htom' Eun. ⁸ Daecti Yesu' Eun yawng ku' kuit ce na'. Eun lah' a ri peue tí chuing' na' eun, "Kuh' ing' cawng nanggal' ce peue heun' na' reu'." Eun ku ing' cawng yeut.

⁹ Hawc' ko', Yesu' Eun lah' a ri ce, "Uí seumhaing' pé. Hk'a'naee leukah' ritroe na' a cí kah e' yeuh keunhaw' hk'a'naee seunyi Sin' na'? Htuk' ri yeuh ku' chak' aw? A'ko', htuk' ri yeuh ku' lu aw? Htuk' ti yeuh a'yu peue pon aw? A'ko', htuk' ri yeuh a lu aw?"

¹⁰ Eun keue' ri ce rop. Hawc' ko', Eun lah' a ri peue tí chuing' awn' eun, "Nyat' tí mi na' reu'." Eun ku nyat' a. Tí eun na' a cuin yawo. ¹¹ Peue Hparisae' maeé peue guil leukah' ritroe na' ce seungeueng' nyawk'. Ce cí kaw htuk' ri yeuh sa'nhaw' ri Yesu' Eun na', ce sa'lit puri.

* 6:3 6:3 1 Samoela' 21:1-6 † 6:4 6:4 Levi' 4:9

Yesu' leuk Eun ri ti peue caee ri kul'leual' peue na' ce

¹² A kue' ti seunyi, Yesu' Eun huk' hk'o' mun' pang gong na'. Eun hk'o' mun' ri Peucawo' Eun gawm' bul rot ti ceng' ka. ¹³ Yam ceng' ka na', Eun klawng ri cu tapae' ri na' ce. Eun leuk ce kul'leual' peue. Eun tuil' ce meuh peue caee ri. ¹⁴ Peue awn' ce a meuh Si'mon ku' Yesu' kaw'n' ghuk' Eun muis Petru' mae' awng' eun muis Andre, Yakop' mae' Yo'han, Hpi'lip' mae' Bahto'lome', ¹⁵ Mahtae mae' Hto'mas', Yakop' kon' me eun Alfeas' mae' Si'mon ku' klawng peue eun meuh peue ritroe reng na' eun, ¹⁶ Yu'das' kon' me eun Yakop' mae' Yu'das' I'sakariot' ku' kaw fuin Yesu' Eun na' eun.

Yesu' sangsawn' Eun leukah' mun' mae' bai' peue cuin

¹⁷ Hawc' ko', Yesu' Eun mae' peue caee Eun na' ce lih cawng nang keuleung na'. Tapae' muk heun' Eun na' ce mae' peue cum heun' ut' nang kuing' Yu'da ku duih', veng Yeru'salaem, veng ut' keunam mha'seumut' na', veng Tai'ra' mae' veng Si'don na' ce. ¹⁸ Punta kaw ce leuceng leukah' Eun mae' kaw Eun bai' peuyhat ce cuin na', ce cu ri mae' Heun. Saec' meuh peue hkam' ku' seuca' rai keunhap' a ri na' ce ko', Eun ku bai' ce cuin yeut. ¹⁹ Peue cum heun' na' ce gawm'euc', ce co'ca' ri kaw pun ri paic' Eun. Kopti ti'ca na' puc a ri lih hk'ai' Heun na', a yeuh ce cuin ku peue ri.

Pun mun' mae' kuit nyhap'

²⁰ Yesu' Eun keue' ri tapae' ri na' ce. Eun lah' a, "Peue hk'o'tukyak na' pe', kaw pe' pun mun'.

Kopti Kuing' Eun Peucawo' na' meuh ka is' pe'.

²¹ Peue ngeup' ri maet'maen' na' pe', kaw pe' pun mun'.

Kopti kaw pe' pun ri hk'asom' ri sak'.

Peue yam maet'maen' na' pe', kaw pe' pun mun'.

Kopti kaw pe' pun ri keunyas.

- 22 Meuh a kopti Kon' ai' peue na' Eun,
 peue na' ces ri pe', sawn' ri tec pe',
 chaw hkamram pe' mae' yeuh muis pe' na' lu,
 kaw pe' pun mun'.
- 23 A lawn rot ti seunyi awn' a ko', ren'kawn kuit nyawk'
 kuit sam'ran ceng'cha ri reu'. Kopti lapsawng' keuting na'
 kue' ka pun pe' nang kuing' pang mao' na'. Kopti a'ta' a'ya
 ce na' yeuh ce ko' ri peue suip leukah' Eun Peucawo' na' ce
 yeut.
- 24 Daecti peue meuneum na' pe', kaw pe' pun ri hkam' hk'a'
 jha' na'.
 Kopti pun pe' hk'a' kuit nyawk' na' hawc'.
- 25 Peue pun ri hk'asom' ri sak' maet'maen' na' pe',
 kaw pe' pun ri hkam' hk'a' jha' na'.
 Kopti kaw pe' pun ri ngeup' ri.
 Peue keunyas maet'maen' na' pe',
 kaw pe' pun ri hkam' hk'a' jha' na'.
 Kopti kaw pe' pun ku' tuk, pe' na' yam.
- 26 Peue gawm'euc', peue lawn suk'seun' pe' lah' pe' chak'
 ko', kaw pe' pun ri hkam' hk'a' jha' na'.
 Kopti a'ta' a'ya ce na' yeuh ce ko' ri peue guil ri meuh
 peue suip leukah' Eun Peucawo' na' ce yeut."

Leumeus' ransu ri

27 "Daecti kaw Ui' lah' a ri ku' pun ri mhawng' a na' pe',
 leumeus' ransu pe' na' ce reu'. Yeuh ku' chak' na' ri peue
 nyu pe' pereng ri na' ce reu'. 28 Nap mun' ri peue jha' pe'
 na' ce reu'. Hk'o' mun' pun peue keunhap' nokneh pe' na'
 ce reu'. 29 Peue lawn dah beh pe' na' ti plak' ko', pe' ku
 na' tang hpawt' ri tung beh hk'a' ti plak' na' ri peue reu'.
 Peue lawn ti hk'o dal' mi na' ko', pe' ku' na' tang tuil' hk'o
 hk'a'nae' ri na' ri peue yeut reu'. 30 Peue hk'o' ri pe' na'
 tuil' ce is' ku peue ce reu'. Peue lawn ti hk'eung mi na'

ko', pawlaee hk'o' a keutah. ³¹ Yeuh ku' sum' kah pe' peue yeuh ri ti na' ri peue yeut reu'.

³² Pe' lawn leumeus' peue leumeus' pe' na' ce palkoe ko', a ci' kaw kue' mun' keunhaw' pun pe'? Saec' meuh peue map' na' ce ku leumeus' peue leumeus' ri na' ce yeut.

³³ Pe' lawn tang yeuh ku' chak' ri peue yeuh ku' chak' ri pe' na' ce palkoe ko', a ci' kaw kue' mun' keunhaw' pun pe'? Saec' meuh peue map' na' ce ku yeuh seun' awn' na yeut. ³⁴ Pe' lawn tuil' peue keucan ma pe' keutui' hpum' yawo kaw peue tang sai' pun a na' ko', a ci' kaw kue' mun' keunhaw' pun pe'? Saec' meuh peue map' na' ce ku tuil' puri keucan ma ce keutui' hpum' kaw ri pun a keutah htonnuk yeut. ³⁵ Daecti leumeus' ransu pe' na' ce, yeuh ku' chak' ri ce, tuil' peue keucan ma un' keutui' hpum' kaw peue sai' a. Hawc' ko', pe' kaw pun lapsawng' keuting na', pe' kaw meuh kon' Eun Cawo' lhung' hk'ai' peue na' Eun. Kopti cang tuckyak Eun ri peue un' yawng kun mae' peue sa'ha' na' ce. ³⁶ Yeuh pe' meuh peue cang tuckyak seun' Kuiing' pe' na' meuh Eun Cawo' cang tuckyak na' reu'.

Lawng taws' a'mu hk'a'pang peue

³⁷ Pawlaee taws' a'mu hk'a'pang peue. Pe' lawn un' taws' a'mu ri peue ko', a'nhaw' hkuin' kaw taws' a'mu ri pe'. Pawlaee tang' map' ri peue. Pe' lawn un' tang' map' ri peue ko', a'nhaw' hkuin' kaw tang' map' ri pe'. Ploe' map' peue reu', map' pe' na' a kaw ploer' ri yeut. ³⁸ Tuil' ri peue reu', pe' kaw pun a yeut. Kaw ce tung' a nang ku' keuting. Ce na' rui'rah' nuic a cen'nen' nuk veh. Ce kaw htok' a pang leuvang pe' na'. Kopti pe' lawn tung' a nang keunhaw' ri peue ko', pe' kaw tang pun a nang awn' a."

³⁹ Yesu' Eun ku lah' leukah' leupong' aen' a ri ce, "Peue ngai' lec' na' kaw ce cang va peue ngai' lec' long hk'a' aw? Kaw ka heul' hk'ui' nang hk'ok gawm' la' peue ri, un'

meuh ka aw? ⁴⁰ Tapae' na' hpaw eun ca' keuting hk'ai' seura' ri na' eun. Daecti tapae' rin ri ti htonnuk na' ce ku peue, kaw ce seun' seura' ri na' eun yeut.

⁴¹ A ci' meuh kop keunhaw', pe' vae' seuluil' hпам' ut' nang ngai' ce ec'awng' ri na', daecti ton hku' ut' nang ngai' pe' na', pe' un' ti a'ye' ka? ⁴² Pe' saec' un' to' ri nyu ton hku' ut' a nang ngai' ri na', pe' ci' yeuh keunhaw', pe' vae' cang lah' a ri ec'awng' ri na' ce, 'A'mawo, kaw ui' teum'kawm mi ti ri tec hпам' ut' nang ngai' mi na' ceu?' Peue leukah' seunga' hpum' vok' na' pe', ti ri tec ton hku' ut' nang ngai' pe' na' nanggal'. Hawc' ko', pe' na' kawn' cang nyu hпам' ut' nang ngai' ce ec'awng' ri na' meulamlam ri, cang hkaws' ri tec a.

Kleum' ka mae' pli' ka

⁴³ Kleum' chak' na' a un' pli' pli' un' chak'. Kleum' un' chak' na' a un' pli' pli' chak'. ⁴⁴ Kopti meuh a pli' ka na', e' cang yawng kleum' ka na' ku kleum' ka. Peue hkuin' duing poc' pli' keutuic ri kleum' kat'. Peue hkuin' duing poc' pli' bui ri bang' kat' yeut. ⁴⁵ Peue chak' na' hue' ce ku' chak' na' lih neum vang uin' ce hk'eung chak' nang hpum' ri na'. Peue rai na' hue' ce ku' rai na' lih neum vang uin' ce hk'eung rai nang hpum' ri na'. Kopti moeng na' lah' a ku' nuk pucti lih neum hpum' na'.

Res nya lal' ceu

⁴⁶ Pe' ci' yeuh keunhaw', pe' vae' klawng Ui' meuh Cawo', Cawo', daecti pe' hkuin' hot' ri yeuh seun' ku' lah' Ui' na'? ⁴⁷ Peue ing' ri Ui', mhawng' leukah' Ui', leuceng ri hot' ri yeuh a na' ce ku peue ri na', ce ci' seun' peue yeuh sa'nhaw' kaw Ui' lah' pe' mhawng' a ceu. ⁴⁸ Seun' ce peue pleng' nya ri. Ce kung' a rui' tang' res ka na' pang seumu na'. Yam leuum' na' nui a ri huk' na', ba leuum' reng na' a saec' htuip nya awn' a na', kopti tang' a ri keutawn' na',

a hkuin' laee fuii'fai'. ⁴⁹ Daecti peue mhawng' leukah' Uí, un' hot' ri yeuh a na' seun' ce peue pleng' nya ri un' kue' res, yeng ri tang' a pang bhen' keute' na'. Yam ba leum' reng na' htui'p a nya awn' a na', a keulawn' lhu'jah heul'. Hk'a' lhu'jah ka awn' a hk'o'lhat' nyawk'."

7

Hk'a'yum' eun po'suik'

¹ Yam Yesu' hawc' Eun sangsawn' ri peue heun' na' ce ri leukah' awn' na gawm'euc' ka na', Eun tang heul' nang veng Kapeni'um na'. ² A kue' peue ti peue. Eun meuh mhai' eun po' suik' na'. Po' suik' na' eun leumeus' eun nyawk'. Eun caw ri peuyhat kaw yeum. ³ Yam po' suik' na' mhawng' eun lawng Eun Yesu' na', eun kah nang kawt ce peue Yu'da na' ce heul' ngon', heul' hk'o'hk'ang Yesu' Eun ing' bai' mhai' ri na' eun cuin. ⁴ Yam heul' rot ce ri Yesu' Eun na', ce sae'caee' hk'o'hk'ang a ri Heun. Ce lah', "Po' suik' aen' eun ko', meuh eun peue kuing' Mi ri teum'kawm ti peue yeut. ⁵ Kopti leumeus' eun peue ceu ye na'. Eun ku pleng' ye is' sa'la vang hk'o' mun' yeut." ⁶ Kop awn' na, Yesu' Eun hot' ce ing'.

Yam kaw Eun hk'aws' ing' rot ti nya eun po' suik' na', po' suik' na' eun kah a'mawo ri na' ce heul' lah' a ri Yesu' Eun, "Cawo', pawlaee ing' Mi tal. Kopti un' kuing' uí ri rap ri ti Mi ing' lec nang nya ri na'. ⁷ Saec' tu' uí na' uí ku un' kuing' ri heul' ri Mi yeut. Daecti Mi saec' na' lah' yawo leukah' ti moeng, mhai' uí na' kaw eun cuin. ⁸ Kopti ut' uí hk'a'ruim peue. Uí ku kue' peue suik' ut' hk'a'ruim ri yeut. Uí lawn kah ti peue eun heul' ko', eun ku heul'. Uí lawn kah ti peue eun ing' ko', eun ku ing'. Uí lawn kah mhai' ri na' eun yeuh keunhaw' ko', eun ku yeuh a."

⁹ Yam Yesu' mhawng' Eun leukah' awn' a na', Eun am' ri heun. Eun hpawt' ti keue' ri lah' a ri peue cum heun' hot'

ri na' ce, "Kaw Ui' lah' a ri pe', hpaw Ui' ca' nang duing nyu peue kue' hk'a' yum' heun' nyawk' yeuhko' hk'a'naee peue I'sarela' na' ce saec' ti peue." ¹⁰ Yam peue caee eun po' suik' na' tang ing' rot ce ti nya na', ce pun ri nyu mhai' na' cuin eun.

Yesu' kah Eun kon' me ka a'ya seunao na' eun kuh' im'

¹¹ Hawc' awn' na un' ling', Eun heul' nang veng Nain' na'. Tapaé Eun na' maeé peue cum heun' na' ce ku hot' Eun heul' yeut. ¹² Yam rot Eun keunam ka leuva' veng na', ce buih klawm' nang nhum' yeum ti peue pucti lih hk'ai' veng na'. Ma eun ka meuh a'ya seunao. Ka kue' kon' me ti peue awn' eun. Peue veng cum heun' na' ce ku hot' a'ya seunao awn' ka heul'. ¹³ Yam Cawo' Yesu' nyu Eun beun' awn' ka, Eun tukyak ri ka nyawk'. Eun lah' a ri ka, "Pawlaee yam."

¹⁴ Hawc' ko', Yesu' Eun heul' keunam ce na'. Eun paic' kawm' klawm' ce na'. Ku' klawm' na' ce ku cawng. Yesu' Eun lah', "Nang nhum', kaw Ui' lah' a ri mi, kuh' reu'."

¹⁵ Peue yeum awn' eun ku kuh' mok' ri leukah'. Yesu' Eun tuil' eun keutah ri ma eun ka.

¹⁶ Peue gawm'euc' na' ce lhat' nyawk'. Ce suk'seun' Peucawo' Eun. Ce lah', "Peue suip leukah' Eun Peucawo' keuting na' puc Eun ri hk'a'naee e' hawc'. Peucawo' lih teum'kawm Eun peue ceu ri na' ce hawc'." ¹⁷ Lawng ku' yeuh Eun Yesu' awn' a seutu in seutan nang kuing' Yu'da na' ku duih' ka eo' kuing' keunam caonao' na' gawm'euc' ka.

Yesu' Eun maeé Yo'han cawo' tuil' hk'a' cum'

¹⁸ Yam tapaé eun Yo'han na' heul' lah' ce Yo'han eun mhawng' lawng awn' na gawm'euc' ka na', Yo'han eun klawng tapaé ri na' ka lal' peue. ¹⁹ Eun kah ka heul' mhaing' Yesu' Eun, "Meuh Mi ku' kaw ing' na' Eun hawc' aw? A'ko', kaw n' kaw ye ko' nang seubu aw?"

²⁰ Yam peue lal' peue awn' heul' rot ka ri Yesu' Eun na', ka lah' a ri Heun, "Yo'han cawo' tuil' hk'a' cum' kah eun ya heul' mhaing' Mi. Meuh Mi ku' kaw ing' na' Eun hawc' aw? A'ko', kaw'n kaw ye ko' nang seubu aw?"

²¹ Yam awn' na, Eun bai' peue peuyhat heun' ceu na' ce cuin heun'. Eun ku ra ri tec seuca' yeut. Saec' meuh peue ngai' lec' na' ce, Eun ku bai' ce nyu hk'a' ri heun' yeut. ²² Kop awn' na, Eun top' a ri tapae' lal' peue na' ka, "Ing' lah' Yo'han eun mhawng' ku' nyu ku' mhawng' pa' na' reu'. Peue ngai' lec' na' tang nyu ce hk'a' ri. Peue cung lu na' ce tang cang heul'. Peue peuyhat naw na' ce tang chak' ngam. Peue lhuit' na' ce tang cang mhawng'. Peue yeum na' ce tang kuh' im'. Peue hk'o'tukyak na' pun ce ri mhawng' leukah' mun' ren'kawn na'.* ²³ Mun' keuting ri peue un' kangkae ri Ui' na' ce."

²⁴ Hawc' tapae' eun Yo'han na' keutah ka ing' na', Yesu' Eun lah' peue cum heun' na' ce mhawng' lawng eun Yo'han na'. Eun lah', "Pe' ci' heul' nawk keunhaw' vang hk'oh'hk'oeng' na'? Heul' nawk pe' guil' puing' a maeew' a fuii'fai' na' aw? ²⁵ A'ko', pe' ci' heul' nawk keunhaw'? Heul' nawk pe' peue cuip' hk'eung chak' hk'eung ngam na' ce aw? Uih', peue cuip' hk'eung ngos, hk'a' pon hk'a' lheu', yeuh pon yeuh lheu' na' ut' ce nang haw' eun hkun'haw'hkam' na'. ²⁶ A'ko', pe' ci' heul' nawk keunhaw'? Heul' nawk pe' peue suip leukah' Eun Peucawo' na' eun aw? Euh, heul' nawk pe' peue suip leukah' Eun Peucawo' na' eun yeut. Daecti kaw'n lheu' eun peue suip leukah' Eun Peucawo' na' eun. ²⁷ Yo'han meuh eun peue ku' tem' ri uin' ri nang htawm Seunga' na'. A lah' ri yeuhki' na', 'Kaw Ui' cus' peue caee ri eun heul' nanggal' Mi.

Kaw eun bai mhe' hk'a' Mi heul' nanggal.'†

* 7:22 7:22 I'saya' 35:5, 6; 61:1 † 7:27 7:27 Malahki' 3:1

²⁸ Uí' lah' a ri pé, 'Peue keut' lih neum beun' na' a hkuin' lae kue' nang keuting hk'ai' Yo'han eun saec' ti peue. Daecti peue aet' hk'ai' peue nang Kuing' Eun Peucawo' na' eun kaw'n' keuting hk'ai' Yo'han eun.' "

²⁹ Yam peue gawm'euc' maeé' peue cep' hkawn' na' pun ce ri mhawng' a na', ce lah' ku' yeuh Eun Peucawo' na' seumeu' cawp' nyawk' ka. Kopti meuh ce peue rap ri ti hk'a' cum' ri Yo'han eun na'. ³⁰ Daecti alo Eun Peucawo' pun peue Hparisae' maeé' peue yawng leukah' ritroe na', ce un' rap ri ti a. Ce un' rap ri ti hk'a' cum' ri Yo'han eun.

³¹ Yesu' Eun tang lah', "Kop awn' na, Uí' ci' kaw keutec peue cu aen' ce maeé' keunhaw'? Ce ci' seun' keunhaw'?"

³² Seun' ce kon' nyom ti cum mok' ri klawng puri nang keulas na'. Ce klawng ri lah',

'Ye saec' puing' pi' pun pé,
pé hkuin' cha ri.

Ye saec' lah' cai hpum' sui',
pé hkuin' yam.'

³³ Kopti Yo'han cawo' tuil' hk'a' cum' ing' eun, eun un' hk'asom', un' nyui leuum' pli' bui na', pé lah', 'Seuca' a lec eun.' ³⁴ Kon' ai' peue na' lih Eun, Eun hk'asom' na', pé lah', 'Eun meuh peue hk'a' pon hk'a' lheu', nyui leuum' pli' bui pon lheu', maeé' meuh a'mawo peue cep' hkawn' maeé' peue map' na' ce.' ³⁵ Daecti punta peuyha' cu'yi Eun Peucawo' na' cawp' ka na', peue rap ri ti peuyha' cu'yi Eun na' ce tuh' a hawc'."

Beun' map' lhuik' lamawn ri Yesu' Eun

³⁶ Peue Hparisae' na' klawng eun Yesu' Eun ing' som' pul maeé' ti. Yesu' Eun ku ing' lec nang nya eun peue Hparisae' na'. Eun mok' ri teul ri keunam hpuin' na'. ³⁷ Nang veng awn', a kue' beun' tawn yeuh ku' rai ti peue. Yam pun eun ri yawng Yesu' mok' Eun ri som' nang nya eun peue Hparisae' na', eun ti lamawn hom' seue' ri nang kong'

seumu ná' ing' ri Heun. ³⁸ Eun cawng ri yam hk'a'kui' Eun Yesu' mae' cung Eun ná'. Eun jam leuum' ngai' ri ná' ri cung Eun Yesu' ná'. Eun ot' a ri huik' ri, nghup' ri huit' a. Hawc' ko', eun pok lamawn hom' ná' ri ka.

³⁹ Yam ku' klawng Yesu' Eun peue Hparisae' ná' pun eun ri nyu a ná', eun kuit a nang hpum' ri, "Peue aen', Eun lawn meuh peue suip leukah' Eun Peucawo' ko', Eun ku ná' yawng beun' paic' Eun aen' eun ci' meuh a'nhaw'? Eun ci' meuh peue yeuh sa'nhaw'? Kopti meuh eun beun' map' ná'."

⁴⁰ Yesu' Eun lah' a ri heun, "Si'mon, kue' Ui' ku' kaw lah' ri mi."

Si'mon eun lah', "Seura', lah' a reu'."

⁴¹ Yesu' Eun lah', "Kue' a peue lal' peue. Ka ma leumuil ri cawo' leumuil ná' eun. Ku' ti peue ná' eun ma hpawn'pak' htaep'. Nang ti peue ná' eun ma hpawn'kul' htaep'.

⁴² Kopti un' laee lhum' ka ri sai' leumuil ma ri ná' gawm' lal' peue ri ná', cawo' leumuil awn' eun a'nuyat leumuil ma ka ná' hawc' gawm' lal' peue ka. Kop awn' na, a'nhaw' ci' ná' ca ri leumeus' eun heun' ri ka?"

⁴³ Si'mon eun top' a, "Kuit ui', ku' pun ri pon leumuil ma heun' ná' eun ná' ca ri leumeus' eun heun'."

Yesu' Eun tang lah', "Seun' ku' lah' mi ná' cawp' ka yeut."

⁴⁴ Hawc' ko', Yesu' Eun hpawt' ri keue' ri beun' awn' eun. Eun lah' a ri Si'mon eun, "Nyu mi beun' awn' eun aw? Yam ing' Ui' nang nya mi ná', mi hkuin' tuil' leuum' hkuc' cung ri Ui'. Daecti beun' aen' eun ko', jam eun ri hkuc' cung Ui' ri leuum' ngai' ri. Hawc' ko', eun ot' a ri huik' ri ná'. ⁴⁵ Mi hkuin' nghup' ri huit' Ui'. Daecti tang' neum la Ui' ri ing' lec nang nya ná', eun un' laee keului' nghup' ri huit' cung Ui' ná'. ⁴⁶ Mi hkuin' pok lamawn ri cing' Ui'. Daecti eun pok lamawn hom' ri cung Ui'. ⁴⁷ Kop awn' na, Ui' kaw lah' a ri mi. Kopti pun eun ri pon map' ri heun' ná', eun yeuh

hk'a' leumeus'keus ri heun' na' lih. Ku' pun ri pon map' leng na', eun leumeus' leng yeut."

⁴⁸ Hawc' ko', Yesu' Eun tang lah' a ri beun' awn' eun, "Map' mi na' ploé' a ri hawc'."

⁴⁹ Peue mok' ri som' maeé' Heun na' ce lah' a ri puri, "Peue cang ploé' map' aen' Eun, Eun ci' meuh a'nhaw'?"

⁵⁰ Yesu' Eun lah' a ri beun' awn' eun, "Kopti meuh a hk'a' yum' mi na', mi pun hk'a' htut lawtpon na' hawc'. Kuit nyawk' kuit sam'ran cumyen' ing' reu'."

8

Beun' hot' Yesu' Eun na' ce

¹ Hawc' awn' na, Yesu' Eun heul' ti veng hawc' ti veng, ti yung' hawc' ti yung'. Eun sangsawn' leukah' mun' ren'kawn lawng Kuing' Eun Peucawo' na'. Tapae' kul'leual' peue na' ce ku heul' maeé' Heun. ² Beun' ku' Yesu' ra Eun ri tec seuca' rai na' maeé' beun' ku' Yesu' bai' Eun peuyhat ce cuin na' ce ku hot' Eun heul' yeut. A ku meuh Mari' ku' klawng peue meuh peue veng Magadala' ku' Yesu' ra Eun ri tec seuca' a' res tu' lih hk'ai' heun na' eun. ³ A ku meuh Yo'hanna' beun' eun Hku'sa' cawo' roksa' hk'eung eun Herot', meuh Su'sana', meuh beun' seubu heun' peue na' ce. Ce lo' ku' kue' ri na' ce teum'kawm Yesu' Eun maeé' tapae' Eun na' ce.

Leukah' leupong' lawng peue puin' ku' seumal

⁴ Yam peue ti veng hawc' ti veng maeé' peue cum heun' na' ing' cu ce ri rot maeé' Yesu' Eun na', Eun lah' leukah' leupong' ri ce, ⁵ "Peue sang' mal' ti peue na' heul' puin' eun ku' seumal ri. Yam puin' eun ku' seumal na', ngon' a hk'uic' nang gon' hk'a'. Peue jap' buin a. Sim' peul' nang vawo na' a ku seut' ri hk'a a euc'. ⁶ Ngon' a hk'uic' nang tak seumu. Yam kaws ka na', kopti keute' na' un' cum ka na', a fit' hk'oh'. ⁷ Ngon' a hk'uic' nang tak kat'. Kopti kaws

a maeé bang' kat' na', bang' kat' na' a ghuim' a. ⁸ Ngon' a hk'ui'c' vang keute' ngeuo. Yam kaws ka na', a pli' lheu' ku' puin' ri na' tipak' pun."

Hawc' lah' Eun a yeuh keutit' na', Eun klawng ri lah', "Peue kue' yhuk' kaw leuceng na' leuceng a meulamlam ri reu'."

Vangdoh' ka leukah' leupong' na'

⁹ Tapae' na' ce mhaing' Eun, "Vangdoh' ka leukah' leupong' na' a ci' meuh keunhaw'?" ¹⁰ Eun top' a, "Lawng ka kuing' Eun Peucawo' ku' mo' ri geup' na' kaw pe' kue' ahkvang yawng a. Daecti peue seubu na' ce ko', Ui' kaw kah ri lah' leukah' leupong' na' ri ce palkoe punta kaw a seun' ku' lah' ri hk'a'nae htawm Seunga' na', 'Ce saec' keue', ce hkuin' nyu.

Ce saec' mhawng', ce hkuin' yawng a.*

Yesu' Eun lah' vangdoh' ka leukah' leupong' lawng peue puin' ku' seumal

¹¹ Vangdoh' ka leukah' leupong' na' ko', ku' seumal na' meuh a leukah' Eun Peucawo' na'. ¹² Ku' hk'ui'c' nang gon'hk'a' na' meuh a peue mhawng' leukah' na', daecti punta kaw ce un'yum' a, ce na' un' pun hk'a' htut lawtpon na', seuca' na' a ing' ti leukah' mun' awn' na lih hk'ai' hpum' ce na'. ¹³ Ku' hk'ui'c' nang tak seumu na' meuh a peue pun ri mhawng' leukah' na' ce ren'kawn rap ri ti a. Daecti kopti un' kue' a res na', ce yum' a ti cu hkao'. Yam hk'eup' ce hk'a' cop'long na', ce tang kleuc' hk'a' ri. ¹⁴ Ku' hk'ui'c' nang tak kat' na' meuh a peue pun ri mhawng' leukah' na', daecti yam a'yu im' ce pang bhen' keute' na', kopti ku' kuit nyhap' maeé hk'a' meuneum maeé hk'a' ren'kawn munkvaen na' ghuim' a ce na', ce un' cang keuting. ¹⁵ Ku' hk'ui'c' pang bhen' keute' ngeuo

* 8:10 8:10 I'saya' 6:9

na' meuh a peue pun ri mhawng' leukah' na', hawc' ko' ce roksa' a hk'a'naee hpum' seumeu' hpum' chak' ri na'. Hk'a'naee vang yeun'hkam na', ce pli'.

Tok' kaw' ngawl un' duing kuip a

¹⁶ A'nhaw' hkuin' duing tok' kaw' ngawl kuip a ri keutong', hkuin' duing uin' a ruim cong. Daecti peue ing' lec na' kaw ce nyu ceng' ka na', po a pang hpa'rang† na'. ¹⁷ Kopti ku' mo' ri na' a kaw pun ri tuh' ri. Ku' kuip ri na' a kaw pun ri yawng ri. A kaw pun ri ti ri ing' vang ceng' na'. ¹⁸ Kop awn' na, ku' pun pe' ri mhawng' na' leuceng a meulamlam ri. Kopti ku' kue' na' ce ko', kaw tang tuil' ce bae. Ku' un' kue' na' ce ko', kaw tang hue' ku' kuit ce ri kawn' kue' na' lih hk'ai' ce."

Ma Eun Yesu' ka mae' awng' me Eun na' ce

¹⁹ Yam awn' na, ma Eun Yesu' ka mae' awng' me Eun na' ce ing' ri Heun. Kopti peue na' heun' ce na', ce un' cang ing' ri Heun. ²⁰ Ngon' peue lah' a ri Yesu' Eun, "Ma Mi ka mae' awng' me Mi na' cawng ko' ce Mi hk'a'nok. Ce sum' nyu Mi."

²¹ Eun lah' a ri ce, "Peue mhawng' leukah' Eun Peucawo' leuceng ri ti a na' ce ko', meuh ce Ma Ui' mae' awng' me Ui'."

Yesu' kah Eun guil' na' yut' ti

²² A kue' ti seunyi, Yesu' Eun lec reu na' mae' tapae' ri na' ce. Eun lah' a ri ce, "E' tang glu na' heul' hk'a'teh' pawh." Hawc' ko', reu na' a heul'. ²³ Yam reu na' buih heul' ka na', Yesu' Eun pun ri it'. Yam awn' na, guil' lomleng na' a puing' glu na', leuum' na' a baet ti kaw nuk reu na'. Ce kaw hk'aws' pun ri lu.

† 8:16 8:16 Vangdoh' ka hpa'rang na' meuh a vang pang kaw' ngawl.

²⁴ Tapae' Eun na' ce ing' sawl' Eun. Ce lah', "Cawo', Cawo', kaw e' hk'aws' cum' cawn." Yesu' Eun kuh' kah guil' na' mae' ba leuum' na' yut' ti. A ku keulawn' dit' ti yen' ku ceu ka. ²⁵ Hawc' ko', Yesu' Eun lah' a ri ce, "Hk'a' yum' pe' na' a ci' kue' tawngnhaw'?"

Ce lhat', ce am'. Ce mhaing' puri, "Hkawn' Eun ci' meuh a'nhaw'? Eun tuil' leukah' ri guil' mae' leuum' na' a ku vae' leuceng leukah' Eun na'."

Yesu' bai' Eun peue seuca' lec na' eun cuin

²⁶ Reu ce na' a heul' rot nang kuing' Gerasa'. Kuing' Gerasa' na' a ring kuing' Galilae' na'. ²⁷ Yam Yesu' huk' Eun vang meuh bhen' keute' na', peue seuca' lec ut' nang veng na' eun ing' ri Heun. Peue awn' eun un' laee cuip' hk'eung, un' laee ut' nang nya ling' hawc'. Daecti eun ut' nang keutui' leumuic na'. ²⁸ Yam nyu eun Yesu' Eun na', eun klawng seng' laws'. Eun nghup' ri keunam cung Eun Yesu' na'. Eun ta'ul' ri lah', "Yesu', Kon' ai' Eun Peucawo' Cawo' lhung' hk'ai' peue na' Mi, Mi ci' ing' lo' keunhaw' ri ui'? Kaw ui' hk'o' a ri Mi, pawlaee keunhap' nokneh ui'." ²⁹ A lah' a yeuh keutit' na', kopti Yesu' kah Eun seuca' rai na' lih hk'ai' heun. Nanggal' aen' na, kopti seuca' awn' jhawp' ka eun heun' pok na', peue saec' hk'awng' eun, mawt ti' cung eun na' ri mu' lhec', ko' kawn eun, daecti eun peut' mu' lhec' na' deut. Seuca' awn' na, a val eun heul' nang vang hk'oh' hk'oeng' na'.

³⁰ Yesu' Eun mhaing' eun, "Mi ci' muis keunhaw'?"

Eun top' a, "Muis ui' Cum." Kopti seuca' na' ut' a hk'a' naee eun heun' nyawk' na'. ³¹ A hk'o' hk'ang Yesu' Eun un' kah ri heul' nang puin ka keutong' nyarok na'.

³² Teh' na', a kue' lic cum keuting ti cum a saee eo' ri pang gong na'. Yam seuca' na' hk'o' a ri heul' lec lic awn' a na', Eun ku tuil' ahkvang ka. ³³ Kop awn' na, seuca' na' a

pucti lih hk'ai' peue awn' eun. Hawc' a heul' lec lic na', lic cum keuting na' a yawt' ti lec leuang' na'. A hk'uic' cum' yeum nang glu na' gawm'euc'.

³⁴ Yam peue go' lic na' pun ce ri nyu a na', ce hk'uih ing' eo' ri lah' ris peue mhawng' lawng awn' na nang veng nang yung' na' hk'awp'. ³⁵ Peue heun' na' ce heul' nawk ku' meuh na'. Yam heul' rot ce mae' Yesu' Eun na', ce pun ri nyu seuca' na' puc a ri lih hk'ai' peue awn' eun. Eun mok' keunam cung Eun Yesu' na'. Eun cuip' hk'eung ri. Eun tang pawn kui' ri. Ce lhat' nyawk'. ³⁶ Peue pun ri nyu a na' ce ris peue heun' na' ce mhawng' lawng eun peue seuca' lec na' eun ci' cuin yeuh sa'nhaw'. ³⁷ Kopti peue ut' nang kuing' Gerasa' na' lhat' nyawk' ce gawm'euc' ri na', ce hk'o' Yesu' Eun pucti heul' hk'ai' ti. Kop awn' na, Yesu' Eun lec reu na' keutah ing'.

³⁸ Peue seuca' lih a hk'ai' heun na' eun hk'o' ri hot' Yesu' Eun. Daecti Yesu' Eun lah' a ri heun, ³⁹ "Peucawo' Eun ci' teum'kawm mi yeuh sa'nhaw' na', ing' ris a ti nya reu." Kop awn' na, eun ku pucti heul' eo' ris peue mhawng' lawng Yesu' Eun ci' yeuh pun eun a'ngeng na' hk'awp' veng na'.

Kon' nyom beun' yeum mae' beun' nham' lih

⁴⁰ Yam Yesu' tang ing' rot Eun na', peue cum heun' na' ce ren'kawn rap ri ti Eun, kopti keutui' hpum' ko' ce Eun na'. ⁴¹ Ro' ka sa'la vang hk'o' mun' muis Yai'ras' na' eun ing' nghup' ri mae' cung Eun Yesu' na'. Eun hk'o' hk'ang Yesu' Eun ing' ti nya ri. ⁴² Kopti kue' eun kon' beun' ti peue. A'yu eun a pun kul'leual' neum. Eun kaw yeum.

Yam Yesu' buih heul' Eun na', peue cum heun' na' ce tawk' net Eun heul'. ⁴³ Teh' na', a kue' beun' nham' lih pun kul'leual' neum ti peue. A hkuin' kue' peue bai' eun cuin. ⁴⁴ Eun ing' paic' duing' hk'a'kui' ka hk'o' Eun Yesu' na', nham' lih hk'ai' heun na' a keulawn' yat'.

⁴⁵ Yesú Eun mhaing' ce, "A'nhaw' cí paic' Uí'?"

Yam peue heun' ná' lah' ce ri un' paic' Eun ná', Petru' eun lah', "Cawó', peue cum heun' ná' buih tawk' net cheun' ce Mi ceu."

⁴⁶ Daecti Yesú Eun tang lah', "Kue' a peue paic' Uí'. Kopti yawng Uí' tí'ca ri ná' puc a ri lih hk'aií Uí' ná'."

⁴⁷ Yam beun' awn' yawng eun kaw a un' cang mó' ri ná', eun lhat' keuyuing' ruing ing' nghup' ri nanggal' Eun Yesú ná'. Eun cí paic' Yesú Eun kop keunhaw' ná' maeé' eun cí keulawn' cuin yeuh sá'nhaw' ná', eun lah' a ri Yesú Eun nanggal' ce peue cum heun' ná'. ⁴⁸ Yesú Eun lah' a ri heun, "Kon' beun' Uí', kopti meuh a hk'a' yum' mi ná', a yeuh mi cuin hawc'. Kuit nyawk' kuit sam'ran ing' reu'."

⁴⁹ Yam Yesú buih lah' Eun a yeuh keutit' ná', peue heul' neum nya eun ró' ka sála vang hk'ó' mun' ná' eun heul' lah' a ri Yai'ras' eun. Eun lah', "Kon' beun' mi ná' yeum eun hawc'. Pawlaee suksak seura' Eun baeé'."

⁵⁰ Yam Yesú mhawng' Eun leukah' awn' na, Eun lah' a ri Yai'ras' eun, "Pawlaee lhat', yum' palkoe. Kon' beun' mi ná' kaw eun cuin yeut."

⁵¹ Yam Yesú ing' rot Eun ti nya eun Yai'ras' ná', a lawn un' meuh Petru', Yo'han, Yakop' ná' ce maeé' makuiing' eun kon' nyom ná' ka koe kó', Eun hkuin' kah a'nhaw' ing' lec nya ná' saec' ti peue. ⁵² Yam awn' na, kopti meuh a kon' beun' awn' eun, peue nu' nuk' ri tá'ul' ri yam gawm'euc' ti. † Yesú Eun lah', "Pawlaee yam. Un' yeum eun, gup kaw' it' eun."

⁵³ Kopti yawng ce kon' beun' awn' yeum neum eun ná', ce keunyas Yesú Eun. ⁵⁴ Yesú Eun jhawp' tí' eun kon' beun' awn' na, Eun lah', "Kon' beun', kuh' reu'." ⁵⁵ Civit eun ná' a ku ing', eun keulawn' kuh'. Yesú Eun kah ce tuil' eun hk'a' ku' hk'a'. ⁵⁶ Makuiing' eun kon' nyom ná' ka am'

† 8:52 8:52 Yam peue Yu'da ná' yeum ce, ec'awng' ná' ce nu' nuk' ri yam.

nyawk'. Daecti Yesu' Eun un' kah ka lah' a'nhaw' mhawng' lawng aen' na.

9

Yesu' cus' Eun tapae' kul'leual' peue na' ce pucti heul'

¹ Yesu' klawng Eun ri cu tapae' kul'leual' peue ri na' ce. Hawc' ko', Eun tuil' ti'ca ra ri tec seuca' gawm'euc' na' mae' ti'ca bai' peue peuyhat cuin na' ri ce. ² Eun cus' ce pucti heul' sangsawn' lawng kuing' Eun Peucawo' na', kah ce bai' peue peuyhat na' ce cuin. ³ Eun lah' a ri ce, "Pawlaee pin' keunhaw' pun hk'a' heul' pe' na'. Hku'ji un' lah', huil' un' lah', ku' hk'a un' lah', paec un' lah', hk'o na' lheu' ti hpuin' na' pawlaee pin' a heul'. ⁴ Pe' lawn lec nang nya nangnhaw' ko', ut' nang nya awn' na rot ti heul' pe' hk'ai' veng awn' na. ⁵ Peue lawn un' rap ri ti pe' ko', yam puc pe' ri heul' hk'ai' veng awn' a na', punta kaw a meuh sa'hki' Peucawo' kaw Eun ciyang ce na', raws' ri tec peuluing pit dak cung pe' na' reu'." ⁶ Kop awn' na, tapae' na' ce pucti heul' sangsawn' leukah' mun' ren'kawn na'. Ce bai' peue peuyhat na' ce cuin ku duih' ku yung'.

⁷ Yam Herot' cawo' u'peung kuing' na' pun eun ri mhawng' lawng aen' ce gawm'euc' na', eun kuit un' doh' nyawk'. Kopti ngon' lah' peue Yo'han eun yeum, eun tang kuh' im' na'. ⁸ Ngon' peue lah' E'li'ya eun tang pucti. Ngon' peue lah' peue suip leukah' Eun Peucawo' leumah' ti ri peue na' tang kuh' im' eun. ⁹ Herot' eun lah', "Reng' ui' ngok eun Yo'han hawc'. Kop awn' na pun ui' ri mhawng' lawng ku' yeuh keutit' na', peue aen' eun ci' na' meuh a'nhaw'?" Hawc' ko', eun sok ri kaw nyu Yesu' Eun.

Yesu' tuil' Eun peue hpawn'heng' na' ce som'

¹⁰ Yam peue caee Eun Yesu' na' tang ing' rot ce na', ce ing' ris Yesu' Eun mhawng' lawng ku' yeuh ri na' ce. Hawc'

Eun va ce heul' koe nang veng Betsai'da' na'. ¹¹ Daecti yam peue heun' na' yawng ce a, ce hot' Yesu' Eun heul'. Eun rap ri ti ce. Eun sangsawn' ce ri lawng kuing' Eun Peucawo' na'. Ku' htuk' ri bai' ri na' ce, Eun ku bai' ce cuin.

¹² Yam hk'a' pul ka na', tapae' kul'leual' peue na' ce ing' ri Heun. Ce lah', "Kah peue heun' aen' ce heul' sok vang it' vang som' nang yung' nang pang' keunam caona' na' ce reu'. Maen' na' kopti meuh a vang hk'oh' hk'oeng' na'."

¹³ Daecti Eun lah' a ri ce, "Pe' ri tuil' ce som' reu'."

Ce tang lah' a ri Heun, "E' lawn un' heul' leuvaee ku' hk'a' pun peue heun' na' ce ko', gup kue' e' hkawomun' hpawn' meul' mae' ka' lal' tu'." ¹⁴ (Kopti me na' ce palkoe, kue' ce hk'ao hpawn'heng' peue.)

Daecti Yesu' Eun lah' a ri tapae' ri na' ce, "Gvah peue aen' ce mok' meuh cum, meuh cum ri hk'ao hpawn'kul' peue reu'." ¹⁵ Tapae' na' ce ku yeuh a seun' awn' na. Hawc' ko', ce mok' gawm'euc' ri. ¹⁶ Hawc' Yesu' Eun ti hkawomun' hpawn' meul' mae' ka' lal' tu' awn' a na', Eun mung' ma' na', Eun mun' keuting ri Peucawo' Eun. Eun ves ri tuil' a ri tapae' na' ce. Eun kah ce eo' tuil' a ri peue cum heun' na' ce. ¹⁷ Na' peue pun ri hk'a' ri sak' gawm'euc' ri ko', tapae' na' ce seut' ku' hk'a' lheu' na' a pun kul'leual' teng' nuk.

Petru' rap eun ri ti Yesu' meuh Eun Hkrit

¹⁸ Yam Yesu' hk'o' Eun mun' koe mae' tapae' ri ce na', Yesu' Eun mhaing' tapae' na' ce, "Peue heun' na' ce ci' lah' Ui' meuh a'nhaw'?"

¹⁹ Ce top' a, "Ngon' lah' peue Mi meuh Yo'han cawo' tuil' hk'a' cum' na' eun. Ngon' peue lah' Mi meuh E'li'ya eun. Ngon' peue lah' Mi meuh peue suip leukah' Eun Peucawo' leumah' ti ri peue eun tang kuh' im'."

²⁰ Yesu' Eun mhaing' ce, "Pe' ri sae, pe' ci' lah' Ui' meuh a'nhaw'?"

Petru' eun top' a, "Meuh Mi Hkrit Eun Peucawo'."

Yesu' lah' Eun lawng kaw ri pun ri yeum

²¹ Eun deun' ce ri leukah' reng, Eun un' kah ce ris lawng aen' a ri peue. ²² Hawc' ko', Eun lah', "Kon' ai' peue na' kaw Eun pun ri hkam' ku' tukhka na' heun' ceu. Nang kawt, ro' peue jhawp' rit mae' peue guil leukah' ritroe na' ce kaw un' rap ri ti Eun. Eun kaw pun ri hkam' toh peue ri. Loe' seunyi ti seunyi na', Eun na' tang kuh' im'."

²³ Hawc' ko', Eun lah' a ri ce gawm'euc' ce, "A'nhaw' lawn sum' hot' Ui' ko', eun kaw pun ri tec alo ri, klawm' kleum' rawng'tawp' ri na' keuyuit. Hawc' ko' hot' Ui' heul'.

²⁴ Kopti a'nhaw' lawn sum' a'yu pon ko', eun kaw pun ri sum' a'yu ri. Daecti a'nhaw' lawn sum' a'yu ri na' pun Ui' ko', eun kaw pun a'yu pon. ²⁵ Kopti saec' meuh a'nhaw', eun saec' na' pun ku' kue' pang bhen' keute' na' meuh is' ti gawm'euc' ka na', daecti a'yu eun na' a lawn sum' ko', a ci' kaw kue' mun' keunhaw' pun eun? ²⁶ Kopti a'nhaw' lawn kaic ri Ui' mae' leukah' Ui' na' ko', yam Kon' ai' peue na' lih Eun mae' munhpung' ri mae' munhpung' Eun A'kuing' mae' munhpung' ce in'hpom seunga' chak' na', Eun kaw kaic ri peue awn' eun. ²⁷ Kaw Ui' lah' a ri pe' neumneum, peue cawng maen' na' ce ngon' nanggal' yam un' nang yeum ce na', ce kaw pun ri nyu kuing' Eun Peucawo' na'."

Yesu' plin' Eun rup ri

²⁸ Hawc' Yesu' lah' Eun a yeuh keutit' na', a pun hk'ao seudi' seunyi na'. Eun va Petru', Yo'han mae' Yakop' ce huk' hk'o' mun' pang gong na'. ²⁹ Yam buih hk'o' Eun mun' na', buh Eun na' a plin' rup ri. Hk'eung Eun na' a ceng' seungung seun' ceng' cak'cal' na'. ³⁰ A kue' me lal' peue, a meuh Mo'se eun mae' E'li'ya eun. ³¹ Ka pucti hk'a'nae' munhpung' ka kuing' pang ma' na', ka u Yesu' Eun. Ce u lawng Yesu' kaw Eun yeum na'. Eun kaw yeuh alo Eun Peucawo' na' htonnuk nang veng Yeru'salaem na'.

³² Petru' eun mae' a' mawo eun na' ka, ce it' jing' nyawk'. Daecti yam tang hk'awn' ce meulamlam ri na', ce pun ri nyu munhpung' Eun Yesu' na' mae' peue cawng keunam Eun la' peue na' ka. ³³ Yam peue la' peue awn' kaw ka gah' hk'ai' Yesu' Eun na', Petru' eun lah' a ri Yesu' Eun, "Cawo', ut' e' maen' na' chak' ka. Pawh, e' na' pleng' tup' loe' lhang', pun Mi ti lhang', pun Mo'se ti lhang', pun E'li'ya ti lhang'." (Eun un' yawng ku' lah' ri na' meuh a keunhaw'.)

³⁴ Yam buih leukah' eun na', putum' na' a lih ghuim' ce. Yam ut' ce hk'a'naee putum' na', ce lhat' nyawk'. ³⁵ A kue' seng' laws' lih neum putum' na', "Peue aen' meuh Eun Kon' ai' leuk Ui' ri ti. Leuceng ri ti leukah' Eun na' reu'."

³⁶ Yam seng' na' hawc' ka na', ce nyu Yesu' Eun ti peue koe. Tapae' na' ce uin' lawng aen' a nang hpum' ri koe. Hk'a'naee meuyam awn' na, ce un' lah' a'nhaw' mhawng' ku' nyu ri na' saec' ti peue.

Yesu' bai' Eun kon' nyom me seuca' rai a lec eun

³⁷ Hawc' ka na' ti seunyi yam lih ce neum pang gong na', peue cum heun' na' ce ing' ri Yesu' Eun. ³⁸ Hk'a'naee peue cum heun' awn' ce, a kue' a'ta' ti peue. Eun klawng ri lah', "Seura', kaw ui' hk'o' Mi ing' nawk kon' me ui' na' eun, kopti meuh eun kon' ti peue ui'. ³⁹ Seuca' na' lec ka eun, eun keulawn' aec' rak. A yeuh eun to'tet' raws' ri, baikeutam' na' a ru' ri lih hk'ai' moeng eun na'. Seuca' na' a un' chae' pucti heul' hk'ai' heun. A gawm yeuh eun lu. ⁴⁰ Hk'o' ui' tapae' Mi na' ce ra ri tec seuca' awn' a yeut, daecti ce yeuh un' pun a."

⁴¹ Yesu' Eun lah', "Peue un' kue' hk'a' yum' cu aen' pe', Ui' ci' kawn' kaw ut' ling' mae' pe' a'neng? Ui' ci' kawn' kaw yeun' hkam pun pe' a'neng? Va kon' mi na' eun ing' maen' reu'." ⁴² Saec' meuh yam kon' nyom awn' buih ing' eun na', seuca' na' a yeuh eun cung' kus to'tet' raws' ri pang

keute' na'. Daecti Yesu' Eun is' seuca' rai na'. Eun bai' kon' nyom na' eun cuin. Hawc' ko', Eun tang ap eun ri kuiing' eun na' eun. ⁴³ Peue gawm'euc' na' ce am' ri ti'ca keuting lhung' Eun Peucawo' na'.

Yesu' tang lah' Eun lawng kaw ri pun ri yeum na'

Yam peue heun' na' buih am' ce ri lawng ku' yeuh Eun Yesu' na', Eun lah' a ri tapae' ri na' ce, ⁴⁴ "Leuceng ri pawn leukah' kaw Ui' lah' ri pe' na' meulamlam ri reu'. Kon' ai' peue na' kaw peue fuin ri ap Eun nang ti' peue." ⁴⁵ Daecti ce un' ceng' ri leukah' awn' na, kopti punta kaw ce un' ceng' ri leukah' na', a lah' geup' ri ri ce. Daecti ce un' hat' ri mhaing' Eun ri lawng ka na'.

A'nhaw' ci' kaw keuting hk'ai' peue?

⁴⁶ Tapae' na' htuh'ting' ce puri kop lawng a'nhaw' ci' kaw keuting hk'ai' peue. ⁴⁷ Kopti Yesu' yawng Eun ku' kuit ce nang hpum' ri na', Eun ti kon' nyom ing' uin' eun cawng mae' ti ti peue. ⁴⁸ Hawc' ko', Eun lah' a ri ce, "A'nhaw' lawn rap ri ti kon' nyom aen' eun hk'a'naee muis Ui' na' ko', eun ku rap ri ti Ui' yeut. A'nhaw' lawn rap ri ti Ui' ko', eun ku rap ri ti Cawo' ku' cus' Ui' lih na' Eun yeut. Kopti ku' meuh peue aet' hk'ai' peue ri pe' na' eun, meuh eun peue keuting hk'ai' peue."

Peue un' hkat'hkan pe' na' meuh ce hk'a' pe'

⁴⁹ Yo'han eun lah', "Cawo', nyu ye peue ti peue eun ra ri tec seuca' hk'a'naee muis Mi na'. Kopti un' meuh eun cum ye na', ye ham' eun."

⁵⁰ Yesu' Eun lah', "Pawlade ham' eun, kopti peue un' hkat'hkan pe' na' meuh ce hk'a' pe'."

Peue yung' Samari' ti yung' na' un' rap ce ri ti Yesu' Eun

⁵¹ Yam kaw a hk'aws' rot yam Yesu' kaw Eun pun hk'a' yuk ri huk' nang kuing' pang mao' na', Eun kaw huk' nang

veng Yeru'salaem na' Eun kuit a deut. ⁵² Eun kah peue ri na' ce bai heul' nanggal'. Punta kaw ce rangraen pun Yesu' Eun na', ce heul' lec yung' ce peue Samari' ti yung' na'. ⁵³ Daecti peue awn' ce un' rap ri ti Yesu' Eun, kopti kaw Eun caw ri huk' nang veng Yeru'salaem na'. ⁵⁴ Ku' meuh tapae' Yesu' muis Yakop' mae' Yo'han na' yam pun ka ri nyu yeuh a keutit' na', ka lah', "Cawo', lak' sum' kah Mi ya na' kah ngawl a lih neum kuing' pang mao' a na' hk'ue ce aw?" ⁵⁵ Daecti Yesu' Eun hpawt' ti keue' ri ka, Eun is' ka. ⁵⁶ Hawc' ko', ce tang heul' hk'a' yung' tawk seubu na'.

Peue sum' hot' Yesu' Eun na' ce

⁵⁷ Yam buih heul' ce lang' hk'a' na', ku' ti peue na' eun lah' a ri Yesu' Eun, "Mi saec' heul' tawngnhaw', kaw ui' hot' Mi heul' yeut."

⁵⁸ Yesu' Eun top' a, "So' hk'i na' kue' a keutui'. Saec' meuh sim' peul' nang vawo na' a ku kue' han'. Daecti Kon' ai' peue na' Eun ko', Eun un' kue' vang uin' cing'."

⁵⁹ Yesu' Eun tang lah' a ri ku' seubu ti peue na' eun, "Hot' Ui' reu'." Daecti eun top' a, "Cawo', hk'o' Mi kah ui' ing' puing' kuiing' ui' eun nanggal'."

⁶⁰ Yesu' Eun lah' a ri heun, "Peue yeum na' kah ce puing' puri meun reu'. Daecti mi ri ko', mi na' heul' lah' lawng kuing' Eun Peucawo' na' reu'."

⁶¹ Ku' seubu ti peue na' eun tang lah', "Cawo', kaw ui' hot' Mi yeut, daecti hk'o' Mi kah ui' ing' tawm' peue nya ri na' ce nanggal'."

⁶² Yesu' Eun lah', "Peue jhawp' kan htaee' hpawt' ti keue' hk'a' kui' ri na' ce ko', un' kuing' ce ri yeuh kan' pun kuing' Eun Peucawo' na'."

10

Yesu' kah Eun tapae' a' reskul' lal' peue na' ce heul'

¹ Hawc' awn' na, Yesu' Eun leuk tapae' seubu bae a'reskul' la' peue. Eun kah ce bai heul' nanggal' ri duih' ka la' peue ku veng ku yung' vang kaw Eun heul' na'. ² Eun lah' a ri ce, "Ngho' hk'o' vuic na' kue' ka heun', daecti peue vuic ngho' na' ce leng. Kop awn' na, punta kaw Eun cus' peue vuic ngho' na' ce heul' ri vang vuic ngho' na', hk'o' a ri Cawo' ce peue vuic ngho' na' Eun reu'. ³ Heul' reu', cus' Ui' pe' heul' seun' kon'yung' heul' hk'a'naee mhu' ka ruk na'. ⁴ Pawlaee pin' tep paec, huil', mae' jhaep'. Pawlaee leukah' mae' peue hot' hk'a'.

⁵ Yam kaw pe' lec nya nangnhaw' na', pe' na' lah' a yeuh keutit' nanggal', 'Kah hk'a' kuit nyawk' kuit sam'ran cumyen' na' kue' hk'a'naee nya aen' na reu'. ⁶ A lawn kue' peue leumeus' hk'a' kuit nyawk' kuit sam'ran cumyen' ut' mawn' ko', hk'a' kuit nyawk' kuit sam'ran cumyen' pe' na' kaw a ut' mae' heun. A lawn un' kue' ko', hk'a' kuit nyawk' kuit sam'ran cumyen' na' a kaw tang ing' ri pe'. ⁷ Ut' hk'a'naee nya awn' na, hk'a' ku' hk'a' nghawm' ce pe' hk'a' na' yeut, kopti peue yeuh kan' na' htuk' eun ri pun ngos reng ri. Pawlaee do ri heul' ti nya hawc' ti nya.

⁸ Yam lec pe' veng nangnhaw', ce lawn rap ri ti pe' ko', hk'a' ku' hk'a' bang' ce ri pe' na' reu'. ⁹ Bai' peue peuyhat ut' mawn' na' ce cuin yeut. Lah' a ri ce yeuh keutit', 'Kuing' Eun Peucawo' na' ut' a keunam pe' hawc'. ¹⁰ Daecti yam lec pe' veng nangnhaw' na', ce lawn un' rap ri ti pe' ko', pucti heul' lah' a nang gon' hk'a' na' yeuh keutit', ¹¹ 'Saec' meuh peuluing nang veng pe' pit dak cung ye na', ye kaw goh' ri hk'ah' a meuh het' kaw pe' pun hk'a' ciyang na'. Daecti htuk' pe' ri yawng kuing' Eun Peucawo' na' ut' a keunam pe' hawc'. ¹² Lah' Ui' a ri pe', 'Hk'a'naee seunyi taws' a' mu na', a' mu ka veng So'dom na' a kaw'n' seuyung' hk'ai' a' mu ka veng awn' na.'

Veng un'yum' na'

¹³ Veng Hko'rasin, kaw mi pun ri hkam' hk'a' jha' na'. Saec' veng Betsai'da' na', mi ku kaw pun ri hkam' hk'a' jha' na' yeut. Kopti ku' hk'o'am' yeuh ri nang veng pa' na', a lawn yeuh ri nang veng Tai'ra' mae' veng Si'don na' ko', ce ku na' taws' hpum' fuin map' ri cuip' hk'eung htong'tai' mok' nang peuluing leumah' hawc' yeut. ¹⁴ Daecti hk'a'naee seunyi taws' a'mu na', a'mu ka veng Tai'ra' na' mae' veng Si'don na' a kawn' seuyung' hk'ai' a'mu pa' na'. ¹⁵ Veng Kapeni'um, kaw mi pun ri yuk ri huk' pang mao' aw? Uih', kaw mi pun ri hk'ui' lih nang keutong'nyarok na'.

¹⁶ Peue leuceng leukah' pe' na' leuceng ce leukah' Ui' yeut. Peue un' rap ri ti pe' na' ce ku un' rap ri ti Ui' ri yeut. Peue un' rap ri ti Ui' na' ce ku un' rap ri ti Cawo' ku' cus' Ui' lih na' Eun yeut."

Tapae' a'reskul' lal' peue na' tang ing' rot ce

¹⁷ Yam tapae' a'reskul' lal' peue na' ren'kawn ing' rot ce na', ce lah', "Cawo', kopti meuh a muis Mi na' seuca' na' ut' a hk'a'ruim ye yeut."

¹⁸ Yesu' Eun top' a ri ce, "Pun Ui' ri nyu Satan na' hk'ui' a lih neum kuing' pang mao' seun' cak'cal' na'. ¹⁹ Tuil' Ui' ti'ca jap'buin seueueng' na' mae' keutam'tim' na', mae' pe ti'ca ka ransu na' gawm'euc' ka ri pe'. Saec' meuh keunhaw' a kaw un' cang yeuh pe' sui'. ²⁰ A saec' yeuh sa'nhaw', pawlaee ren'kawn mae' seuca' na' ut' a hk'a'ruim pe'. Daecti ren'kawn mae' muis pe' na' tem' a ri nang kuing' pang mao' na' reu'."

Yesu' ren'kawn Eun

²¹ Yam awn' na, Yesu' Eun ren'kawn hk'a'naee Cit' seunga' chak' na'. Eun lah', "A'kuiing' Cawo' kuing' pang mao' mae' bhen' keute' na' Mi, Ui' suk' seun' Mi kopti mo'

Mi lawng aen' a ri peue kue' cu'yi na' ce mae' peue cang yawng na' ce. Daecti Mi tuil' kon' nyom na' ce nyu a. A'kuiing', aen' meuh a ku' htuk' hpum' Mi.

²² Kuiing' Ui' ap Eun ku ceu gawm'euc' na' ri Ui' hawc'. A lawn un' meuh A'kuiing' Eun ko', a'nhaw' hkuin' yawng Kon' ai' Eun saec' ti peue. A lawn un' meuh Kon' ai' Eun mae' ku' Kon' ai' sum' tuh' Eun peue yawng A'kuiing' Eun na', a'nhaw' hkuin' yawng A'kuiing' Eun saec' ti peue."

²³ Hawc' ko', Eun hpawt' ti keue' hk'a' ce tapae' ri na'. Eun lah' a ri ce koe, "Mun' keuting ri ngai' pun ri nyu seun' ku' nyu pe' na' reu'. ²⁴ Kaw Ui' lah' a ri pe', 'Peue suip leukah' Eun Peucawo' na' ce mae' hkun'haw' hkam' na' ce heun' peue ce saec' sum' nyu seun' ku' pun pe' ri nyu na', daecti ce hkuin' pun ri nyu a. Ce saec' sum' mhawng' seun' ku' pun pe' ri mhawng' na', daecti ce hkuin' pun ri mhawng' a.' "

Leukah' leupong' lawng Peue Samari' hpum' chak'

²⁵ Peue yawng leukah' ritroe ti peue na' sum' long eun ri nawk Yesu' Eun. Eun kuh' lah', "Seura', ui' ci' kaw kah ri yeuh sa'nhaw' ui' na' pun cit' tip a'yu tip cot'cu na'?"

²⁶ Yesu' Eun top' a, "Hk'a'naee leukah' ritroe na', a ci' tem' ri yeuh sa'nhaw'? Mi ci' lip ri yawng a yeuh sa'nhaw'?"

²⁷ Eun tang top' a, "Kaw mi kah ri leumeus' Peucawo' ri na' Eun sut' hpum' ri, sut' civit ri, sut' kaw' reng ri, sut' kamkuit ri na' gawm'euc' ka.* Leumeus' peue ut' keunam caona' mi na' ce seun' leumeus' mi tu' ri na' yeut."†

²⁸ Yesu' Eun lah', "Top' cawp' mi a yeut. Mi na' heul' yeuh seun' awn' na reu'. Mi kaw pun cit' civit im' na'."

* [10:27](#) [10:27](#) Sawn' leukah' mun' 6:5 † [10:27](#) [10:27](#) Fae' 19:18

²⁹ Daecti peue awn' kopti sum' tuh' eun meuh ri tu' leupaws seumeu' na', eun tang mhaing' Yesu' Eun, "Peue keunam caona' uí' na' ce cí' meuh a'nhaw'?"

³⁰ Yesu' Eun top' a, "Peue ti peue yam kuh' eun neum veng Yeru'salaem eun lih veng Yeri'hko' na', eun hk'eup' con'. Con' na' ce hpuic' ri tec hk'eung eun na'. Ce peum' eun daee yeum. Hawc' ko', ce hk'uih hk'ai' heun. ³¹ Peue jhawp' rit ti peue na' eun caw ri long hk'a' awn' na. Yam nyu eun peue sui' awn' eun na', eun vel ti plak' eun na' heul'. ³² Saec' meuh peue Levi' na' eun ku seun' awn' eun yeut. Yam heul' rot eun mawn', eun nyu peue sui' awn' eun na', eun vel ti plak' eun na' heul' yeut. ³³ Daecti peue Samari' na' eun long hk'a' awn' na, eun rot maeé' peue sui' awn' eun. Na' eun nyu eun, eun tukyak ri heun nyawk'. ³⁴ Eun heul' pok kop vang sui' eun na' ri lamawn maeé' leuum' plí' bui. Hawc' ko', eun yuk ri po peue awn' eun pang kui' ka rawngla ri na'. Eun va ri heul' roksa' eun nang nya chec' na'. ³⁵ Na' rot peunsa', eun hue' ri tuil' leumuil lal' htaep' ri peue roksa' nya chec' na' eun. Eun lah', 'Roksa' eun. Yam tang ing' uí' na', uí' kaw tang sai' ku' euc' mi na' lheu' awn' na.'

³⁶ Mi cí' kuit ku' loé' peue na' nangnhaw' eun meuh peue ut' keunam caona' eun peue hk'eup' con' na' eun?"

³⁷ Peue yawng leukah' ritroe na' eun top' a, "Meuh a ku' tukyak ri heun na' eun." Yesu' Eun lah' a ri heun, "Mi ku na' heul' yeuh seun' awn' na yeut."

Nang nya ka Mahta' maeé' Mari'

³⁸ Yam Yesu' long Eun hk'a' heul' maeé' tapae' ri na', ce lec nang yung' ti yung'. Beun' muis Mahta' na' eun rap ri ti Eun ing' ti nya ri. ³⁹ Beun' awn' eun kue' awng' ti peue. Eun muis Mari'. Mari' eun mok' ri leuceng leukah' Eun Cawo' Yesu' keunam cung Eun na'. ⁴⁰ Daecti Mahta' eun buih hpum' suksak ri kan' rangraen ku' hk'a ku' som' na'.

Eun ing' lah' a ri Yesu' Eun, "Cawo', awng' uí' na' uin' eun uí' yeuh kan' palkoe, un' kuit Mi a meuh keunhaw' aw? Lah' a ri heun, kah eun teum'kawm uí'."

⁴¹ Cawo' Eun top' a, "Mahta', Mahta', hki'keung kuit nyhap' mi ri heun' ceu. ⁴² Daecti ku' lo' na' kue' a ti ceu koe. Mari' leuk eun ri ti ku' chak' lheu' ku' chak' na' hawc'. Peue hkuin' kaw cang rutrim' ri ti a hk'ai' heun saec' ti peue."

11

Yesu' guil Eun lawng hk'o' mun'

¹ A kue' ti seunyi, Yesu' Eun buih hk'o' mun' ti duih'. Hawc' hk'o' Eun mun' na', tapae' ti peue na' eun ing' mhaing' Eun, "Cawo', guil ye ri hk'o' mun' seun' Yo'han guil eun tapae' ri na' ce yeut." ² Eun lah' a ri ce, "Yam hk'o' pe' mun' na', hk'o' a yeuhki' reu',

'A'kuiing',

kah muis Mi na' meuh ku' hkopyawm' yumyam'.

Kah kuing' Mi na' lih rot.

³ Tuil' ku' hk'a lo' ye na' ri ye keuyuit.

⁴ Ploe' map' ye na',

kopti ye ku ploé' map' ce peue yeuh ku' kleuc' ri ye na' ce ku peue.

Pawlae va ye lec hk'a'naee hk'a' cop'long na'.' "

⁵ Hawc' ko', Eun lah' a ri ce, "U'hpama ri, hk'a'naee pe' ri ti ri peue eun kue' a'mawo ti peue. Eun heul' lah' a ri heun yam nuik' ka na', 'A'mawo, hk'o' mi tuil' uí' keucan hkawomun' loe' meul'. ⁶ Kopti a'mawo uí' na' eo' eun ri eun caw ri rot ri uí' na', uí' un' kue' ku' kaw tuil' eun hk'a saec' ti ceu."

⁷ A'mawo ut' nang nya na' eun top' a, 'Pawlae suksak uí'. Sot uí' leuva' ri hawc'. Kon' nyom uí' na' it' ce mae' uí' vang it' hawc'. Uí' kaw un' cang kuh' tuil' mi is' keunhaw'.

⁸ Kaw Uí lah' a ri pé, eun saec' un' kuh' tuil' hkawomun' kopti meuh eun á'mawo eun ná, daecti kopti á'mawo eun ná sae'caee' eun hk'o' ri ná, eun kaw kuh' tuil' ku' lo' eun á'mawo ri ná.

⁹ Kop awn' na kaw Uí lah' a ri pé, 'Hk'o' reu', kaw pé pun. Sok reu', kaw pé nyu. Kloh leuva' ná reu', a kaw dah' pun pé. ¹⁰ Kopti peue hk'o' ná ce ku peue kaw ce pun. Peue sok ná ce ku peue kaw ce nyu. Peue kloh leuva' ná ce ku peue a kaw dah' pun ce yeut.'

¹¹ Hk'a'naee pé ri ku' meuh á'kuing' ná, kon' pé ná eun lawn hk'o' ka' ko', kaw pé tuil' seueueng'* ri heun aw?" ¹² A'ko' eun lawn hk'o' keutawm' ko', kaw pé tuil' keutam'tim' ri heun aw? ¹³ Pé saec' ná meuh peue rai ko', pé yawng ri tuil' ku' chak' ná ri kon' ri ná ce yeut. Lheú awn' na, Kuing' pé Cawó ut' nang kuing' pang maó ná Eun jaen kaw tuil' Cit' seungá chak' ri peue hk'o' ná ce ku peue ri.

Yesu' Eun mae' Be'el'sebu'

¹⁴ Yesu' buih ra Eun ri tec seuca' nga' ná. Yam seuca' ná puc a ri lih ná, peue un' cang leukah' awn' eun tang cang leukah'. Peue heun' ná ce am'. ¹⁵ Daecti ngon' ce lah', "Peue awn', cu Eun tí'ca ka cawó seuca' Be'el'sebu' ná Eun ra ri tec seuca' ná." ¹⁶ Peue seubu' ná ce sum' long ri nawk Eun. Ce hk'o' Eun yeuh het' keuting lih neum kuing' pang maó ná.

¹⁷ Yesu' Eun yawng ku' kuit ce ná, Eun lah' a ri ce, "Kuing' ces ri puri meun ku kuing' ná a kaw lulaic. Nyahk'ul' ces ri puri ná a kaw gluh. ¹⁸ Seuca' ná a lawn ces ri puri meun ko', kuing' ce ná a cí kaw cang keutawn' yeuh sa'nhaw'? Lah' Uí a yeuh keutit' ná kopti lah' pé Uí puing Be'el'sebu' ná Uí ra ri tec seuca' ná. ¹⁹ Uí lawn

* **11:11** 11:11 Peue Yu'da ná un' hk'a ce keune seueueng'. Ce lawn hk'a a ko', a kleuc' ritroe ce.

puing Be'el'sebu' na' Ui' ra ri tec seuca' na' ko', tapae' pe' na' ce ci' na' puing a'nhaw' ce ra ri tec seuca' na'? Kop awn' na, kaw ce meuh nang taws' a'mu ri pe'. ²⁰ Daecti Ui' lawn puing geun' ti' Eun Peucawo' na' Ui' ra ri tec seuca' na' ce ko', kuing' Eun Peucawo' na' rot a mae'e' pe' hawc'.

²¹ Yam peue kaw'l'reng keuting na' kue' eun hk'eung an'nya htonnuk eun ko' kawn nya ri na', hk'eung eun na' a kaw plot'lon. ²² Daecti yam peue kaw'l'reng keuting hk'ai' heun na' eun lawn ing' tuik' ri pe eun ko', eun kaw ti hk'eung an'nya papuing eun na' heul'. Hawc' ko', eun ku na' gvah hk'eung rim' pun ri na' ri puri na' ce.

²³ Peue un' ut' hk'a' Ui' na' meuh ce ransu ri Ui'. Peue un' hk'on'ro mae'e' Ui' na' meuh ce peue taic'jah puin' ri tec.

Seuca' rai tang ing'

²⁴ Yam seuca' rai na' puc a ri lih hk'ai' peue na' eun na', a eo' sok vang kaw ri keului' nang vang hk'oh'hk'oeng' na'. Yam sok un' nyu ka vang kaw ri keului' na', a lah', 'Kaw ui' tang ing' ti nya vang puc ui' ri lih heul' na'. ²⁵ Yam ing' rot a ri vang ut' hk'im' ri na', a pun ri nyu nya awn' pis' hk'iu' a ri seunga'. ²⁶ Kop awn' na, a heul' klawng seuca' seubu rai hk'ai' ti a' res tu' na' ce ing' lec ri ut' mawn'. Vang tisut' ka na', peue awn' eun lulaic' lheu' hk'im'."

Taengtaeng ren'kawn neum

²⁷ Yam Yesu' buih lah' Eun a yeuh keutit' na', a kue' beun' ti peue eun klawng ri lah' seng' laws' nang peue cum heun' awn' ce, "Ma keut' Mi, uii' Mi na' kaw ka pun ri ren'kawn nyawk'."

²⁸ Yesu' Eun top' a, "Ren'kawn lheu' awn' a na' meuh a peue leuceng ri ti ri yeuh leukah' Eun Peucawo' na'."

Het' keuting eun Yo'na'

²⁹ Yam peue heun' na' gawm ut' gawm heun' ce na', Yesu' Eun lah', "Peue cu aen' meuh ce cat peue rai. Ce hk'o' het' keuting, daecti a lawn un' meuh yawo het' keuting eun Yo'na' na' ko', het' keuting seubu na' un' tuil' a ri ce saec' ti ceu. ³⁰ Kopti seun' Yo'na' meuh eun het' keuting pun peue veng Ni'nave na', saec' meuh Kon' ai' peue na' Eun ku meuh het' keuting pun ce peue cat aen' ce yeut. ³¹ Seunyi yam taws' a'mu na', nang'haw'hkam' kuing' hk'a'col na' ka kaw kuh' mae' peue cat aen' ce. Ka kaw taws' a'mu ri ce. Kopti punta kaw ka leuceng leukah' cu'yi eun Saw'lamon na', ka ing' neum vang lok na' sut' ka na'. Maet'maen', nang keuting hk'ai' Saw'lamon eun na' ut' Eun maen' hawc'. ³² Seunyi yam taws' a'mu na', peue veng Ni'nave na' ce ku kuh' mae' peue cat aen' ce. Ce kaw taws' a'mu ri ce. Kopti meuh a leukah' mun' sangsawn' eun Yo'na' na', peue veng Ni'nave na' ce taws' hpum' fuin map' ri. Maet'maen', nang keuting hk'ai' Yo'na' eun na' ut' Eun maen' hawc'."

Kawk' ngawl jawngkui' tu'

³³ "A'nhaw' hkuin' duing tok' kawk' ngawl uin' a vang geup', hkuin' duing kuip a ri teng' saec' ti peue. Daecti punta peue ing' lec na' kaw ce nyu ku' ceng' na', po a pang hpa'rang na'. ³⁴ Ngai' mi na' meuh a kawk' ngawl ka jawngkui' tu' mi na'. Ngai' mi na' a lawn chak' ko', gawm' jawngkui' tu' mi na' a ku kaw ceng' htonnuk. Daecti ngai' mi na' a lawn un' chak' ko', duim'lawng na' a kaw nuknhen' tu' mi na'. ³⁵ Kop awn' na, punta ku' ceng' kue' hk'a'nae mi na' kaw a un' cang meuh ku' duim'lawng na', uin' sati ri reu'. ³⁶ Gawm' tu' mi na' a lawn ceng' htonnuk ko', a un' lae kue' ku' duim'lawng saec' ti duih' ko', gawm' tu' mi na' a kaw ceng' meulamlam ri seun' kawk' ngawl til' a mi na'."

Ku' kuit nyhap' les ceu

³⁷ Yam Yesu' hawc' lah' Eun a na', peue Hparisae' na' eun klawng Yesu' Eun ing' som' mae' ti. Kop awn' na, Eun ing' mok' ri som' mae' hpuin' na'. ³⁸ Kopti peue Hparisae' na' nyu eun Yesu' un' hkuc' Eun ti' ri yam un' nang som' na', eun am' ri Heun.

³⁹ Cawo' Yesu' Eun lah' a ri heun, "Peue Hparisae' na' pe', hpak' pe' pal hk'a' nok ka paen' kaw' na', daecti hk'a' naee pe' na' hk'a' law' hpa na' mae' ku' rai na' a nuknhen' a. ⁴⁰ Peue nga' suisa na' pe', Peucawo' Cawo' hpanpleng' hk'a' nok na' Eun ku hpanpleng' hk'a' naee na', un' meuh ka aw'?

⁴¹ Daecti tuil' ku' kue' hk'a' naee paen' na' ri peue hk'o' tuckyak na' ce reu'. Pe' lawn yeuh keutit' ko', a kaw seunga' chak' pun pe' ku ceu.

⁴² Peue Hparisae' na' pe', kaw pe' pun ri hkam' hk'a' jha' na'. Kopti a' lhuing', in' hk'im na' mae' tui' lha' seungal na' ku ceu ka pe' tan a kul' pun ti pun ri Peucawo' Eun. Daecti hk'a' leupaws seumeu' mae' hk'a' leumeus' keus Eun Peucawo' na', pe' tecla a. Pe' htuk' ri yeuh ku' hk'a' nanggal' na', mae' ku' hk'a' kui' na' pe' htuk' ri un' tecla a.

⁴³ Peue Hparisae' na' pe', kaw pe' pun ri hkam' hk'a' jha' na'. Kopti pe' sum' mok' ri vang mok' a' ye' keuting hk'ai' peue hk'a' naee sa' la vang hk'o' mun' na' mae' sum' kah peue luisa ri nang keulas na'.

⁴⁴ Kaw pe' pun ri hkam' hk'a' jha' na'. Kopti seun' a meuh pe' leumuic un' laee kue' sa' hki' na'. Peue un' yawng meuh a leumuic, peue jap' buin hk'a' pang ka na' heul'."

⁴⁵ Yam awn' na, peue yawng leukah' ritroe ti peue na' eun lah', "Seura', lah' Mi ku' yeuhko' na' Mi ku lah' ku' un' nawpsang ri ye yeut'."

⁴⁶ Yesu' Eun lah', "Saec' meuh ku' yawng leukah' ritroe na' pe', kaw pe' pun ri hkam' hk'a' jha' na'. Kopti tuil' pe'

peue peus beus kaw peue un' pe na'. Daecti pe' ri, pal yawo geun' ti' pe' na' pe' un' cheun' a teum'kawm peue.

⁴⁷ Kaw pe' pun ri hkam' hk'a' jha' na'. Kopti go' pe' leumuic ce peue suip leukah' Eun Peucawo' ku' ceucat pe' toh ce leumah' na'. ⁴⁸ Kopti hkam' pe' sa'hki' kan' ku' yeuh ce ceucat ri na' a htuk' hpum' pe'. Ce toh peue suip leukah' Eun Peucawo' na', pe' go' leumuic ce na'. ⁴⁹ Kop awn' na, hk'a'naee leukah' peuyha' cu'yi Eun Peucawo' na' a lah' ri yeuh keutit', 'Kaw Ui' cus' peue suip leukah' Eun Peucawo' mae' peue caee na' ce heul' ri ce. Ngon' ce kaw toh ce, ngon' ce kaw keunhap' ce.' ⁵⁰ Kop awn' na, peue cat aen' ce kaw pun ri hkam' tuttam ka nham' peuc' ce peue suip leukah' Eun Peucawo' na' ce gawm'euc' tang' neum yam hpanpleng' bhen' keute' na'. ⁵¹ A meuh tang' neum nham' eun Abela' na' rot ti nham' eun Yahkari' ku' toh peue eun seuna' ka vang dum ri tan ku' tan mae' vang hk'o' mun' na'. Kaw Ui' lah' a ri pe', peue cat aen' ce kaw pun ri hkam' tuttam ka na' ku' ceu ka.

⁵² Peue yawng leukah' ritroe na' pe', kaw pe' pun ri hkam' hk'a' jha' na'. Kopti jhawp' pe' pakhkeucae' ka peuyha' cu'yi na' heul'. Tu' pe' na' a un' lec a, daecti pe' tang ham' peue buih lec a na' ce."

⁵³ Yam Yesu' puc Eun ri heul' neum mawn' na', peue Hparisae' na' ce mae' peue guil leukah' ritroe na' ce tang gawm to'tam' Eun. Ce mhaing' lawng heun' ceu na' ri Heun. ⁵⁴ Ce kawn ri kaw ko' ri ti Yesu' leukah' kleuc' Eun.

12

Uin' sati ri peue leukah' seungá hpum' vok' na' ce reu'

¹ Yam awn' na yam peue heun' heng' na' tawk' net chok'chec' ce puri ing' cu ri na', Yesu' Eun lah' a ri tapae' ri na' ce nanggal', "Uin' sati ri paeng ce peue Hparisae' na', meuh ce peue leukah' seungá hpum' vok'. ² Ku' kuip

ri na' a kaw pun ri tuh' ri. Ku' mo' ri na' a kaw pun ri yawng ri.* ³ Ku' lah' pe' nang duim' na' peue kaw pun ri mhawng' a vang ceng' na'. Ku' sop'sep' pe' ri lah' nang hkawng hk'a'nae na' kaw a pun ri pao' ri pang sebul nya na'.

Htuk' ri lhat' ri a'nhaw'?

⁴ A'mawo, kaw Ui' lah' a ri pe', pawlaee lhat' ri peue cang toh jawngkuí' tu' na' hawc' ce un' laee cang yeuh keunhaw' bae na'. ⁵ Daecti pe' cí' kaw htuk' ri lhat' ri a'nhaw' kaw Ui' lah' pe' mhawng' a, lhat' til ri Peucawo' toh jawngkuí' tu' hawc' Eun kue' tí'ca kaw nyon pe' hk'a'nae keutong'nyarok na' Eun reu'. ⁶ A'raic hpawn' tu' na' paing' a ri la' paec, un' meuh ka aw? A'raic awn' na Peucawo' Eun un' pil a saec' ti tu'. ⁷ Saec' meuh huik' cing' pe' na' ku nyeng ka, mhin' Eun a gawm'euc' hawc'. Pawlaee lhat', ngos heun' pe' hk'ai' a'raic heun' tu' na' ce.

Rap ri ti Yesu' Eun nanggal' peue

⁸ Kaw Ui' lah' a ri pe', a'nhaw' lawn lah' ri rap ri ti Ui' nanggal' to' nha' ce peue na' ko', Kon' ai' peue Eun ku kaw lah' ri rap ri ti eun nanggal' to' nha' ce in' hpom Eun Peucawo' na' yeut. ⁹ Daecti a'nhaw' lawn lah' ri un' yawng Ui' nanggal' to' nha' ce peue na' ko', Kon' ai' peue Eun ku kaw lah' ri un' yawng eun nanggal' to' nha' ce in' hpom Eun Peucawo' na' yeut. ¹⁰ A'nhaw' lawn lah' kleuc' ri Kon' ai' peue na' Eun ko', Peucawo' Eun kaw ploé' map' eun. Daecti a'nhaw' lawn lah' ku' un' nawpsang ri Cit' seunga' chak' na' ko', Eun hkuin' kaw laee ploé' map' eun.

¹¹ Yam va peue pe' heul' nang sa'la vang hk'o' mun' mae' hkun'cawo' mae' nang kue' tí'ca na', pawlaee hki'keung ri ku' kaw pe' top' mae' ku' kaw pe' lah' na'.

* **12:2** 12:2 Ku' kuip ri na' Peucawo' Eun kaw tuh' a ku ceu ka, ku' mo' ri na' Eun yawng a ku ceu ka.

¹² Kopti Cit' seungá chak' na' kaw a guil pé ri ku' kaw pé htu' ri lah' yam awn' na."

Leukah' leupong' lawng peue meuneum nga' suisa

¹³ Nang peue cum heun' na' a kue' peue ti peue eun lah' a ri Yesu' Eun, "Seura', hk'o' Mi kah nawepi ui' eun gvah sin' na' ri ui'."

¹⁴ Yesu' Eun top' a, "A'pu', a'nhaw' ci' tuil' Ui' meuh nang kaw taws' a' mu, a'ko' nang kaw gvah sin' ri pa'?" ¹⁵ Hawc' ko', Eun tang lah' a ri peue heun' na' ce, "Sawng' uin' sati ri meulamlam ri hk'a' ta' nha' ri ku' ceu na' ce. Un' a'yu im' peue ri lheu' ri vahtu' hk'il' leumuil na'."

¹⁶ Hawc' ko', Eun lah' leukah' leupong' aen' a ri ce, "Bhen' keute' eun peue meuneum ti peue na' vahtu' hk'il' leumuil ka na' chak' nyawk' ka. ¹⁷ Peue meuneum awn' eun kuit a nang hpum' ri, 'Ui' ci' kaw yeuh sa'nhaw'? Ui' hkuin' kaw lae kue' vang uin' vahtu'."

¹⁸ Hawc' ko', eun kuit a, 'Kaw ui' yeuh keutit' ceu. Kaw ui' lhu' htuim' ri na', ui' na' pleng' htuim' keuting lheu' aen' na. Ui' kaw seue' ku' seumal mae' vahtu' hk'il' leumuil ri na' gawm'euc' hk'a'nae' ka. ¹⁹ Yam awn' na, ui' kaw lah' a ri tu' ri na' meun, "Hk'on'ro mi ri uin' ku' chak' na' htonnuk pun ri heun' neum hawc'. Ut' sa'sa' munkvaen hk'a' reu'."

²⁰ Daecti Peucawo' Eun lah' a ri heun, 'Peue suisa, bul seunyaen', civit mi na' kaw a ti ri keutah hk'ai' mi. Kop awn' na, a'nhaw' ci' kaw pun ku' hk'on'ro mi na'?"

²¹ Peue hk'on'ro vahtu' hk'il' leumuil pun tu' ri meun daecti eun un' yeuh ku' a'ye' keuting pun Peucawo' Eun na', a seun' lawng eun peue awn' na."

Pawlae hki'keung

²² Hawc' ko', Yesu' Eun lah' a ri tapae' ri na' ce, "Kop awn' na kaw Ui' lah' a ri pé, pawlae hki'keung ri ku' hk'a ku' som' kaw pé hk'a pun a'yu ri na'. Pawlae hki'keung

ri hk'ohk'eung kaw pé hk'eung pun jawngkui' tu' ri na'.
²³ A'yu na' ngos heun' a hk'ai' ku' hk'a na', jawngkui' tu' na' a ngos heun' hk'ai' hk'ohk'eung na'. ²⁴ Kuit ti nawk ngak' na' reu', a hkuin' jheum', hkuin' vuic, hkuin' kue' htuum' nya vang uin' ku' hk'a. Daecti Peucawo' Eun uii' a. Pé ri, pé cí pe ngos heun' hk'ai' sim' awn' na a'neng?
²⁵ Hk'a'naee pé, a cí kue' a'nhaw' kopti hki'keung eun na', eun cang yeuh a'yu ri na' lang' bae ti sok? ²⁶ Kopti saec' meuh ku' aet' na' un' cang yeuh pé a, pé cí hki'keung ri ku' seubu na' meuh keunhaw'?

²⁷ Kuit ti nawk peutai na' a cí keuting yeuh sa'nhaw'? A hkuin' yeuh kan'. A hkuin' kling' kuii'. Daecti kaw Ui' lah' a ri pé, saec' meuh cawo' Saw'lamon yam hk'eung eun hk'eung hkuru ri na', eun hkuin' nang ngam seun' peutai awn' na saec' ti nok'. ²⁸ Seun' rip a'yu im' seunyaen' a kaw dum ri nang ngawl peunsa' na', Peucawo' yong' Eun a htan' awn' na. Peue kue' hk'a' yum' leng na' pé, Peucawo' Eun cí kaw yong' pé lheu' awn' na pe a'neng? ²⁹ Pé cí kaw hk'a keunhaw' na', pawlaee kuit a nang hpum' ri laleung, pawlaee hki'keung pun a. ³⁰ Kopti peue bhen' keute' un' yawng Peucawo' Eun ku' duih' na' sok ce seun' ceu nang awn' a. Kuiing' pé yawng Eun lo' pé awn' a yeut. ³¹ Daecti sok kuing' Eun Peucawo' na' reu'. Hawc' ko', Eun kaw tuil' ceu nang awn' a ri pé yeut.

Hk'eung hk'il' leumuil nang kuing' pang mao'

³² Muk kon'yung' aet', pawlaee lhat'. Kopti Kuiing' pé kaw Eun tuil' pé is' kuing' awn' na, a htuk' hpum' Eun. ³³ Paing' vahtu' hk'il' leumuil pé na' tan a ri peue hk'o'tukyak na' ce reu'. Sawng' rangraen tep paec un' cang deut pun ri meun reu'. Hk'on'ro vahtu' hk'il' leumuil pé na' nang kuing' pang mao' vang un' laee euc', vang con' un' cang de ce, vang ruing un' cang teun' ka na' reu'. ³⁴ Kopti

vahtu' hk'il' leumuil pe' na' a lawn ut' tawngnhaw' ko', hpum' pe' na' a ku kaw ut' ri ka yeut.

Mhai' rangraen ri meulamlam ri

³⁵ Cui'p' hk'eung kaw ri yeuh mhai' peue na' rangraen ri meulamlam ri. Co kaw' ngawl pe' na' ceng' reu'. ³⁶ Yeuh pe' seun' nang yeuh kan' rangraen ri ko' cawo' kaw ing' neum vang hk'a chec' na' ce. Punta yam cawo' na' ing' toe' eun leuva' na', ce ku kaw cang tah' leuva' na' keulawn' dah' pun eun. ³⁷ Yam cawo' na' ing' nyu eun mhai' rangraen ri ko' na' ce na', mhai' awn' ce kue' mun' keuting. Kaw Ui' lah' a ri pe' neumneum, cawo' na' kaw eun cui'p' hk'eung kaw ri yeuh mhai' rangraen ri, eun kaw kah mhai' na' ce mok' keunam hpuin' na'. Hawc' ko', eun kaw yeuh mhai' ce. ³⁸ Saec' meuh yam un' nang nuik' ka na', a'ko' yam nuik' nha' ka na', yam cawo' na' ing' nyu eun rangraen ce ri na', mhai' awn' ce kue' mun' keuting. ³⁹ Yeuh pe' leuceng pun aen' na, cawo' nya na' eun lawn yawng yam con' na' kaw ce ing' ri ti ko', eun hkuin' kaw kah a'nhaw' cang toe' ri ing' lec nya ri na'. ⁴⁰ Saec' pe' ri, pe' ku kaw kah ri rangraen ri meulamlam ri. Kopti Kon' ai' peue na' kaw Eun lih yam un' pawn pe' kui' ri na'."

Mhai' kati keutawn' mae' mhai' kati un' keutawn'

⁴¹ Petru' eun mhaing', "Cawo', lah' Mi leukah' leupong' aen' a ri ye palkoe aw, a'ko' lah' Mi a ri peue gawm'euc' aw?"

⁴² Cawo' Yesu' Eun top' a, "A'nhaw' ci' meuh peue kati keutawn' kue' cu'yi rokso' vahtu' hk'il' leumuil ku' cawo' na' tuil' eun eun meuh ro' gvah ku' hk'a ri mhai' ri na' ce cawp' meu cawp' yam ri na' eun? ⁴³ Yam cawo' na' ing' nyu eun mhai' na' yeuh eun ko' na', mhai' awn' eun kue' mun' keuting. ⁴⁴ Kaw Ui' lah' a ri pe' neumneum, cawo' na' kaw eun kah mhai' awn' eun rokso' vahtu' hk'il' leumuil ri na'

gawm'euc' ka. ⁴⁵ Daecti mhai' awn' eun lawn kuit, 'Yam cawo' uí na' kaw eun ing' na' kaw'n' kaw a ling'. Hawc' ko', eun tang' ri peum' klaee' mhai' beun' mhai' me na' ce, ut' ri hk'asom', yuic' ri plai' ko', ⁴⁶ yam cawo' eun na' tang ing' rot eun yam mhai' awn' un' keutui' hpum' un' pawn eun kui' ri na', cawo' na' kaw eun ciyang eun reng, ra eun ut' mae' peue un' yum' na' ce.

⁴⁷ Mhai' na' eun saec' yawng alo eun cawo' ri na', daecti eun lawn un' rangraen un' yeuh alo eun na' ko', eun kaw pun ri hkam' hk'a' ta'faet' heun' ti' na'. ⁴⁸ Daecti mhai' un' yawng caw ri yeuh ku' kleuc' htuk' ri hkam' hk'a' ta'faet' na' eun ko', kaw eun pun ri hkam' hk'a' ta'faet' na' leng. Ku' pun beus heun' na', Peucawo' Eun kaw keutui' hpum' eun heun'. Peue pun ri rap ri ti ku' ap ri tuil' heun' na' eun, Peucawo' Eun jaen gawm kaw keutui' hpum' eun heun'.

Kopti meuh a Yesu' Eun, peue kaw taic'jah hk'ai' puri

⁴⁹ Punta kaw Uí ti ngawl lih pang bhen' keute' na', Uí lih. Sum' kah Uí ngawl awn' na ha' hawc'. ⁵⁰ Daecti hk'a' cum' kaw Uí rap ri ti na' kue' a keuhti. Hk'a' cum' awn' a lawn un' nang hawc' ko', hpum' Uí na' a kuit nyhap' nyawk'. ⁵¹ Hteum' pe' Uí ti hk'a' kuit nyawk' kuit sam'ran cumyen' na' lih pang bhen' keute' na' aw? Un' meuh, Uí lah' a ri pe', ti Uí hk'a' taic'jah hk'ai' puri na' lih. ⁵² Tang' neum maet' maen' na', peue hpawn' peue ut' nang nya ti lhang' na' ce kaw taic'jah hk'ai' puri, loe' peue to'tam' lal' peue mae' lal' peue to'tam' loe' peue. ⁵³ Ce kaw taic'jah hk'ai' puri, kuiing' kaw to'tam' kon' me, kon' me kaw to'tam' kuiing', ma kaw to'tam' kon' beun', kon' beun' kaw to'tam' ma, a'oe' kaw to'tam' leumeun, leumeun kaw to'tam' a'oe'."

Pawn sa' hkat' meuyam na'

⁵⁴ Eun lah' a ri peue cum heun' na' ce, "Yam nyu pe' putum' na' huk' a neum hk'a'lec seunyi na', pe' keulawn' lah' a kaw lhe'. A ku lhe'. ⁵⁵ Yam nyu pe' guil' na' puing' a ri huk' neum hon' hk'a'col na', pe' lah' a kaw nghawo'ron. A ku meuh yeuh keutit'. ⁵⁶ Peue leukah' seunga' hpum' vok' na' pe', yam keue' pe' ri bhen' keute' maó na', pe' cang pawn meuyam na'. Daecti pe' cí yeuh keunhaw', pe' vaeé un' cang pawn sa'hkat' meuyam maet' maen' na'?"

Yeuh ri htuk'lung peue tang' a'mu ri mi na' eun

⁵⁷ A cí meuh kop keunhaw' pe' vaeé un' cang taws' ku' cawp' na' meun? ⁵⁸ Yam ku' tang' a'mu ri mi na' buih heul' pa' ri cawo' taws' a'mu na' eun na', co'ca' ri yeuh ri htuk'lung eun lang' hk'a' na' reu'. A lawn un' yeuh keutit' ko', eun kaw teuk' yat mi heul' ri cawo' taws' a'mu na' eun. Cawo' taws' a'mu na' eun kaw ap mi ri cawo' htawng' na' eun. Cawo' htawng' na' eun kaw seue' mi hk'a'naee htawng' na'. ⁵⁹ Kaw Ui' lah' a ri mi, mi lawn un' nang saí ku'ma ri na' hawc' saec' ti paec ko', mi hkuin' kaw pun ri pucti lih hk'ai' htawng' na'."

13

Un' taws' hpum' fuin map' ri ko' kaw pun ri lu

¹ Yam awn' na, ngon' ce ris Yesu' Eun mhawng' lawng cawo' Pi'lat hkawo' eun nham' ce peue Galilae' na' maeé ku' tan ri na' tiduih'. ² Yesu' Eun top' a, "Kopti peue Galilae' awn' pun ce ri htarong hk'a' lulaic yeuhko' na', pe' hteum' map' ce na' a keuting hk'ai' peue Galilae' seubu na' ce aw? ³ Kaw Ui' lah' a ri pe', un' meuh. Daecti saec' pe' ri, pe' lawn un' taws' hpum' fuin map' ri na' ko', pe' ku kaw pun ri lulaic yeut. ⁴ A'ko', peue kul'seudi' peue ku' nya lhung' nang yung' Silo'am na' cung'kus geut' a ce yeum na'. Pe' hteum' tut ce na' heun' hk'ai' peue ut' nang veng

Yeru'salaem gawm'euc' na' ce aw? ⁵ Kaw Uí' lah' a ri pé', un' meuh. Daecti saec' pé' ri, pé' lawn un' taws' hpum' fuin map' ri ko', pé' ku kaw pun ri lulaic yeut."

Leukah' leupong' lawng kleum' pli' keutuic un' pli'

⁶ Hawc' ko', Eun lah' leukah' leupong' aen' na, "Peue ti peue, eun jheum' kleum' pli' keutuic ti kleum' nang val pli' bui ri na'. Eun heul' nom' pli' ka na', daecti eun un' duing nyu pli' ka. ⁷ Kop awn' na, eun lah' a ri ku' rokso' val na' eun, 'Heul' nom' uí' kleum' pli' keutuic aen' na pun a loe' neum hawc', daecti uí' un' duing nyu pli' ka. Gawl ri tec a reu'. Uin' a jeh' bhen' keute' na' hk'o' hk'awng' meuh keunhaw'?"

⁸ Daecti ku' rokso' val na' eun top' a, 'Cawo', puing uin' a bae neum aen'. Kaw uí' kung' ri seue' keunam kleum' ka na' is' ngeuo. ⁹ A lawn pli' ko', a ku na' chak'. Daecti a lawn un' pli' ko', uí' na' koe gawl ri tec a.' "

Yesu' bai' Eun beun' gaw' cuin seunyi Sin'

¹⁰ Yam Yesu' buih sangsawn' Eun nang sa'la vang hk'o' mun' hk'a'nae seunyi Sin' na', ¹¹ nang mawn' na' a kue' beun' seuca' lec pun kul'seudi' neum ti peue. Seuca' na' a yeuh ka gaw', ka un' cang vuh ri seumeu' saec' peunae'. ¹² Yam Yesu' nyu Eun beun' awn' ka na', Eun klawng ka ing' nanggal' ce na'. Eun lah', "Beun', peuyhat pa' na' cuin ka hawc'." ¹³ Hawc' ko', Eun tang' ti' ri hk'a'pang ka. Beun' awn' ka keulawn' vuh nyawng ri na' lhaem'. Ka suk'seun' Peucawo' Eun.

¹⁴ Kopti Yesu' bai' Eun peue peuyhat cuin hk'a'nae seunyi Sin' na', ro' ka sa'la vang hk'o' mun' na' eun seungeueng'. Eun lah' a ri peue cum heun' na' ce, "Seunyi htuk' ri yeuh kan' na' kue' a les seunyi ceu, kop awn' na ing' bai' pé' cuin yam awn' na, pawlae ing' seunyi Sin' seun' seunyaen' na'." ¹⁵ Cawo' Yesu' Eun tang top' a ri heun,

“Peue leukah’ seungá hpum’ vok’ ná pé, a lawn meuh seunyi Sin’ kó, pé ri ku peue kah’ pé a moe maeé rawngla ri pucti lih hk'ai’ kok ri, pé va ri heul’ tuil’ a nyui leuum’, un’ meuh ka aw? ¹⁶ Kon’ beun’ ceucat Abraham aen’ ka Satan ná mawt a ka ling’ pun kul’ seudi’ neum, kah’ ri ploé ka hk'a'naee seunyi Sin’ ná un’ cawp’ ka aw?”

¹⁷ Yam lah’ Eun a yeuh keutit’ ná, peue ces ri Heun ná ce kaic gawm’euc’ ri. Daecti peue cum heun’ ná ce ren’kawn maeé ku’ hk'o'am’ yeuh Eun ná.

Leukah’ leupong’ lawng seumal hpapu

¹⁸ Hawc’ kó, Yesu’ mhaing’ Eun, “Kuing’ Eun Peucawó ná a cí seun’ keunhaw’? Uí cí kaw keutec a maeé keunhaw’? ¹⁹ Kuing’ Eun Peucawó ná seun’ a peue ti peue jheum’ eun seumal ka hpapu nang val ri ná. A kaws meuh kleum’ ri. Sim’ peul’ eo’ nang vawo ná a ing’ pleng’ ri is’ han’ hk'a'pang kak’ ka ná ce.”

Leukah’ leupong’ lawng paeng ka hkawomun’

²⁰ Eun tang mhaing’ bae ti pok, “Uí cí kaw keutec kuing’ Eun Peucawó ná maeé keunhaw’? ²¹ Kuing’ Eun Peucawó ná seun’ a paeng ku’ beun’ ná seue’ eun nang moc’ hkawomun’ loe’ teng’ ná, a yeuh hkawomun’ ná keulai gawm’euc’ ri.”

Leuva’ seuep’

²² Hawc’ awn’ na yam Yesu’ heul’ Eun nang veng Yeru’salaem ná, Eun sangsawn’ peue nang yung’ nang veng hot’ hk'a' heul’ ri ná. ²³ Ngon’ ce mhaing’ Yesu’ Eun, “Cawó, peue pun hk'a' htut lawtpon ná leng ce aw?” Yesu’ Eun top’ a ri ce, ²⁴ “Punta kaw pé cang pun ri lec leuva’ seuep’ ná có’cá a sae’caeé reu’. Kopti lah’ Uí a ri pé, peue heun’ ná ce saec’ sum’ lec a, daecti ce un’ cang lec a. ²⁵ Yam cawó nya ná kuh’ sawng’ eun leuva’ ná kó,

pe' kaw cawng ri kloh leuva' na' hk'o' hk'ang a hk'a' nok, 'Cawo', hk'o' mi tah' leuva' na' ri ye ti aet'.

Daecti cawo' nya na' eun kaw top' a, 'Ca' yawng ui' heul' pe' neum tawngnhaw', ui' hkuin' yawng pe'.

²⁶ Yam awn' na, pe' kaw tang lah', "Tawn pun ye ri hk'asom' mae' mi hawc'. Mi ku sangsawn' ye hot' hk'a' ye na' ce yeut'.

²⁷ Daecti eun kaw top' a, 'Ca' yawng ui' heul' pe' neum tawngnhaw', ui' hkuin' yawng pe'. Peue yeuh ku' rai na' pe' gawm'euc', pucti hk'uih heul' hk'ai' ui' reu'.

²⁸ Yam nyu pe' Abraham, I'cak', Yakop' mae' peue suip leukah' Eun Peucawo' ut' ce nang kuing' Eun Peucawo' na' gawm'euc' ri na', pe' kaw cet rang' ri ta'ul' ri yam. Kopti kaw pe' pun ri hkam' nyon peue ri tec tu' pe' na' hk'a' nok na'. ²⁹ Peue ut' hk'a'lih seunyi, hk'a'lec seunyi mae' hk'a'tuh hk'a'col na' kaw ce ing' lec vang ut' a'nhaw' vang ut' nang awn' hk'a'naee pawe nang kuing' Eun Peucawo' na'. ³⁰ Neumneum ka na' ko', peue ut' hk'a' to' na' kaw ce meuh peue ut' nanggal'. Peue ut' nanggal' na' kaw ce meuh peue ut' hk'a' to'."*

Yesu' tuckyak Eun ri veng Yeru'salaem

³¹ Yam awn' na, peue Hparisae' na' ngon' ce ing' lah' a ri Yesu' Eun, "Puc Mi hk'uih heul' hk'ai' maen' na' heul' tawk seubu reu'. Cawo' Herot' sum' toh eun Mi." ³² Yesu' eun top' a, "Heul' lah' a yeuh keutit' ri so' hk'i teh' a reu', 'Seunyaen' mae' peunsa' na', kaw Ui' ra ri tec seuca' na' mae' bai' peue peuyhat na' ce cuin. A lawn rot loe' seunyi ko', kan' ui' na' a kaw htonnuk.' ³³ Daecti Ui' kawn' kaw htuk' lo' ri heul' seunyaen', peunsa' mae' leuku' na'. Kopti

* **13:30** 13:30 Peue a'ye' keuting na' ce kaw pun ri meuh peue un' a'ye' keuting, peue un' a'ye' keuting na' ce kaw pun ri meuh peue a'ye' keuting.

un' kue' a peue suip leukah' Eun Peucawo' yeum hk'a' nok ka veng Yeru'salaem na' saec' ti peue.

³⁴ O', veng Yeru'salaem, veng Yeru'salaem, toh mi peue suip leukah' Eun Peucawo' na' ce mae' dhim' mi peue cus' ri lih ri mi na' ce yeum ri seumu laleung. Ui' saec' sum' hk'on'ro kon'hk'i mi na' ce seun' el' ma na' ngom a kon' ri na' hk'a'ruim hk'ec' ri na', daecti mi un' kah Ui' yeuh a. ³⁵ Kue' reu', nya mi na' tec a ri rang' hawc'. Lah' Ui' a ri mi, yam nyu mi Ui' bae' na', mi kaw lah', 'Nap mun' ri Cawo' ing' hk'a'ruim muis Eun Peucawo' na' Eun.' A lawn un' nang rot ti yam awn' na ko', mi kaw un' nang nyu Ui'."†

14

Yesu' bai' Eun peue bui' nyhel' peuyong cuin

¹ Seunyi Sin' ti seunyi na', yam Yesu' heul' som' Eun nang nya eun ro' Hparisae' ti peue na', ce hot' ri htom' Eun meulamlam ri. ² Peue bui' nyhel' peuyong ti peue na' eun bai ut' nanggal' Eun. ³ Yesu' Eun mhaing' peue yawng leukah' ritroe mae' peue Hparisae' na' ce, "Bai' peue peuyhat hk'a'nae' seunyi Sin' na' kleuc' ka leukah' ritroe aw, un' kleuc' ka aw?" ⁴ Daecti ce dit' ti. Kop awn' na, Yesu' Eun vuh eun kuh'. Eun bai' eun cuin. Hawc' ko', Eun kah eun heul'.

⁵ Hawc' ko', Eun mhaing' ce, "Hk'a'nae' pe' ri ti ri peue, kon' pe', a'ko' a'moe' pe' na' a lawn hk'uic' nang lamó' hk'a'nae' seunyi Sin' na' ko', kaw pe' un' keulawn' hue' a pucti lih aw?" ⁶ Ce un' lae' kue' ku' kaw lah' saec' peuna'.

Leukah' sangsawn' peue chec' mae' cawo' nya

⁷ Yam Yesu' nyu Eun chec' na' leuk ce vang mok' kue' munhpung' na', Eun lah' leukah' leupong', ⁸ "Peue lawn klawng mi heul' vang hk'a' chec' na' ko', pawlae' leuk vang

† 13:35 13:35 Suk'seun' 118:26

mok' kue' munhpung' na'. Kopti na' eun cang klawng nang kue' an' nya keuting hk'ai' mi. ⁹ A lawn yeuh keutit' ko', cawo' nya klawng mi na' eun kaw ing' lah' a ri mi, 'Tuil' vang mok' mi na' ri heun reu'. Yam awn' na, mi na' klaee' ri mhong' pun ri sat ri heul' mok' vang htan tem hk'ai' peue na'. ¹⁰ Daecti yam klawng peue mi na', heul' mok' vang un' kue' munhpung' na'. Punta cawo' nya na' kaw eun ing' lah' a ri mi, 'A'mawo, ing' mok' vang chak' hk'ai' maen' na' reu'. Yam awn' na, mi kaw pun munhpung' ri nanggal' peue chec' seubu na' ce gawm'euc'. ¹¹ Kopti saec' meuh a'nhaw' eun lawn ti ri keuting lung' meun ko', eun kaw hkam' nuic ri tem na'. Daecti saec' meuh a'nhaw' eun lawn tang' hpum' ri tem ko', eun kaw pun ri rap ri ti hk'a' yuk ri lung' na'."

¹² Hawc' ko', Yesu' Eun lah' a ri peue klawng na' eun, "Yam klawng mi peue som' ngup un' lah', som' pul un' lah', pawlaee klawng a'mawo, ec'awng' mae' peue meuneum ut' caonao' mi na' ce. Mi lawn yeuh keutit' ko', ce kaw cang top' kun mi, klawng mi yeut. ¹³ Daecti yam yeuh mi pawe hk'asom' na', klawng peue hk'o'tukyak, peue ti' cung lu mae' peue ngai' lec' na' ce reu'. ¹⁴ Mi kaw pun mun' keuting. Ce saec' un' cang top' kun mi na', daecti Peucawo' Eun kaw tang top' mun' kun ri mi yam peue leupaws seumeu' na' tang kuh' im' ce na'."

Leukah' leupong' lawng pawe hk'asom' keuting

¹⁵ Ku' mok' ri som' mawn' na' yam mhawng' eun leukah' awn' a na', eun lah' a ri Yesu' Eun, "Mun' keuting ri peue kaw pun ri hk'asom' nang kuing' Eun Peucawo' na' ce."

¹⁶ Yesu' Eun lah' a ri heun, "Peue ti peue na' buih rangraen eun pawe hk'asom' keuting. Eun klawng peue chec' heun' nyawk'. ¹⁷ Yam kaw a rot yam hk'asom' na', eun kah mhai' ri na' eun heul' lah' a ri peue chec' klawng

ri na' ce, 'Ing' pawh, maet'maen' hawc' uí rangraen ka gawm'euc' hawc':

¹⁸ Daecti ce hk'o' ri un' heul' gawm'euc' ri. Ku' ti peue na' eun lah', 'Kopti kawn' leuvaee uí na ti bhen' na', uí lo' ri heul' nawk a. Hk'o' a ri mi, uí hkuin' kaw cang heul' nang pawe na':

¹⁹ Ku' ti peue na' eun lah', 'Kopti kawn' leuvaee uí a'moe hpawn' ku na', uí kaw heul' hkvuik' a. Hk'o' a ri mi, uí hkuin' kaw cang heul' nang pawe na':

²⁰ A kue' bae ti peue, eun lah', 'Kopti kawn' pen' hk'u' uí na', uí hkuin' kaw cang heul':

²¹ Mhai' na' eun ing' lah' lawng awn' ce ri cawo' ri na' eun. Cawo' nya na' eun seungeueng' nyawk'. Eun lah' a ri mhai' awn' eun, 'Heul' hot' ri klawng peue hk'o'tukyak, peue tí cung lu, peue ngai' lec' na' ce hot' hk'a' aet' hk'a' keuting ka nang veng na' vaeveae reu':

²² Mhai' na' eun lah', 'Cawo', yeuh uí seun' ku' lah' mi na' hawc', daecti a kawn' kue' vang mok':

²³ Cawo' na' eun tang lah' a ri mhai' ri na' eun, 'Heul' klawng peue hot' hk'a' keuting hk'a' aet' ka hk'a'nok veng na' ce ing' nuk nya uí na' reu'. ²⁴ Uí lah' a ri pé, peue chec' klawng uí na' un' kue' ce nang heul' pun ri cim ku' hk'a uí na' saec' ti peue.' "

Ngos kaw meuh tapae'

²⁵ Peue cum heun' na' buih heul' ce maeé Yesu' Eun tiduih'. Eun hpawt' ri keue' lah' a ri ce, ²⁶ "Peue ing' ri Uí na' eun lawn un' leumeus' Uí heun' hk'ai' makuiing', beun' kon', ec'awng' maeé a'yu ri ko', eun kaw un' cang meuh tapae' Uí. ²⁷ A'nhaw' lawn un' klawm' kleum' rawng'tawp' ri na' un' hot' Uí ko', hpaw eun ca' kaw cang meuh tapae' Uí.

²⁸ U'hpama ri, hk'a'naee pé ri ti ri peue, eun lawn sum' pleng' nya lhung' ko', ngos ka na' a cí kaw hk'o' un' hk'o'

rot ti pleng' eun nya na' hawc' kaw eun un' mok' ri sawn' a aw? ²⁹ Kopti eun saec' pun ri go' res ka na', eun lawn un' hawc' pleng' a ko', peue nyu a na' ku peue ce kaw chaw hkamram eun. Ce na' lah', ³⁰ 'Hkawn' eun tang' res nya ri na', daecti eun un' cang hawc' pleng' ka.'

³¹ Un' meuh ko', yam hkun'haw'hkam' ti peue na' kaw eun suik' ri hkun'haw'hkam' seubu na' eun na', peue suik' hk'a' heun timhuin' na' ce ci' kaw pe peue suik' seubu lal'mhuin' na' ce pe un' pe, kaw eun un' mok' ti sawn' a aw?

³² Eun lawn yawng kaw ri un' pe ko', yam hkun'haw'hkam' seubu na' kawn' ing' eun neum seungai na', eun kaw kah peue caee ri na' eun heul' hk'o' eun keului' suik' ri na'.

³³ Seun' awn' na, hk'a'naee pe' ri saec' meuh a'nhaw', eun lawn un' tec ku' kue' ri na' gawm'euc' ka ko', eun kaw un' cang meuh tapae' Ui'.

Cis cuit'

³⁴ Cis na' meuh a ku' chak' yeut. Daecti eum' ka na' a lawn cuit' ko', a ci' kaw cang yeuh ri eum' bae yeuh sa'nhaw'? ³⁵ Pun bhen' keute' un' lah', pun kaw a meuh ngeuo un' lah', kopti un' laee kue' a peuehot' na', a ti ri tec ri.

Peue kue' yhuk' kaw leuceng na' leuceng a meulamlam ri reu'."

15

Leukah' leupong' lawng kon'jung' rai'

¹ Peue cep' hkawn' maeé peue map' na' ce ing' cu ri leuceng leukah' Eun Yesu' na'. ² Daecti peue Hparisae' maeé peue guil leukah' ritroe na' ce buicbuic lah', "Peue aen' Eun vaeé rap ri ti peue map' hk'asom' maeé ce?"

³ Hawc' ko', Yesu' Eun ris leukah' leupong' aen' na ri ce, ⁴ "U'hpama ri, hk'a'naee pe' ri ti ri peue, eun lawn kue' kon'jung' tipak' tu' daecti a na' rai' ti tu' ko', kaw eun

un' hk'ah' ku' seudim'kul' seudim' tu' na' vang go' ri na', hawc' ko', eun na' un' eo' sok ri nyu ku' rai' na' aw? ⁵ Yam nyu eun kon'yung' awn' a na', eun ren'kawn nyawk' po a pang seuplang' ri na' ⁶ ing' ti nya. Hawc' ko', eun klawng a'mawo mae' peue caona' ri na' ce ing' cu ri lah', 'Ing' ren'kawn mae' ui' vae. Sok ui' ri nyu kon'yung' rai' ri na' hawc'. ⁷ Seun' awn' na, Ui' lah' a ri pe', 'Kopti peue map' ti peue na' taws' eun hpum' ri na', nang kuing' pang ma' na' a ku kaw kue' hk'a' ren'kawn heun' hk'ai' peue leupaws seumeu' seudim'kul' seudim' peue na' un' lo' ce ri taws' hpum' fuin map' ri na'.

Leukah' leupong' lawng leumuil rai'

⁸ Ku' ti lawng ka na', beun' ti peue ka lawn kue' leumuil kul' htaep' daecti a na' rai' ti htaep' ko', kaw ka un' tok' kaw' ngawl pis' nya na' un' sok a rot ti nyu ka a aw? ⁹ Yam nyu ka leumuil awn' a na', ka klawng a'mawo mae' peue caona' ri na' ce ing' cu ri lah', 'Ing' ren'kawn mae' ui' vae. Sok ui' ri nyu leumuil rai' ri na' hawc'. ¹⁰ Seun' awn' na, Ui' lah' a ri pe', 'Kopti peue map' ti peue na' taws' eun hpum' fuin map' ri na', hk'a'nae in'hpom Eun Peucawo' na' ce ku ren'kawn.' "

Leukah' leupong' lawng kon' me rai'

¹¹ Yesu' Eun tang lah' a bae, "Peue ti peue kue' eun kon' me lal' peue. ¹² Nang awng' na' eun lah' a ri kuiing' ri eun, 'A'kuiing', hk'o' mi gvah sin' kaw ui' htuk' ri pun na' ri ui' reu'. Kop awn' na, kuiing' na' eun gvah sin' na' ri kon' lal' peue ri na' ka.

¹³ Na' un' ling', nang awng' na' eun ti vahtu' hk'il' leumuil ri na' gawm'euc', eun heul' nang kuing' seungai. Eun heul' cai' ri hk'a' vahtu' hk'il' leumuil ri na' gawm'euc' ka ri ku' ren'kawn pon lheu' na'. ¹⁴ Yam cai' eun leumuil ri na' euc' na', nang kuing' awn' a rot ut' ngeup' keuting

ku duih'. Eun tang' ri cuthkuin'. ¹⁵ Kop awn' na, eun heul' hk'o' ri yeuh kan' mae' peue ti peue nang kuing' awn' na. Peue awn' eun kah eun uii' lic nang val. ¹⁶ Eun saec' sum' hk'a a'lum hk'a ka lic na', daecti peue un' tuil' eun hk'a keunhaw' saec' ti peue.

¹⁷ Yam kuit doh' eun na', eun lah', 'Kuiing' ui' na' kue' eun peue rapcang' heun', ce lheu' hk'a lheu' som' ri. Daecti ui' vae' ngeup' ri kaw yeum maen'. ¹⁸ Kaw ui' tang ing' lah' a ri kuiing' ui' eun, "A'kuiing', map' ui' ri Peucawo' Eun mae' mi ri hawc'. ¹⁹ Un' laee kuing' ui' mae' klawng ui' meuh kon' mi na'. Kah ui' meuh seun' peue rapcang' mi ti peue na' eun reu.'" ²⁰ Hawc' ko', eun yuk ri ing' ri kuiing' ri na' eun. Yam kaw' ut' eun vang seungai na', kuiing' eun na' eun seucon' ri tukyak ri heun. Eun hk'uih heul' cem ri huit' kon' me ri na' eun.

²¹ Kon' na' eun lah' a ri kuiing' ri na' eun, 'A'kuiing', map' ui' ri Peucawo' Eun mae' mi ri hawc'. Un' laee kuing' ui' mae' klawng ui' meuh kon' mi na'.

²² Daecti kuiing' na' eun lah' a ri mhai' na' ce, 'Vaevae, ti hk'o' chak' hk'ai' peue na' ing' tuil' eun cuip' a, chui' plok' ti' na' ri geun' ti' eun na', chui' jhaep' na' ri cung eun na'. ²³ Teuk' ri ing' nghawm' kon' a'moe uii' ri kleueng' na'. E' na' yeuh pawe hk'asom' ren'kawn. ²⁴ Kopti kon' ui' aen' yeum eun hawc', daecti eun tang im' bae. Eun rai' hawc', daecti tang nyu eun bae.' Kop awn' na, ce tang' yeuh pawe hk'asom' ren'kawn.

²⁵ Yam awn' na, nang ec' na' eun ut' nang mal'. Yam ing' rot eun keunam nya na', eun mhawng' seng' keul ce hk'uing' seng' cha ce ri na'. ²⁶ Kop awn' na, eun klawng ri mhaing' mhai' ti peue na' eun a ci' meuh keunhaw'. ²⁷ Mhai' na' eun top' a, 'Awng' mi na' tang ing' eun hawc'. Kuiing' mi eun kah ce nghawm' kon' a'moe uii' ri kleueng' na' kopti pun eun eun ing' mae' sa'pa sam'ran ri na'.

²⁸ Nang ec' na' eun seungeueng' nyawk'. Eun un' lae va ri ing' nang nya. Kop awn' na, kuiing' na' eun pucti lih hk'o' a ri heun. ²⁹ Daecti eun top' a ri kuiing' ri eun, 'Keue' reu', yeuh ui' mhai' mi heun' neum hawc' ui' hkuin' duing lheu' leukah' mi saec' ti moeng. Daecti pal yawo kon' a' pe aet' ti tu' na' mi hkuin' duing tuil' ui' yeuh hk'a' ren'kawn ri ka mae' a' mawo ri na' ce. ³⁰ Daecti yam kon' mi awn' eo' eun ri cai' ri tec hk'il' leumuil mi na' ri beun' paing' tu' ri na' ce euc' hawc' eun tang ing' ti nya na', mi ta nghawm' kon' a' moe uii' ri kleueng' na' pun heun.'

³¹ Kuiing' na' eun lah', 'Kon', ut' mi mae' ui' laleung. Hk'eung kue' ui' na' gawm'euc' ka meuh a is' mi. ³² E' htuk' ri yeuh ku' ren'kawn, kopti awng' mi aen' yeum eun hawc' daecti eun tang im' bae na'. Eun rai' hawc', daecti tang hk'eup' nyu eun hawc'.' ”

16

Leukah' leupong' lawng nang un' leupaws seumeu' roksa' vahtu' hk'il' leumuil

¹ Yesu' Eun lah' a ri tapae' ri na' ce, “Kue' a peue meuneum ti peue, peue ing' lah' eun mhawng' lawng peue roksa' vahtu' hk'il' leumuil eun na' cai' eun ri tec vahtu' hk'il' leumuil eun na'. ² Kop awn' na, eun klawng peue roksa' vahtu' hk'il' leumuil ri na' eun ing' ri ti. Eun mhaing' eun, 'Mi ci' kaw lah' a yeuh sa'nhaw' pun ui' ri mhawng' lawng mi na'? Tuil' ca'lang' roksa' vahtu' hk'il' leumuil mi na' ri ui'. Kopti kaw mi un' lae pun ri yeuh kan' roksa' vahtu' hk'il' leumuil ui' na' bae na'.

³ Yam awn' na, ku' roksa' vahtu' hk'il' leumuil awn' eun kuit a nang hpum' ri, 'Ui' ci' kaw htuk' ri yeuh sa'nhaw', cawo' ui' na' kaw eun ti ui' lih hk'ai' kan' ri na'. Ui' kaw kung' bhen' keute', ui' ku un' kue' kaw' reng. Ui' kaw eo' hk'o' ri hk'a, ui' ku kaic ri peue. ⁴ Yam hawc' lih ui' hk'ai'

kan' ri na', punta kaw peue tang rap ri ti ui' nang nya ri na' ui' kaw yeuh sa'nhaw' na', yawng ui' a hawc'.

⁵ Kop awn' na, eun klawng peue kue' ku'ma ri cawo' eun na' ce ing' ri ti ti peue hawc' ti peue. Eun mhaing' ku' nanggal' na' eun, 'Mi ci' kue' ku'ma ri cawo' ui' na' eun a'neng?'

⁶ Eun top' a, 'Kue' ui' ku'ma lamawn hku' sanlon tipak' pung'.'

Peue roksa' vahtu' hk'il' leumuil na' eun lah' a ri heun, 'Ti ca'lang' mi na' ing' mok' vaevae mhe' ri tem' a meuh hpawn'kul' pung' reu'.'

⁷ Hawc' ko', eun tang lah' a ri nang ti peue na' eun, 'Mi ci' kue' ku'ma ri cawo' ui' na' eun a'neng?'

Eun top' a, 'Kue' ui' ku'ma ngho' tipak' htong'.'

Peue roksa' vahtu' hk'il' leumuil na' eun lah' a ri heun, 'Ti ca'lang' mi na' ing' mhe' ri tem' a meuh seudi'kul' htong' reu'.'

⁸ Cawo' na' eun suk'seun' peue roksa' vahtu' hk'il' leumuil un' leupaws seumeu' awn' eun, kopti cang yeuh eun a mae' heng'laet' ri na'. Kopti peue bhen' keute' na' heng'laet' ce hk'a'naee vang ka ce to' ku' seun' ce ri na' hk'ai' peue ku' ceng' na' ce. ⁹ Lah' Ui' a ri pe', 'Lo' hk'il' leumuil bhen' keute' na' sok a'mawo reu'. Yam hk'il' leumuil na' euc' ka na', punta kaw Eun rap ri ti mi lec vang ut' cot'cu na'.'

¹⁰ Peue yum' pun hk'a'naee ku' aet' na' eun, eun ku yum' pun hk'a'naee ku' keuting na' yeut. Peue un' leupaws seumeu' hk'a'naee ku' aet' na' eun, eun ku un' leupaws seumeu' hk'a'naee ku' keuting na' yeut. ¹¹ Kop awn' na, pe' lawn meuh peue yum' un' pun hk'a'naee hk'il' leumuil bhen' keute' na' ko', a'nhaw' ci' kaw ap pe' roksa' hk'il' leumuil caetcaet ka pang ma'o' na'? ¹² Punta kaw pe' roksa'

hk'il' leumuil peue na', peue lawn yum' un' pun pe' ko', a'nhaw' ci' kaw pen' ap hk'il' leumuil na' meuh is' pe'?

¹³ A saec' meuh a'nhaw', eun kaw un' cang yeuh mhai' cawo' lal' peue. Kopti eun lawn ces ri ku' ti peue na' eun ko', eun kaw leumeus' ku' ti peue na' eun. Eun lawn yumyam' ku' ti peue na' eun ko', eun kaw un' nawpsang ku' ti peue na' eun. Pe' kaw un' cang yeuh mhai' ka hk'il' leumuil na' mae' mhai' Eun Peucawo' na' tiduih'."

Leukah' ritroe mae' kuing' Eun Peucawo'

¹⁴ Yam peue Hparisae' ku' leumeus' leumuil na' pun ce ri mhawng' lawng ku' Yesu' lah' Eun gawm'euc' na', ce sa'leuhkok' ceul sum' keunyas Eun. ¹⁵ Yesu' Eun lah' a ri ce, "Pe' saec' yeuh ri seun' peue leupaws seumeu' nanggal' peue ko', daecti Peucawo' yawng Eun hpum' pe' na' yeut. Ku' tang' peue ngos heun' na' meuh a ku' hk'aw'jeuk hk'i' ngai' Eun Peucawo'.

¹⁶ Leukah' ritroe na' mae' leukah' ce peue suip leukah' Eun Peucawo' na' pa'o' ris a ri ing' rot cu eun Yo'han na'. Tang' neum yam awn' na, leukah' mun' ren'kawn lawng kuing' Eun Peucawo' na' a ku pa'o' ris ri ing' yeut. Peue gawm'euc' ce tawk' net puri lec kuing' awn' na. ¹⁷ Bhen' keute' mae' mao' na' kaw a rai' na' kaw a sam'ran hk'ai' vang mhai' aet' kue' hk'a'naee htawm leukah' ritroe na' kaw a hk'ui'c' rai' na'.

Yesu' sangsawn' Eun lawng tec beun'

¹⁸ A'nhaw' lawn tec beun' ri, hawc' ko' eun ti ri is' beun' seubu ko', len'cu eun. Me ti beun' tec me ri na' eun ko', eun ku len'cu yeut.

Peue meuneum mae' Lasaru'

¹⁹ Kue' a peue meuneum ti peue. Eun cuip' hk'eung yawtmong na' mae' hk'eung hpen' linin chak' na' eun ren'kawn hk'a' suk' hk'a' munkvaen keuyuit. ²⁰ Mae' bawl'

leuva' ru eun na', a kue' peue hk'o' ri hk'a muis Lasaru'. Eun sui' bhuic' gawm' tu' ri, eun hkawthkaet ri mawn'.
²¹ Eun sum' hk'a ku' hk'a hk'uic' hk'a'ruim hpuin' eun peue meuneum awn' na. Saec' meuh so' na' a ing' laet vang sui' eun na'.

²² A rot ti seunyi, peue hk'o' ri hk'a awn' eun yeum. In'hpom ce uin' eun mae' Abraham eun. Peue meuneum na' eun ku yeum. Peue puing' eun. ²³ Yam ut' eun nang kuing' yeum na', eun pun ri hkam' ku' tuxhka reng nyawk' na', eun mung' ri nyu Abraham eun seungai nung'. Lasaru' eun ku ut' mae' Abraham eun. ²⁴ Kop awn' na, eun klawng ri lah' a ri heun, 'A'kuiing' Abraham, hk'o' mi tukyak ri ui'. Kopti pun ui' ri tuxhka nang ngawl aen' na nyawk' na', mi na' kah Lasaru' eun cup geun' ti' ri nang leuum' na', eun na' jam a seucet dak' ui' na'.

²⁵ Daecti Abraham eun top' a, 'A'ai', un' pawn mi yam a'yu im' mi na' pun mi ku' chak' na', daecti Lasaru' eun pun ku' un' chak' na'. Maet' maen' pun eun ri ut' vang kuit nyawk' kuit sam'ran na', mi ri mi pun ku' tuxhka nyhap' na'. ²⁶ Lheu' awn' na, a kue' ruik' keuting kat' seuna' e' na'. Kop awn' na, a'nhaw' saec' sum' heul' neum maen' na' heul' ri mi, peue un' cang heul'. A'nhaw' saec' sum' ing' neum teh' na' ing' ri ui', peue ku kaw un' cang ing' yeut.'

²⁷ Peue meuneum na' eun top' a, 'A'kuiing', a lawn yeuh keutit' ko', hk'o' mi kah Lasaru' eun ing' ti nya eun kuiing' ui' na', ²⁸ kopti kawn' kue' ui' awng' me hpawn' peue. Punta kaw ce un' pun ri rot vang tuxhka aen' a na', kah Lasaru' eun ing' deun' sati ce reu'.

²⁹ Abraham eun tang top' a, 'Kue' ce leukah' eun Mo'se mae' leukah' ce peue suip leukah' Eun Peucawo' na' hawc', uin' ce lak' leuceng leukah' ce na' reu'.

³⁰ Peue meuneum na' eun tang lah', 'Un' meuh, kuiing' Abraham, peue tang kuh' im' na' eun lawn heul' ri ce ko', kaw ce taws' hpum' fuin map' ri yeut.'

³¹ Abraham eun lah' a ri heun, 'Ce lawn un' leuceng leukah' eun Mo'se na' mae'e leukah' ce peue suip leukah' Eun Peucawo' na' ko', peue yeum na' eun saec' na' tang kuh' im', ce hkuin' kaw yum' a.' ”

17

Map'

¹ Yesu' Eun lah' a ri tapae' ri na' ce, "Hk'ai yeuh peue yeuh map' na' kaw a kue' neum. Daecti peue tung' hk'ai yeuh peue yeuh map' na', kaw eun pun ri hkam' hk'a' jha' na'. ² Mawt ri tuik' seumu maw' na' ri ngok eun na' plo'e' eun nang mha'seumut' na' ko', a na' jaen chak' hk'ai' uin' eun yeuh peue aet' ti peue na' eun yeuh map' na'. ³ Kop awn' na, uin' sati ri meulamlam ri meun reu'.

Ec'awng' mi na' eun lawn kleuc' ko', sangsawn' mhe' eun. Eun lawn taws' hpum' fuin map' ri ko', plo'e' map' eun. ⁴ Ce saec' kleuc' mi seunyi ka a' res pok, daecti ce lawn ing' lah' a ri mi a' res pok ko', 'Taws' ui' hpum' fuin map' ri hawc', mi ku na' plo'e' map' ce na'."

Hk'a' yum'

⁵ Peue caee Eun Yesu' na' ce lah' a ri Heun, "Hk'o' Mi yeuh hk'a' yum' ye na' gawm heun'."

⁶ Yesu' Eun top' a, "Pe' lawn kue' hk'a' yum' keuteul seumal ka hpapu na' ko', pe' kaw cang lah' a ri kleum' a'mon aen' na, 'Heul' jheum' ri nang mha'seumut' na' gawm' ngul ri na' reu', a ku kaw leuceng ku' lah' pe' na' yeut.

Beus mhai'

⁷ U'hpama ri, hk'a'naee pé ri ti ri peue, eun lawn kue' mhai' htaee' na, a'ko' mhai' go' kon'yung' ti peue ko', yam mhai' awn' ing' eun neum mal' ri na', 'Ing' mok' ri hk'asom' reu', cawo' na' kaw eun lah' a yeuh keutit' ri mhai' ri na' eun aw? ⁸ Cawo' na' kaw eun lah', 'Raen ku' hk'a pun ui' reu'. Rangraen tu' mi na' meulamlam ri ko' ui' rot ti sak' som' ui'. Ui' lawn sak' som' hawc' ko', mi na' kawn' pun ri som', un' meuh ka aw? ⁹ Kopti mhai' awn' yeuh eun a seun' ku' lah' eun na', kaw eun lah' mun' keuting ri mhai' ri na' eun aw? ¹⁰ Saec' pé ri, pé lawn hawc' yeuh ku' Peucawo' kah Eun ri yeuh na' gawm'euc' ka ko', pé na' htuk' ri lah' a yeuh keutit', 'Meuh ye mhai' hk'o'hk'awng'. Ye yeuh beus ri na' palkoe.' ”

Bai' peue naw kul' peue cuin

¹¹ Yam Yesu' buih heul' Eun nang veng Yeru'salaem na', Eun hot' mhuil' kuing' Samari' na' mae' kuing' Galilae' na'.

¹² Yam lec Eun nang yung' ti yung' na', peue naw kul' peue na' ce cawng ri ko' Eun vang seungai na'. ¹³ Ce klawng ri lah' laws', "Cawo' Yesu', hk'o' Mi tuckyak ri ye."

¹⁴ Yam Yesu' nyu Eun ce na' Eun lah', "Heul' tuil' peue jhawp' rit na' ce nyu tu' pé na' reu'." Yam buih heul' ce na', ce cuin.

¹⁵ Hk'a'naee ku' kul' peue awn' ce, ku' ti peue na' yam nyu eun tu' ri na' cuin ka hawc' na', eun tang ing' lah' seng' laws' suk'seun' Peucawo' Eun. ¹⁶ Eun nghup' buh ri na' mae' cung Eun Yesu' na', eun mun' keuting ri Heun. Peue awn' eun meuh peue Samari'.

¹⁷ Yesu' Eun lah', "Ku' cuin na' kue' ce kul' peue, un' meuh ka aw? Ku' seudim' peue na' ce ci' ut' tawngnhaw'?"

¹⁸ A lawn un' meuh yawo peue ceu seubu ti peue aen' eun ko', un' kue' a nang keutah ing' suk'seun' mun' Eun Peucawo' saec' ti peue aw?" ¹⁹ Hawc' ko', Yesu' Eun lah' a

ri heun, “Kuh' heul' reu', hk'a' yum' mi na' yeuh a mi cuin hawc'.”

Kuing' Eun Peucawo' lih ka

²⁰ A kue' ti pok, peue Hparisae' na' ce mhaing', “Kuing' Eun Peucawo' na' a ci' kaw lih yamnhaw'?” Yesu' Eun top' a, “Kuing' Eun Peucawo' na' kaw a un' lih seun' ku' cang nyu pe' na'. ²¹ A'nhaw' hkuin' kaw lah', 'Kue' a maen', a'ko' 'Kue' a teh': Kopti kuing' Eun Peucawo' na' kue' a hk'a'naee pe' ri.”

²² Hawc' ko', Eun lah' a ri tapae' ri na' ce, “Yam awn' a kaw rot yam sum' nyu pe' seunyi Eun Kon' ai' peue ti seunyi na', daecti pe' kaw un' nyu a. ²³ Peue kaw lah' a ri pe', 'Ut' Eun teh', a'ko' 'Ut' Eun mawn'. Daecti pawlaee hot' ce heul'. ²⁴ Kopti hk'a'naee seunyi Eun Kon' ai' peue* na', a kaw seun' cak'cal' na' til' ka ti plak' mao' na' a ceng' rot hk'a' ti plak' ka na' ko'. ²⁵ Daecti nanggal' awn' na, Eun kawn' kaw kah ri hkam' ku' tukhka heun' ceu na', mae' peue cu aen' tecla ce ri na'.

²⁶ Seun' ku' meuh hk'a'naee seunyi cu eun No'ah na', a ku kaw meuh hk'a'naee seunyi Eun Kon' ai' peue na' yeut. ²⁷ Peue na' ce hk'asom', pen'vel ti beun' ti me rot ti seunyi No'ah lec eun nang reu na'. Hawc' awn' na, leuum' na' a htum' ce lulaic gawm'euc'.

²⁸ A ku seun' cu Law'ta na' yeut, peue hk'asom', paing' leuvaee, puin' jheum', pleng' nya. ²⁹ Daecti seunyi yam Law'ta puc eun ri neum veng So'dom na', ngawl mae' mat na' a lih seun' lhe' neum pang mao' ko'. A yeuh ce lulaic gawm'euc' ri.

³⁰ Seunyi yam Kon' ai' peue puc Eun ri lih na', a ku kaw seun' awn' a yeut. ³¹ Seunyi awn' na, peue ut' pang a'ras' na' ce pawlaee ing' ti vahtu' hk'il' leumuil hk'a'naee nya

* **17:24** 17:24 Seunyi Eun Kon' ai' peue na' meuh a seunyi yam Cawo' Yesu' kaw Eun tang lih.

ri na'. Seun' awn' na, saec' meuh peue ut' nang mal' na' ce, htuk' ri un' ing' ti hk'eung ri yeut. ³² Kuit rot ri beun' Law'ta na' ka reu'. ³³ Peue co'ca' a'yu ri pon na', kaw ce sum a'yu ri. Peue sum a'yu ri na', kaw ce pun a'yu pon. ³⁴ Ui' lah' a ri pe', bul awn' na, peue lal' peue it' nang hk'eung it' tiduih' na' ka, ku' ti peue na' eun kaw pun ri ti ri huk', ku' ti peue na' eun kaw pun ri uin' ri ut'. ³⁵ Beun' lal' peue maw' moc' tiduih' na' ka, kaw ti eun heul' ti peue, uin' eun ti peue.

³⁶ Peue lal' peue ut' nang mal' na' ka, kaw ti eun heul' ti peue, uin' eun ti peue.”† ³⁷ Ce mhaing' Eun, “A ci' kaw meuh tawngnhaw',

Cawo'?” Eun top' a, “Tu' yeum na' a lawn kue' tawngnhaw' ko', raeng na' a kaw cu ri ri ka.”

18

Leukah' leupong' lawng a'ya seunao un' kleh' un' mhong'

¹ Hawc' ko', Yesu' lah' Eun leukah' leupong' sangsawn' tapae' ri na' kaw ce un' kleh' ri hk'o' ri mun' laleung na'.

² Eun lah', “Veng ti veng na' kue' a cawo' taws' a' mu ti peue. Eun meuh peue un' lhat' til ri Peucawo' Eun, un' keue' ri buh peue. ³ Nang veng awn' na, a kue' a'ya seunao ti peue. Ka heul' hk'o' a ri cawo' taws' a' mu awn' eun tam' teuk, 'Hk'o' mi taws' a' mu ui' na' leupaws seumeu' reu'.”

⁴ Cawo' taws' a' mu awn' eun un' cheun' ri ri ka ti cu hkao'. Daecti vang tisut' ka na', eun kuit a nang hpum' ri, 'Ui' saec' un' lhat' til ri Peucawo' Eun, un' keue' ri buh a'nhaw' ko', ⁵ daecti kopti a'ya seunao aen' ti yam ti yam ko' ka ri suksak ui' na', punta kaw ka un' laee ing' hkvi ui' bae na', ui' kaw tuil' hk'a' leupaws seumeu' na' ri ka.' ”

† **17:36** 17:36 Hk'a'naee nambat aet' 34, 35, 36 na', Peucawo' Eun kaw ti peue ti peue, uin' ti peue.

⁶ Cawo' Yesu' Eun tang lah', "Leuceng ku' lah' eun cawo' taws' a'mu un' leupaws seumeu' aen' na' reu. ⁷ Peue Peucawo' leuk Eun ri ti na' ce lawn hk'o' hk'ang ri Heun peunsum' peunnyi ko', kaw Eun un' tuil' hk'a' leupaws seumeu' na' ri ce aw? Kaw Eun hkawe ri ling' aw? ⁸ Ui' lah' a ri pe', kaw ce pun hk'a' leupaws seumeu' na' vaevaeae Eun kaw nom'nawk ce. Daecti yam Kon' ai' peue tang lih Eun na', kaw' kaw Eun nyu peue yum' pang bhen' keute' na' aw?"

Leukah' leupong' lawng peue Hparisae' mae' peue cep' hkawn'

⁹ Punta peue nawp ri leupaws seumeu' meun daecti chaw peue seubu na' peue, Yesu' Eun ris leukah' leupong' aen' na, ¹⁰ "Peue lal' peue na' huk' hk'o' ka mun' nang nya hk'o' mun' keuting na'. Nang ti peue na' eun meuh peue Hparisae', ku' ti peue na' eun meuh peue cep' hkawn'. ¹¹ Peue Hparisae' na' eun kuh' cawng ri hk'o' mun' lah' lawng tu' ri meun, 'O', Kuiing' Peucawo', mun' keuting ui' ri Mi kopti un' seun' ui' peue seubu na' ce, meuh ce peue con', peue rai, peue len'cu mae' peue cep' hkawn' aen' eun. ¹² Ui' eut' ku' hk'a' ri vung ka lal' pok. Ku' pun ui' na' gawm'euc' ka, ui' tan a kul' pun ti pun.'

¹³ Daecti peue cep' hkawn' na' eun cawng vang seungai na'. Saec' meuh mao' na' eun un' hat' ti mung' a, daecti eun nu' nuk' ri na' lah', 'O', Peucawo', hk'o' Mi tukyak ri meuh ui' peue map' keuting.'

¹⁴ Ui' lah' a ri pe', Yam peue awn' ing' eun ti nya ri na', Peucawo' Eun sawn' eun meuh peue leupaws seumeu' nanggal' ri hk'ai' peue seubu na' eun. Kopti saec' meuh a'nhaw' eun lawn ti ri keuting lhung' meun ko', eun kaw hkam' hk'a' nuic ri tem na'. Daecti saec' meuh a'nhaw' eun lawn tang' hpum' ri tem ko', eun kaw pun ri rap ri ti hk'a' yuk ri lhung' na'."

Yesu' nap Eun mun' ri kon' nyom aet'

¹⁵ Peue neng' ri ing' tuil' Yesu' Eun paic' kon' nyom na' ce. Yam tapae' na' nyu ce a na', ce is' ce. ¹⁶ Daecti Yesu' Eun klawng kon' nyom aet' na' ce ing' ri ti, "Tae' kon' nyom aet' na' ce ing' ri Ui' reu', pawlaee ham' ce. Kopti kuing' Eun Peucawo' na' meuh a kuing' ce peue ku' seun' kon' nyom aet' aen' ce. ¹⁷ Ui' lah' a ri pe' neumneum, a'nhaw' lawn un' rap ri ti kuing' Eun Peucawo' na' seun' kon' nyom aet' na' ce ko', eun hkuin' kaw duing pun ri lec nang kuing' Eun Peucawo' na'."

Hkun' meuneum

¹⁸ Hkun' ti peue na' mhaing' eun Yesu' Eun, "Seura' chak', ui' ci' kaw kah ri yeuh sa'nhaw' ui' na' pun cit' tip a'yu tip cot'cu na'?"

¹⁹ Yesu' Eun top' a, "A ci' meuh kop keunhaw' mi vae' lah' Ui' chak'? A lawn un' meuh yawo Peucawo' Eun ko', a'nhaw' hkuin' chak' saec' ti peue. ²⁰ Yawng mi ku' lah' ka leukah' ritroe na', 'Pawlaee len'cu, pawlaee toh peue, pawlaee rabawk' peue, pawlaee hkam' sa'hki' un' kue' un' meuh, hkopyawm' ri makuiing' mi ka.* "

²¹ Hkun' awn' eun lah', "Aen' ce gawm'euc' leuceng ui' ri yeuh a tang' neum yam kawn' aet' ui' na' hawc'."

²² Yam Yesu' mhawng' Eun leukah' awn' a na', Eun lah' a ri heun, "Kawn' cut mi ti ceu. Heul' paing' ku' kue' mi na' gawm'euc' ka, gvah ri tuil' peue hk'o'tukyak na' ce is' a reu'. Mi kaw kue' sin' ngos heun' nang kuing' pang maot' na'. Hawc' ko', mi na' ing' hot' Ui' reu'."

²³ Yam pun eun ri mhawng' leukah' aen' a na', eun kuit nyhap' nyawk'. Kopti meuh eun peue meuneum nyawk' na'. ²⁴ Yesu' Eun keue' ri heun. Eun lah', "Peue meuneum na' kaw ce lec nang kuing' Eun Peucawo' na' a nyhap'

* **18:20** 18:20 Pucti heul' 20:12; Sawm' leukah' mun' 5:16-20

nyawk'. ²⁵ Neumneum ka na' ko', kalaok' ti tu' na' kaw a lec muis peunye na' kawn' sam' ran a hk'ai' peue meuneum na' kaw eun lec nang kuing' Eun Peucawo' na'."

²⁶ Ku' mhawng' a na' ce mhaing' Eun, "Yeuh keutit' ko', a'nhaw' ci' kaw cang pun hk'a' htut lawtpon na'?"

²⁷ Yesu' Eun top' a, "Ku' peue un' cang yeuh peue meuh na', Peucawo' cang yeuh Eun a meuh."

²⁸ Petru' eun lah' a ri Heun, "Tec ye ku' kue' ri na' ku ceu ka, ye hot' Mi."

²⁹ Yesu' Eun lah' a ri ce, "Ui' lah' a ri pe' neumneum, a'nhaw' lawn tecla nya ri, a'ko' beun' ri, a'ko' ec'awng' ri, a'ko' makuiing' ri, a'ko' kon'hk'i ri ce kop pun kuing' Eun Peucawo' na' ko', ³⁰ eun kaw pun nammaet ka heun' pun hk'a'naee cu cat aen' na mae' eun kaw pun cit' tip a'yu tip cot'cu na' hk'a'naee cu cat na' ri na'."

Yesu' tang lah' Eun lawng kaw ri pun ri yeum na' bae

³¹ Yesu' va Eun tapae' kul'leual' peue ri na' ce gveh' hk'a' na'. Eun lah' a ri ce, "Buih huk' e' nang veng Yeru'salaem. Lawng Eun Kon' ai' peue ku' peue suip leukah' Eun Peucawo' tem' ce na' gawm'euc' ka na' kaw a htonnuk. ³² Peue kaw ap Eun nang dak ti' ce peue un' meuh peue ceu Yu'da na'. Ce kaw lah' ku' pleh ku' jaing, ku' un' nawpsang, htueng', ta'faet' Eun. Hawc' ko', ce kaw toh Eun. ³³ Yam meuh a loe' seunyi ka na', Eun na' tang kuh' im'."

³⁴ Tapae' na' ce leuceng un' pun lawng aen' na saec' peunae'. Vangdoh' ka leukah' awn' na, a geup' ri ce. Ce un' yawng Yesu' buih lah' Eun lawng keunhaw'.

Yesu' bai' Eun peue ngai' lec' cuin

³⁵ Yam Yesu' rot Eun keunam veng Yeri'kho' na', peue ngai' lec' ti peue na' eun mok' ri hk'o' ri hk'a' keunam hk'a' na'. ³⁶ Yam mhawng' eun peue cum heun' na' hpai ce ri

heul' na', eun mhaing' ce, "A cí meuh keunhaw'?" ³⁷ Ce lah' a ri heun, "Yesu' peue veng Nasaraet' buih hpai Eun heul'."

³⁸ Eun klawng ri lah', "Yesu' Kon' ai' Davit', hk'o' Mi tukyak ri ui'."

³⁹ Peue heul' nanggal' na' ce saec' is' eun, kah eun dit'ti. Daecti eun gawm klawng ri lah' laws' a, "Kon' ai' Davit', hk'o' Mi tukyak ri ui'."

⁴⁰ Yesu' Eun kuit'. Eun kah ce va eun ing' ri ti. Yam ing' rot eun keunam Eun na', Yesu' Eun mhaing' eun, ⁴¹ "Mi cí sum' kah Uí yeuh keunhaw' ri ti?"

Eun lah', "Cawo', sum' nyu ui' hk'a' ri."

⁴² Yesu' Eun lah' a ri heun, "Nyu hk'a' ri reu'. Hk'a' yum' mi na' yeuh a mi cuin hawc'." ⁴³ Eun keulawn' cang nyu hk'a' ri. Eun hot' Yesu' Eun heul'. Eun suk'seun' Peucawo' Eun. Yam peue gawm'euc' na' nyu ce a na', ce ku suk'seun' Peucawo' Eun.

19

Sakae' peue cep' hkawn'

¹ Yesu' lec Eun nang veng Yeri'hko' na'. Yam buih hpá Eun a heul' na', ² mawn' na' a kue' peue muis Sakae' ti peue. Eun meuh ro' peue cep' hkawn'. Eun meuneum nyawk'. ³ Sum' nyu eun Yesu' Eun cí na' meuh a'nhaw'. Daecti Sakae' na' meuh eun peue tem, eun un' cang nyu Yesu' Eun. Kopti peue heun' na' tawk' net ce puri na'. ⁴ Kop awn' na, punta kaw eun nyu Yesu' Eun na', eun hk'uih heul' nanggal'. Eun heul' huk' kleum' keutuic keunam hk'a' vang Yesu' kaw Eun ing' na'.

⁵ Yam Yesu' rot Eun mawn' na', Eun mung' ri lah' a ri heun, "Sakae', lih vaevae. Kaw Uí pun ri ing' it' ti nya mi seunyaen'." ⁶ Kop awn' na, Sakae' eun keulawn' lih ren'kawn rap ri ti Eun.

⁷ Yam peue heun' na' pun ce ri nyu a na', ce meunui'meunui' lah', "Eun vae' heul' meuh chec' peue map'."

⁸ Daecti Saka'e' eun cawng ri lah' a ri Yesu' Eun, "Cawo', keue' reu', tang' neum maet'maen' na' kaw ui' gvah vahtu' hk'il' leumuil ri na' ri peue hk'o'tukyak na' ce hpa' hk'eung. Ui' lawn caw ri chi'lai ri ti is' peue ko', ui' kaw tang sai' a pun' pun."

⁹ Yesu' Eun lah' a ri heun, "Seunyaen', Peucawo' htut Eun nyahk'ul' aen' a hawc'. Kopti peue aen' eun ku meuh kon' eun Abraham yeut. ¹⁰ Kopti punta kaw Eun sok ri teum'kawm htut peue rai' na' ce lawtpon na', Kon' ai' peue Eun lih."

Leukah' leupong' lawng leumuil kul' cawe

¹¹ Yam buih leuceng ce leukah' awn' a na', kopti kaw Eun hk'aws' rot keunam veng Yeru'salaem na', ce hteum' kuing' Eun Peucawo' na' a kaw keulawn' pucti lih na'. Yesu' Eun lah' leukah' leupong' ri ce. ¹² Eun lah', "Peue meuh ceu hkun' ti peue na' heul' eun nang kuing' seungai punta kaw eun ti an'nya hkun'haw'hkam' na', hawc' ko', eun kaw tang ing' na'. ¹³ Kop awn' na, eun klawng mhai' ri na' ce kul' peue. Eun tuil' leumuil ri ce ti peue ti cawe. Hawc' ko', eun tawm' ri uin' leukah' ri ce, 'Pe' na' ka leumuil aen' na rot yam ing' rot ui'."

¹⁴ Daecti peue hk'a'ruim eun na' ce ces ri heun. Ce plo'e' peue tang' tu' ri na' eun hot' eun heul' lah', 'Un' sum' is' ye kaw eun meuh hkun'haw'hkam' u'peung hk'a'pang ye.'

¹⁵ A saec' yeuh sa'nhaw', eun pun an'nya hkun'haw'hkam' na' eun tang ing' ti nya. Eun kah peue heul' klawng mhai' tuil' eun leumuil ri ce na' ce ing' hk'eup' ri. Eun sum' yawng ce ci' maet a'neng.

¹⁶ Mhai' ku' nanggal' na' eun ing' lah', 'Cawo', heul' ka ui' leumuil ti cawe mi na' ui' tang pun nammaet ka kul' cawe.'

¹⁷ Cawo' na' eun lah', 'Chak' ka, mhai' chak' ui'. Kopti leupaws seumeu' mi hk'a'naee ku' aet' na', mi na' u'peung veng kul' veng na' reu'.

¹⁸ Lal' peue ti peue na' eun ing' lah', 'Cawo', heul' ka ui' leumuil ti cawe mi na' ui' tang pun nammaet ka hpawn' cawe.'

¹⁹ Cawo' na' eun lah', 'Mi na' u'peung veng hpawn' veng na' reu'.

²⁰ Hawc' ko', mhai' nang ti peue na' eun ing' lah', 'Cawo', maen', leumuil ti cawe mi na'. Kao ui' ri uin' a nang hpen' na'. ²¹ Lhat' ui' ri mi, kopti meuh mi peue hkan' reng. Mi seut' ri ti vang un' uin'. Mi vuic ri ti vang un' puin'.

²² Cawo' na' eun lah', 'Mhai' rai aen' mi, kaw ui' taws' a' mu ri leukah' lah' mi na'. Yawng mi meuh ui' peue hkan' reng. Ui' seut' ri ti vang un' uin'. Ui' vuic ri ti vang un' puin' na'. ²³ A ci' yeuh keunhaw', mi vae' un' tuil' leumuil ui' na' ri peue keucan leumuil na' ce? Mi lawn yeuh a seun' awn' na ko', yam tang ing' rot ui' na', ui' ku na' tang pun leumuil ri na' keutah mae' nammaet ka na'.

²⁴ Hawc' ko', eun lah' a ri peue cawng keunam na' ce, 'Ti leumuil ti cawe eun na' hk'ai' heun, tuil' a ri ku' kue' kul' cawe na' eun reu'.

²⁵ Peue awn' ce lah', 'Cawo', kue' eun leumuil kul' cawe hawc'.

²⁶ Eun top' a, 'Lah' ui' a ri pe', ku' kue' na' ce ku peue ce kaw tang tuil' ce bae, daecti ku' un' kue' na' ce ku' kawn' vang ce na' a kaw tang hue' ri lih hk'ai' ce. ²⁷ Pun peue meuh ransu ri ui' ku' un' sum' kah ui' u'peung hk'a' pang ri na' ce ko', va ri ing' toh ce nanggal' ui' mawn' reu'."

Cawo' pe lec Eun nang veng Yeru'salaem

²⁸ Hawc' Yesu' lah' Eun a yeuh keutit' na', Eun tang suip hk'a' ri na' huk' nang veng Yeru'salaem na'. ²⁹ Yam huk' rot Eun nang yung' Bethpage' mae' yung' Betani' pang gong Sanlon na', Eun cus' tapae' lal' peue na' ka heul'. Eun

lah' a ri ka, ³⁰ “Heul' ri yung' ut' nanggá' teh' a reu'. Yam heul' lec pa' yung' teh' a ná, pa' kaw pun ri nyu rawngla aet' a'nhaw' un' nang duing pawk a ná mawt a ri teh'. Pa' ná kah' ri teuk' a heul' maen'. ³¹ Peue ti ri peue eun lawn ná lhon' ri mhaing' pa', ‘A cí yeuh keunhaw', pa' vaeé kah' a?’ pa' ná lah', ‘Cawo' lo' Eun a.’ ”

³² Yam tapae' cus' Eun la' peue ná heul' ka ná, ka pun ri nyu seun' a ku' lah' Eun ná. ³³ Yam buih kah' ka rawngla aet' ná, cawo' ka ná ce mhaing' ka, “A cí meuh kop keunhaw', pa' vaeé kah' rawngla aet' ná?”

³⁴ Ka top' a, “Cawo' lo' Eun a.”

³⁵ Hawc' ka teuk' rawngla aet' ná ing' ri Yesú Eun ná, ce lhup' hk'o dal' ri ná pang kui' ka ná. Yesú Eun pawk a. ³⁶ Yam pawk Eun a heul' ná, ce sawng' tawm hk'o ri ná nang gon' hk'a' ná heul'.

³⁷ Yam kaw Eun rot juil ka gong Sanlon ná, tapae' cum heun' ná ce ren'kawn klawng laws' suk'seun' Peucawo' Eun kopti pun ce ri nyu ku' hk'o'am' yeuh Eun gawm'euc' ná.

³⁸ Ce lah', “Nap mun' ri Hkun'haw'hkam' ing' hk'a'ruim muis Eun Peucawo' ná Eun.*

Kah a kue' hk'a' kuit nyawk' kuit sam'ran cumyen' nang kuing' pang maó ná. Pang lhung' hk'ai' peue ná kah Peucawo' Eun kue' munhpung'.”

³⁹ Peue Hparisae' ut' nang peue cum heun' ná ngon' ce lah' a ri Yesú Eun, “Seura', kah tapae' Mi ná ce dit'ti reu'.”

⁴⁰ Eun top' a, “Kaw Ui' lah' a ri pé, ce lawn dit'ti ko', seumu ná ce kaw klawng.”

⁴¹ Eun rot maeé veng ná. Yam pun Eun ri nyu veng Yeru'salaem ná, Eun yam ri veng ná. ⁴² Eun lah' a ri veng Yeru'salaem ná, “Seunyaen', sum' kah Ui' veng

* 19:38 19:38 Suk'seun' 118:26

Yeru'salaem na' mi yawng ku' kaw tuil' hk'a' kuit nyawk' kuit sam'ran cumyen' ri mi na', daecti maet'maen' ceu nang awn' ce a geup' ri ngai' mi na' hawc'. ⁴³ Seunyi yam awn' na kaw a rot yam ransu mi na' kaw ce kung' ri is' tawp suik' ri mi, ce na' vet mi rop. ⁴⁴ Ce kaw yat ti dhim' mi pang bhen' keute' na', mi ri mae' kon'hk'i mi hk'a'naee hkui veng mi na'. Ce kaw un' laee uin' seumu na' po ri hk'a' pang puri saec' ti meul', kopti un' pawn mi yam Peucawo' lih Eun ri mi na'."

Yesu' huk' Eun nang nya hk'o' mun' keuting

⁴⁵ Hawc' awn' na, Eun lec nang kang' hkung' ka nya hk'o' mun' keuting na'. Eun ra ri tec peue paing' hk'eung na' ce pucti heul'. ⁴⁶ Eun lah' a ri ce, "Kue' a leukah' tem' ri yeuhki', 'Nya Ui' na' meuh a vang hk'o' mun'†, daecti pe' yeuh a meuh vang hk'on'ro con'‡"

⁴⁷ Eun sangsawn' nang nya hk'o' mun' keuting na' ku seunyi. Daecti ro' peue jhawp' rit keuting na' ce mae' peue guil leukah' ritroe na' ce mae' ro'kan peue kuing' na' ce sok hk'a' kaw ri toh Eun. ⁴⁸ Daecti ce un' nyu hk'a' kaw ri toh Eun, kopti peue gawm'euc' na' sum' leuceng ce leukah' sangsawn' Eun na' nyawk'.

20

Leukah' mhaing' lawng ti'ca Eun Yesu'

¹ Kue' a ti seunyi yam Yesu' buih sangsawn' Eun peue heun' na' ce ri leukah' mun' ren'kawn nang kang' hkung' ka nya hk'o' mun' keuting na', ro' peue jhawp' rit, peue guil leukah' ritroe mae' nang kawt na' ce cu ri huk' mae' Heun. ² Ce lah' a ri Heun, "Mi na' lah' ye mhawng', Mi yeuh ceu nang aen' ce na', Mi ci' cu ti'ca keunhaw' yeuh a? A'nhaw' ci' tuil' ti'ca aen' a ri Mi?"

† 19:46 19:46 I'saya' 56:7 ‡ 19:46 19:46 Yerami' 7:11

³ Yesú Eun top' a, "Uí ku kaw mhaing' pé ti moeng yeut. Pé ná lah' Uí mhawng', ⁴ 'A'nhaw' cí tuil' tí'ca tuil' hk'a' cum' ná ri Yo'han eun, neum kuing' pang maó aw, a'ko' neum peue aw?"

⁵ Ce sa'lit puri lah', "E' lawn top' lih a neum kuing' pang maó ko', Eun kaw tang cang mhaing' e', 'A cí yeuh keunhaw' pé vaeé un' yum' eun?" ⁶ Daecti e' lawn top' lih a neum peue ko', peue heun' ná ce ku kaw cang dhim' e' ri seumu. Kopti yum' ce Yo'han meuh eun peue suip leukah' Eun Peucawó ná."

⁷ Kop awn' na, ce top' a ri Heun, "Un' yawng ye pun Eun a neum tawngnhaw'."

⁸ Yesú Eun lah', "Yeuh keutit' ko', Uí ku hkuin' kaw lah' pé mhawng' cu Uí tí'ca keunhaw' Uí yeuh ceu nang aen' ce yeut."

Leukah' leupong' lawng sang' hpa' val plí' bui

⁹ Hawc' ko', Eun sangsawn' leukah' leupong' ri peue heun' ná ce. Eun lah', "Peue ti peue ná sang' eun val plí' bui, eun tuil' peue sang' val ná ce sang' hpa' a. Hawc' ko', eun heul' nang kuing' tawk seubu ling'. ¹⁰ Yam rot a yam poc' plí' bui ná, punta kaw eun ti plí' ku' kaw eun htuk' ri pun ná, eun kah mhai' ri ná eun heul' ri peue sang' hpa' val ná ce. Daecti peue sang' hpa' val awn' ce peum' eun, ce ploé' eun ing' neh. ¹¹ Eun tang kah mhai' seubu ná eun heul' ri ce bae. Daecti ce ku peum' eun, yeuh ku' hk'o'kleh' ri heun. Hawc' ko', ce ploé' eun ing' neh yeut. ¹² Eun ku tang kah mhai' hton loé' peue ri ná eun heul' bae. Ce ku peum' eun sui'. Hawc' ko', ce ti ri tec eun.

¹³ Hawc' ko', cawó ka val plí' bui ná eun lah', 'Uí cí kaw htuk' ri yeuh sa'nhaw'? Kaw uí kah kon' me leumeus' ri ná eun heul' ri ce ceu. Ná ce chak' ri hkopyawm' ri heun.'

¹⁴ Daecti yam peue sang' hpa' val ná nyu ce kon' me eun cawó val ná eun ná, ce sa'lit puri lah', 'Peue aen' meuh

eun peue pun sin'. Pawh, e' toh eun. Sin' eun na' a na' meuh is' e'.¹⁵ Kop awn' na, ce jong' ri tec eun hk'a' nok ka val na'. Hawc' ko', ce toh eun yeum. Kop awn' na, cawo' val na' eun ci' kaw yeuh sa'nhaw' ri ce? ¹⁶ Kaw eun tang ing' toh peue sang' hpa' val awn' ce. Hawc' ko', eun kaw tang tuil' nang seubu ce sang' hpa' val awn' na." Yam peue heun' na' pun ce ri mhawng' leukah' awn' a na', ce lah', "Pawlæe kah a meuh yeuh keutit'."

¹⁷ Yesu' Eun seuluil' ce. Eun lah', "Leukah' tem' ri aen' na, a ci' sum' lah' keunhaw'?"

'Seumu peue go' nya na' tec ce hawc' na',
maet'maen' meuh a seumu kleum' ka nya vang a'ye'
keuting hk'ai' seumu seubu na' hawc'.*

¹⁸ A'nhaw' lawn htang'meul pang seumu awn' a ko', eun kaw bet'. Daecti seumu awn' a lawn hk'uic' teng' a'nhaw' ko', eun kaw bet' nyai'lheo'."

¹⁹ Peue guil leukah' ritroe na' ce mae' ro' peue jhawp' rit keuting na' ce keulawn' sok hk'a' kaw ri mheut' ri ti Eun, kopti yawng ce leukah' leupong' awn' lah' a ti ri na'. Daecti ce lhat' ri peue heun' na' ce.

Seue' hkawn' ri cawo' Kae'sa eun

²⁰ Ce plo'e' peue htom' jem' na' ce yeuh ri seun' meuh ri peue leupaws seumeu' heul' htom' de Eun. Ce keutui' hpum' kaw ri mhawng' Yesu' leukah' kleuc' Eun na'. Punta kaw ce tuil' Eun hkam' hk'a' taws' a'mu hk'a'ruim ti'ca hkun'cawo' na'. ²¹ Peue htom' jem' na' ce ing' mhaing' Eun, "Seura', yawng ye sangsawn' lah' Mi ku' seumeu'. Mi un' meuh mae' hk'a'mawn' hk'a'maen', daecti Mi sangsawn' a hot' hk'a' Eun Peucawo' na' neumneum. ²² Kaw ye htuk' ri seue' hkawn' ri cawo' Kae'sa eun aw, a'ko' un' seue' aw?"

* 20:17 20:17 Suk'seun' 118:22

²³ Kopti Yesu' yawng Eun tung' ce ri ri ti na', Eun lah' a ri ce, ²⁴ "Tuil' Uí' nawk paec ti htaep', htaep' na' a cí' kue' rup a'nhaw', muis a'nhaw'?"

²⁵ Ce top' a, "Meuh a cawo' Kae'sa eun." Hawc' ko', Yesu' Eun lah', "Hk'eung eun cawo' Kae'sa na' tuil' a keutah ri cawo' Kae'sa eun. Hk'eung Eun Peucawo' na' tan a keutah ri Peucawo' Eun."

²⁶ Kopti un' cang pun ce leukah' kleuc' lah' Eun nanggal' peue heun' na', ce dit'ti. Kopti am' ce ri leukah' top' Eun na'.

Tang kuh' im' mae' ti puri

²⁷ Peue Sadu'kae' lah' tang kuh' im' a un' kue' na' ce ngon' ce ing' mhaing' Yesu' Eun, ²⁸ "Seura', Mo'se tem' eun ri tawm' ri uin' a pun ye yeuhki', 'Peue ti peue eun lawn yeum yam un' nang kue' ri kon' ko', punta kaw eun kue' kon' suip' ceucat ri na', ec' eun a'ko' awng' eun na' eun kaw kah ri tang ti beun' awn' eun.' ²⁹ Kue' a awng' ec' a' res peue. Nang ec' na' eun ti ri is' beun', daecti eun yeum yam un' nang kue' ri kon'. ³⁰ Rot ti A'nyi na' eun, ³¹ rot ti Aisam' na' eun ce ti beun' awn' eun. Awng' ec' awn' ce rot a' res peue ce ti beun' awn' eun. Ce un' tawn ri kue' kon', ce yeum gawm' euc' ri. ³² Vang tisut' ka na', beun' awn' eun ku yeum. ³³ Yam tang kuh' im' na', beun' awn' eun cí' na' meuh beun' a'nhaw' ri ce, kopti ti ce beun' awn' eun gawm' a' res peue ri na'?"

³⁴ Yesu' Eun top' a, "Peue cu cat maet' maen' na', ti puri mae' kui' puri na' kue' ka. ³⁵ Daecti peue kuing' ri pun hk'a' tang kuh' im' cu cat na' na' ce ko', ti puri mae' kui' puri na' a hkuin' kaw laee kue'. ³⁶ Ce ku un' laee pun ri yeum bae, kopti kaw ce keut' ri seun' in' hpom na' ce. Ce meuh kon' hk'i Eun Peucawo', kopti meuh ce kon' tang kuh' im' na'. ³⁷ Daecti hk'a' naee lawng bang' yuim na', Mo'se eun ku tuh' e' nyu peue yeum na' kaw ce tang kuh'

im' yeut, kopti klawng eun Peucawo' Eun meuh Peucawo' eun Abraham, Peucawo' eun I'cak' maeé' Peucawo' eun Yakop'.† 38 Peucawo' un' meuh Eun Peucawo' ce peue yeum na', daecti meuh Eun Peucawo' ce peue a'yu im' na'. Kopti pun Peucawo' Eun na', peue gawm'euc' a'yu im' peue.”

39 Peue guil leukah' ritroe na' ngon' ce lah', “Seura', ku lah' Mi na' cawp' nyawk' ka.” 40 Tang' neum yam awn' a na', a'nhaw' hkuin' laee hat' ri mhaing' Eun baeé saec' ti peue.

Hkrit Eun ci' meuh kon' a'nhaw'?

41 Hawc' ko', Eun lah' a ri ce, “Lah' peue Hkrit Eun meuh Kon' ai' eun Davit' na', a ci' kaw cang meuh yeuh sa'nhaw'? 42 Kopti tu' eun Davit' na' lah' eun a hk'a'naee htawm Suk'seun' na' yeuhki',

‘Peucawo' lah' Eun a ri Cawo' ui' na' Eun,
“Mok' hk'a' a'tawm' Ui' na'

43 rot ti yeuh Ui' ransu Mi na' ce
meuh vang tang' cung Mi.” †

44 Davit' eun ku vaeé' klawng Eun meuh Cawo', Eun ci' kaw cang meuh kon' eun Davit' yeuh sa'nhaw'?”

45 Yam peue gawm'euc' na' leuceng ce a na', Yesu' Eun lah' a ri tapae' ri na' ce, 46 “Uin' sati ri peue guil leukah' ritroe na' ce reu'. Sum' cuip' ce hk'o dal' eo' ri. Ce sum' kah peue luisa ri nang keulas. Ce sum' mok' ri vang mok' a'ye' keuting hk'ai' peue hk'a'naee sa'la vang hk'o mun' na' maeé' vang hk'asom' na'. 47 Ce rutrim' ri ti nya ce a'ya seunao. Ce yeuh ri hk'o' mun' ling'lang' sum' kah peue nyu ri. Ce kaw pun ri hkam' hk'a' ciyang reng na' lheu' peue ri.”

† 20:37 20:37 Pucti heul' 3:6 † 20:43 20:43 Suk'seun' 110:1

21

Paec tan a'ya seunao

¹ Yam Yesu' seucon' Eun na', Eun nyu peue meuneum na' seué ce leumuil tan hk'a'naee vang tan leumuil ka nya hk'o' mun' keuting na'. ² Eun ku nyu a'ya seunao hk'o'tukyak na' seué ka paec aet' lal' paec yeut. ³ Eun lah', "Kaw Ui' lah' a ri pé neumneum, a'ya seunao hk'o'tukyak aen' tan ka heun' hk'ai' peue gawm'euc'. ⁴ Kopti ce ri, hue' ce a lih vang kue' ri heun' na' ce tan a. Daecti beun' aen' ka ko', ka saec' hk'o'tukyak, ka ku tan ku' kaw uii' a'yu ri na' gawm'euc' ka."

Het' kaw hk'aws' rot yam tisut'

⁵ Ku' yong' ka nya hk'o' mun' keuting seumu chak' ngam maeé ku' tan ri Peucawo' Eun aen' ce na', yam tapae' na' ngon' lah' ce a ri puri na', Yesu' Eun lah' a, ⁶ "Ku' pun pé ri nyu aen' ce, kaw a rot yam seumu po ri hk'a'pang puri na' un' laee vang a saec' ti meul'. A kaw pun ri seut' ri tec ri ku meul' ri."

⁷ Ce mhaing' Eun, "Seura', ceu nang tit' ce a ci' kaw meuh yamnhaw'? Punta kaw e' yawng yam awn' kaw a hk'aws' meuh na', a ci' kaw kue' het' keunhaw'?"

⁸ Eun top' a, "Punta kaw peue un' cang cop' ri ti pé na', uin' sati ri reu'. Kopti peue heun' na' kaw ce peus muis Ui' na' ce na' ing' lah', 'Meuh ui' Heun ri', maeé 'Yam ka na' kaw a hk'aws' rot hawc'. Pé na', pawlaee hot' ce heul'. ⁹ Yam pun pé ri mhawng' lawng peueng' suik' maeé kuing' na' fuin a ri na', pawlaee hpum' seuyuk. Lawng aen' kaw a kah ri meuh nanggal', daecti a hkuin' kaw nang keulawn' rot yam tisut' na'."

¹⁰ Hawc' ko', Eun lah' a ri ce, "Peue ti ceu hawc' ti ceu, kuing' ti kuing' hawc' ti kuing', peue kaw kleuc' puri.

¹¹ A kaw kue' in'san' keuting heun' pok, ut' ngeup' maeé

peuyhat a'nga heun' duih'. Ku' hk'o'lhat' nyawk' maeé' het' keuting neum pang mao' na' a kaw pucti.

¹² Daecti nanggal' yam aen' ce gawm'euc' un' nang meuh ka na', peue kaw mheut' ri keunhap' pé'. Ce kaw cus' pé' heul' nang sa'la vang hk'o' mun' na' maeé' nang htawng' na'. Ce kaw va pé' heul' ri hkun'haw'hkam' maeé' cawo' veng na' ce. Aen' ce gawm'euc' a meuh kopti muis Ui' na'. ¹³ A meuh kopti aen' na, pé' kaw pun ri hkam' sa'hki' ri ce. ¹⁴ Daecti kuit a deut nang hpum' pé' na' nanggal', kaw pé' un' hki'keung ri ku' kaw ri top' kah' na'. ¹⁵ Kopti punta ransu pé' na' kaw ce un' cang htu'hting' to'tam' pun pé' na', Ui' kaw tuil' cu'yi leukah' ri pé'. ¹⁶ Saec' meuh makuiing', awng'ec', ec'awng' maeé' a'mawo pé' na' ce kaw fuin pé'. Ce kaw toh pé' yeum ngon'. ¹⁷ Kopti meuh a Ui' ri, peue gawm'euc' peue kaw nyu pé' pereng ri. ¹⁸ Daecti huik' cing' pé' na' a hkuin' kaw lu saec' ti nyeng. ¹⁹ Kopti cang hpum' keutawn' pé' na', pé' kaw pun ri a'yu im'.

²⁰ Yam pun pé' ri nyu muk suik' na' rop ce nang veng Yeru'salaem na', pé' kaw yawng veng awn' kaw a hk'aws' rot yam lu ka. ²¹ Yam awn' na, peue ut' nang kuing' Yu'da na' kah ce hk'uih huk' nang gong, peue ut' nang veng na' kah ce pucti hk'uih, peue ut' hk'a'nok veng na' ce pawlaee tang ing' nang veng. ²² Kopti sa'hkat' yam awn' na meuh ka sa'hkat' yam ciyang, aen' a meuh punta ku' tem' ri nang htawm na' kaw a htonnuk na'. ²³ Sa'hkat' yam awn' na kaw a meuh ku' hk'o'lhat' keuting pun a'ya nyhel' maeé' nang kue' kon' pui na' ce. Ku' kuit nyhap' nyawk' na' kaw a rot pang bhen' keute' aen' na. Hk'a' seungeueng' peulel Eun Peucawo' na' kaw a rot hk'a'pang peue aen' ce. ²⁴ Ce kaw pun ri yeum ri leungawng. Peue kaw mheut' ce meuh peue htawng' teuk' ce heul' ku kuing'. Peue ceu seubu na' ce kaw jap'buin veng Yeru'salaem na' rot ti sa'hkat' ce na'

htonnu'ka.

²⁵ A kaw kue' het' hk'a'naee seunyi, a'chi', seumeueng' na' ce. Pang bhen' keute' na', peue ceu ku ceu peue kaw kuit nyhap' kuit yak kvang'mawo ri mha'seumut' na', mae' ba leuum' na' seng' laws' ka. ²⁶ Peue kaw un' pawn kui' ri, kopti lhat' nyawk' peue ri ku' kaw kue' pang bhen' keute' na' kopti ti'ca ka mao' na' ku ceu ka a kaw pun ri keuyuih' fui'fai'*. ²⁷ Yam awn' na, peue kaw pun ri nyu Kon' ai' peue na' lih Eun hk'a'naee putum' na' ri munhpung' ti'ca keuting ri na'. ²⁸ Yam ceu nang tit' tang' a ri kue' meuh na', pe' na' kuh' cawng ri mung' reu'. Kopti de mi kaw ri pun hk'a' htut lawtpon na' hawc'."

²⁹ Yesu' keutec Eun leukah' leupong' ri ce, "Keue' ri kleum' pli' keutuic na' mae' kleum' hku' na' ce gawm'euc' ka reu'. ³⁰ Yam gluh' ka na', pe' yawng meun kaw a hk'aws' rot yam kuc'. ³¹ Seun' awn' na, yam pun pe' ri nyu ceu nang awn' kue' meuh ka na', pe' kaw yawng kuing' Eun Peucawo' na' kaw a hk'aws' rot hawc'.

³² Kaw Ui' lah' a ri pe' neumneum, cu yam peue maet'-maen' na' un' nang pon ce na', ceu nang aen' ce gawm'euc' a kaw meuh neum. ³³ Mao' na' mae' bhen' keute' na' kaw a rai', daecti leukah' Ui' na' a hkuin' kaw rai'.

³⁴ Uin' sati ri meulamlam ri reu', un' meuh ko', kaw pe' hk'ui'c' hpum' ri ku' ren'kawn pang bhen' keute' na', ku' cang yuic' mae' ku' kuit nyhap' ri a'yu pe' na'. Seunyi yam awn' na kaw a rot pang pe' yam un' pawn pe' kui' ri seun' hk'i' pe' hk'ai na'. ³⁵ Kopti seunyi meuh yam awn' na kaw a rot hk'a' pang peue ut' pang bhen' keute' na' peue gawm'euc'. ³⁶ Punta kaw pe' cang pon ku' kaw meuh awn' ce gawm'euc' na' mae' kaw pe' cang cawng nanggal' Eun Kon' ai' peue na', saec' yamnhaw', ko' meulamlam ri hk'o' mun' reu'."

* 21:26 21:26 I'saya' 13:10; 34:4

³⁷ Yesu' Eun sangsawn' nang kang' hkung' ka nya hk'o' mun' keuting na' keuyuit. Eun heul' it' pang gong Sanlon na' ku bul. ³⁸ Punta kaw ce leuceng Eun na', peue gawm'euc' na' ce ing' cu ri nang kang' hkung' ka nya hk'o' mun' keuting na' tang' neum peunngup cawo na'.

22

Yu'das' kuit deut eun ri kaw fuin Yesu' Eun

¹ Maet'maen' kaw a hk'aws' rot pawe un' seue' hkawom-un' is' paeng na', a lah' ri meuh pawe vel nya. ² Ro' peue jhawp' rit na' ce mae' peue guil leukah' ritroe na' sok ce hk'a' kaw ri toh Yesu' Eun, kopti lhat' ce ri ku' peue heun' na' kaw ce yeuh na'. ³ Hawc' ko', Satan na' a lec hk'a'naee eun Yu'das' ku' muis I'sakariot' na'. Eun meuh tapae' hk'a'naee tapae' kul'leual' peue na' ce. ⁴ Yu'das' eun heul' ri ro' peue jhawp' rit na' ce mae' ro' peue ko' nya hk'o' mun' keuting na' ce. Eun ci' kaw fuin Yesu' Eun yeuh sa'nhaw' na', eun sa'lit a ri ce. ⁵ Ce ren'kawn nyawk'. Ce sahpaw' ri kaw tuil' eun is' leumuil. ⁶ Eun ku sahpaw' ri ti a. Punta kaw eun ap fuin Yesu' Eun ri ce yam peue heun' na' un' ut' ce na', eun sok yam htuk' lai ri na'.

Som' pul pok tisut'

⁷ Yam rot a seunyi pawe un' seue' hkawomun' is' paeng na', a meuh yam kah ri tan kon'jung' ka pawe vel nya na'. ⁸ Yesu' Eun lah' a ri Petru' eun mae' Yo'han eun, "Heul' rangraen ku' hk'a' pawe vel nya pun e' reu'."

⁹ Ka mhaing' Yesu' Eun, "Mi ci' sum' kah ya na' rangraen a tawngnhaw'?"

¹⁰ Yesu' Eun top' a, "Yam lec pa' nang veng na', a'ta' gui keutong' leuum' ti peue na' kaw eun ing' hk'eup' pa'. Pa' na' hot' ri lec nya lec eun na'. ¹¹ Pa' na' mhaing' cawo' nya na' eun, 'Seura' mhaing' Eun hkawng ut' chec' vang

kaw Eun hk'a pawe vel nya tiduih' maeé tapae' Eun ná ce, a cí meuh tawngnhaw?' ¹² Eun kaw tuil' pa' nawk hkawng keuting htan hk'a'tuh hk'iu' ri meulamlam ri ná, rangraen pawe vel nya ná ri ka reu'."

¹³ Ka ku heul' hk'eup' seun' a ku' Yesu' lah' Eun ná. Kop awn' na, ka rangraen pawe vel nya ná ri ka.

¹⁴ Yam rot a yam ka ná, Yesu' Eun maeé peue caee ná ce ku mok' ri som' maeé hpuin' ná. ¹⁵ Eun lah' a ri ce, "Yam un' nang hk'eup' Ui' ku' tukhka ná, Ui' sum' hk'a pawe vel nya aen' na maeé pé nyawk'. ¹⁶ Kaw Ui' lah' a ri pé, rot ti pawe vel nya ná htonnuk a nang kuing' Eun Peucawo' ná, Ui' hkuin' kaw laee hk'a pawe vel nya ná bae."

¹⁷ Hawc' Eun ti kawc' ná, Eun mun' keuting ri Peucawo' Eun. Hawc' ko', Eun lah', "Gvah pé nyui kawc' aen' na reu'.

¹⁸ Kaw Ui' lah' a ri pé, rot ti kuing' Eun Peucawo' ná un' nang rot ka ná, Ui' hkuin' kaw laee nyui leuum' pli' bui ná bae."

¹⁹ Hawc' Eun ti hkawomun' ná, Eun mun' keuting ri Peucawo' Eun. Hawc' ko', Eun ves ri tuil' hkawomun' ná ri ce. Eun lah', "Aen' meuh a tu' Ui', Ui' tuil' a ri pé. Punta kaw pé kuit rot ri Ui' ná, pé ná yeuh aen' a reu'."

²⁰ Seun' awn' na, yam sak' som' pul ce ná, Eun ti kawc' ná, Eun lah', "Kawc' aen' meuh a kati sat'ca' hk'u' hk'a'naee nham' Ui'. A bah lhaee' pun pé. ²¹ Daecti ku' kaw fuin Ui' ná eun ku ruim hpuin' som' maeé Ui'. ²² Kon' ai' peue ná Eun kaw hot' seun' ku' tang' ri uin' ri ná. Daecti peue fuin Kon' ai' peue ná eun kaw pun ri hkam' hk'a' jha' ná." ²³ Tapaé ná ce mhaing' puri, "Hk'a'naee e', a'nhaw' cí kaw yeuh ku' yeuh keutit' ná?"

²⁴ Ce ku htu'hting' puri, "Hk'a'naee e', a'nhaw' cí kaw keuting hk'ai' peue?" ²⁵ Yesu' Eun lah' a ri ce, "Hkun'haw'hkam' ce peue ceu seubu ná u'peung ce hk'a'pang ce. Ku' caee tí'ca ri hk'a'pang ce ná ce lah' meun

ri meuh cawo' mun'. ²⁶ Daecti pé' htuk' ri un' meuh yeuh keutit'. Lheú' awn' na, ku' keuting hk'ai' peue hk'a'naee pé' na' eun ko', eun htuk' ri yeuh ri seun' nang aet' hk'ai' peue. Saec' meuh cawo' u'peung peue na' eun, yeuh ri seun' mhai' reu'. ²⁷ Kopti ku' mok' maeé' hpuin' na' eun maeé' ku' yeuh mhai' eun na' eun, a'nhaw' ci' keuting ri ka? Meuh a ku' mok' maeé' hpuin' na' eun, un' meuh ka aw? Daecti yam ut' Uí' hk'a'naee pé' na', Uí' yeuh ri seun' mhai' ko'. ²⁸ Meuh pé' peue ut' maeé' Uí' yam pun Uí' ri hkam' ku' tukhka na'. ²⁹ Seun' Kuing' Uí' tuil' Eun kuing' na' ri Uí' na', Uí' ku kaw tuil' kuing' na' ri pé'. ³⁰ Kop awn' na, pé' kaw pun ri hk'asom' maeé' hpuin' Uí' nang kuing' Uí' na'. Pé' kaw pun ri mok' pang ten na' taws' a' mu ri peue I'sarela' kul'leual' ceu na' ce.

³¹ Sí'mon, Sí'mon, Satan na' hk'o' pun a ri kaw hk'eung' pé' seun' gu' ngho' na' hk'eung' a ri na' hawc'. ³² Daecti, Sí'mon, punta hk'a' yum' mi na' kaw a un' lhu'jah na', hk'o' Uí' mun' pun mi hawc'. Yam tang hpawt' mi ri ing' hawc' na', mi na' tuil' kaw' reng ce ec'awng' ri na' reu'."

³³ Daecti Petru' eun lah', "Cawo', saec' meuh nang htawng' un' lah', vang yeum un' lah', rangraen ui' ri kaw hot' Mi hawc'."

³⁴ Yesu' Eun top' a, "Petru', kaw Uí' lah' a ri mi, bul seunyaen' nanggal' el' un' nang leuo' ka na', kaw mi lah' ri un' yawng Uí' hton loe' pok."

³⁵ Hawc' ko', Eun mhaing' ce, "Yam un' kah Uí' pé' pin' tep paec, huil' maeé' jhaep' heul' na', kawn' kue' pé' ku' cut ti ri ceu aw?"

Ce top' a, "Uih', un' kue' ka saec' ti ceu."

³⁶ Eun lah', "Daecti maet' maen', nang kue' tep paec pin' a heul', nang kue' huil' ku pin' a heul'. A'nhaw' un' nang kue' leungawng ko', paing' hk'o' ri leuvae ri is' leungawng reu'. ³⁷ Tem' a ri uin' ri kue' yeuhki', 'Kaw peue sawn' ri uin'

Eun maeé' peue yeuh kleuc' ri leukah' ritroe na' ce.* Kaw Uí' lah' a ri pé', leukah' tem' ri na' kaw a pun ri htonnuk nang Uí'. Cawp' ka yeut, lawng Uí' a tem' ri na' kaw a kah ri htonnuk."

³⁸ Tapae' na' ce lah', "Cawo', keue' reu', kue' a leungawng maen' lal' hten'."

Eun top' a, "Hk'o' ka hawc'."

Yesu' hk'o' Eun mun' pang gong Sanlon

³⁹ Hawc' awn' na, Eun pucti heul' pang gong Sanlon seun' ku' tawn yeuh Eun na'. Tapae' Eun na' ce ku hot' Eun heul' yeut. ⁴⁰ Yam rot ce teh' na', Eun lah' a ri ce, "Punta kaw pé' un' pun ri hk'ui'c' hk'a'naee hk'a' cop'long na', hk'o' mun' reu'." ⁴¹ Neum vang tapae' na' ut' ce na' hk'ao ti cu nyon seumu na', Eun heul' seukluin ri hk'o' mun' lah' a, ⁴² "A'kuiing', a lawn htuk' hpum' Mi ko', hk'o' Mi ti kaw' aen' na heul' hk'ai' Uí'. Daecti pawlaee kah a meuh alo Uí', kah a htonnuk hot' alo Mi na'." ⁴³ In'hpom ti peue na' eun pucti lih tuil' kaw' reng Eun. ⁴⁴ Kopti Yesu' kuit nyhap' Eun nyawk' na', Eun gawm sae'caee' hk'o' mun' ri. Leuum' ron Eun na' a lih seun' nham', a jam pang keute' na'.

⁴⁵ Yam hawc' Eun hk'o' mun' ri na', Eun yuk ti ing' ri tapae' ri na' ce. Eun ing' nyu tapae' ri na' it' ce. Kopti hpum' lu nyawk' ce na', ce kluit'kloe. ⁴⁶ Eun mhaing' ce, "Pé' cí' yeuh keunhaw', pé' vae' kawn' meung it' ri? Punta kaw pé' un' pun ri hk'ui'c' hk'a'naee hk'a' cop'long na', kuh' hk'o' mun' reu'."

Mheut' Yesu' Eun

⁴⁷ Yam kawn' buih lah' Eun a na', hk'a'naee tapae' kul'leual' peue ku' muis Yu'das' na' eun va peue cum heun' na' ce ing'. Punta kaw eun huit' Yesu' Eun, eun ing' keunam Eun na'. ⁴⁸ Daecti Yesu' Eun mhaing' eun,

* 22:37 22:37 I'saya' 53:12

“Yu'das', kaw mi fuin Kon' ai' peue na' Eun ri huit' ri na' aw?”

⁴⁹ Yam peue hot' Yesu' Eun na' pun ce ri nyu a ci' kaw meuh ku' yeuh sa'nhaw' na', ce lah', “Cawo', kaw e' bhat' ce ri leungawng na' a chak' aw?” ⁵⁰ Hawc' ko', tapae' ti peue na' eun bhat' yhuk' a'tawm' eun mhai' eun peue jhawp' rit keuting na' deut.

⁵¹ Daecti Yesu' Eun lah', “Peunaw', pawlaee yeuh a bae.” Hawc' ko', Eun paic' yhuk' eun mhai' awn' na. Eun bai' eun cuin.

⁵² Hawc' ko', Yesu' Eun lah' a ri peue kaw ing' mheut' ri, meuh ro' peue jhawp' rit, peue ko' nya hk'o' mun' keuting na' mae' nang kawt na' ce, “Meuh Ui' peue fuin kuing' aw, pe' vae' jang' leungawng jang' hku' ing'? ⁵³ Ut' Ui' mae' pe' nang kang' hkung' ka nya hk'o' mun' keuting na' keuyuit, pe' hkuin' mheut' ri ti Ui'. Daecti yam maet' maen' na' a meuh yam pe', a meuh yam ti'ca duim'lawng na' u'peung ka.”

Petru' quil eun ri un' yawng Yesu' Eun

⁵⁴ Ce mawt ri va Yesu' Eun heul' ri nya eun peue jhawp' rit keuting na'. Petru' eun ut' vang ca ri seungai na' eun hot' ce heul'. ⁵⁵ Daecti yam puing' ce ri cuil ngawl nang ngon' keuleung ka sa'nam' na', Petru' eun ku ing' mok' mae' ce. ⁵⁶ Beun' meuh mhai' ti peue na' yam nyu ka Petru' mok' eun ri ceng' ka ngawl na', ka seuluil' eun. Ka lah', “Hkawn' eun ku ut' mae' Heun yeut.” ⁵⁷ Daecti Petru' eun htu'hting' ka, eun lah', “Kon' beun', hpaw ui' ca' yawng Eun.”

⁵⁸ Hawc' awn' na ti yam, ku' seubu ti peue na' eun tang nyu Petru' eun. Eun lah', “Mi ku meuh cum ce ti peue yeut.” Petru' eun lah', “Hkawn' mi, hpaw a ca' meuh ui' ri.”

⁵⁹ Bae h'ao ti nali ná, ku' seubu ti peue ná eun lah' reng ri htawhkam a, "Hkawn' meuh eun peue ut' maeé Heun neum, kopti meuh eun peue Galilae' ná." ⁶⁰ Petru' eun top' a, "Hkawn' mi, hpaw uí' ca' yawng ku' lah' mi ná." Yam Petru' un' nang hawc' eun lah' ri a ná, el' ná a keulawn' leuo'. ⁶¹ Yam awn' na, Yesu' Eun hpawt' ti keue' ri Petru' eun. Petru' eun kuit rot ri ku' Yesu' lah' Eun ri ti yeuh keutit' ná, "Bul seunyaen' nanggal' el' un' nang leuo' ka ná, kaw mi guil ri un' yawng Uí' loe' pok." ⁶² Petru' eun pucti heul' hpum' sic'sawng' yam hk'a' nok ná.

Lah' ri pleh keunyas Yesu' Eun

⁶³ Peue ko' kawn Yesu' Eun ná ce lah' ri pleh keunyas Eun, peum' Eun. ⁶⁴ Ce mawt ngai' Eun ná, hawc' ko', ce mhaing' Eun, "A'nhaw' cí' klaee' Mi, cop, lah' a." ⁶⁵ Ce lah' leukah' un' nawpsang hk'omhk'uik ná ri Heun.

Muk peue taws' kan' ná taws' ce a'mu ri Yesu' Eun

⁶⁶ Yam ceng' ka ná, muk peue taws' kan' nang kawt ce peue Yu'da ná ce maeé ro' peue jhawp' rit ná ce maeé peue guil leukah' ritroe ná yam ing' hk'om ce puri ná, ce va Yesu' Eun ing' nanggal' ce ná. ⁶⁷ Muk peue taws' kan' ná ce lah', "Mi lawn meuh Hkrit ko', lah' a ri ye." Yesu' Eun top' a, "Uí' lawn lah' a ri pé' ko', pé' ku kaw un' yum' a. ⁶⁸ Uí' lawn mhaing' pé' ko', pé' ku kaw un' top' a. ⁶⁹ Daecti tang' neum seunyaen' ná, Kon' aí' peue ná kaw Eun mok' hk'a' a'tawm' Eun Peucawo' Cawo' tí'ca keuting ná."

⁷⁰ Ce ri gawm'euc', ce mhaing' Eun, "A lawn yeuh keutit' ko', meuh Mi Kon' aí' Peucawo' aw?"

Eun top' a, "Meuh Uí' seun' ku' lah' pé' ná cawp' ka yeut."

⁷¹ Hawc' ko', ce lah', "E' cí' kawn' kaw lo' sa'hki' bae yeuh sa'nhaw'? Kopti pun é' ri mhawng' ku' lah' meun Eun ri moeng ri ná hawc'."

23

Va Yesu' Eun heul' ri cawo' Pi'lat

¹ Hawc' ko', peue hk'om na' ce gawm'euc' ce yuk ri kuh' va Yesu' Eun heul' ri cawo' Pi'lat eun. ² Ce tang' a'mu ri Heun. Ce lah', "Pun ye ri yawng peue aen' cu' Eun ku' kleuc' ri peue ceu ye na' ce. Eun ham' peue seue' hkawn' ri cawo' Kae'sa eun na' ce. Eun ku lah' meun ri meuh Hkrit, meuh hkun'haw'hkam' yeut."

³ Kop awn' na, cawo' Pi'lat eun mhaing' Yesu' Eun, "Meuh Mi hkun'haw'hkam' ce peue Yu'da na' aw?"

Yesu' Eun top' a, "Euh, seun' a ku' lah' mi na' yeut."

⁴ Hawc' ko', cawo' Pi'lat eun pao' a ri peue jhawp' rit keuting mae' peue cum heun' na' ce, "Hpaw ui' ca' nyu ku' kleuc' Eun peue aen' na."

⁵ Daecti ce gawm sae'caee' lah', "Eo' Eun ri cuk'cic' sangsawn' peue gawm' kuing' Yu'da na' tang' neum hot' hk'a' kuing' Galilae' na' rot maen'."

Va Yesu' Eun heul' ri cawo' Herot'

⁶ Yam cawo' Pi'lat pun eun ri mhawng' leukah' awn' a na', eun mhaing' ce, "Meuh Eun peue Galilae' aw?" ⁷ Yam cawo' Pi'lat yawng eun Yesu' meuh Eun peue ut' nang kuing' u'peung eun cawo' Herot' na', eun kah ce va Eun heul' ri cawo' Herot' eun. Yam awn' na, cawo' Herot' eun ku ut' nang veng Yeru'salaem na'.

⁸ Yam cawo' Herot' nyu eun Yesu' Eun na', eun ren'kawn nyawk'. Kopti sum' nyu eun Yesu' Eun na' a ling' hawc'. Seun' tawn mhawng' eun lawng Eun Yesu' na', eun kuit ri kaw pun ri nyu ku' hk'o'am' yeuh Eun ti ri ceu na'. ⁹ Eun saec' mhaing' Yesu' Eun ri ku' heun' ceu na', daecti Yesu' Eun un' top' a saec' ti moeng. ¹⁰ Ro' peue jhawp' rit keuting na' ce mae' peue guil leukah' ritroe na' ce cawng mawn', ce sae'caee' tang' map' ri Yesu' Eun hk'o' ri kaw yeum. ¹¹ Cawo' Herot' eun mae' peue suik' eun na' ce lah' Eun

meuh ku' pleh jaing keunyas un' nawpsang Eun. Ce tuil' Eun cuip' hk'eung ngam na'. Hawc' ko', eun tang kah ce va Eun heul' ri cawo' Pi'lat eun. ¹² Seunyi awn' na, cawo' Herot' eun mae' cawo' Pi'lat ka tang meuh a'mawo. Kopti nanggal' aen' na, meuh ka ransu ri puri na'.

Taws' a'mu yeum ri Yesu' Eun

¹³ Cawo' Pi'lat eun klawng ro' peue jhawp' rit keuting na' ce, ro'kan na' ce mae' peue heun' na' ce cu ri. ¹⁴ Eun lah' a ri ce, "Pe' va peue aen' Eun ing' ri ui' maen'. Pe' lah' Eun meuh nang va peue fuin kuing'. Ui' saec' hki' mhaing' Eun nanggal' pe' hawc' na', daecti ui' hkuin' nyu ku' kleuc' seun' ku' tang' pe' ri Heun na' saec' ti ceu. ¹⁵ Saec' meuh cawo' Herot' eun, kop un' nyu eun map' ri Heun na', eun tang ploé' Eun ing' ri ui' bae seun' nyu pe' a na'. Eun hkuin' yeuh ku' kaw hk'o' ri yeum saec' ti ceu. ¹⁶ Kop awn' na, kaw ui' ta'veut ri ploé' Eun."

¹⁷ Yam pawe vel nya na' ku pok ka, cawo' Pi'lat eun kah ri ploé' peue htawng' na' ce ti ri peue. ¹⁸ Ce klawng ri lah' a gawm'euc' ri ti meu, "Dap' ri tec peue awn' Eun. Ploé' Barabas' eun ri ye." ¹⁹ (Barabas' eun ko', pun eun ri ut' nang htawng' kopti meuh eun peue fuin ri nang veng awn' na. Eun ku toh peue yeut.)

²⁰ Kopti cawo' Pi'lat sum' ploé' eun Yesu' Eun na', eun tang hpawe ce bae.

²¹ Daecti ce ta'ul' ri lah', "Tawk' Eun yeum pang kleum' rawng'tawp' na' reu', tawk' Eun yeum pang kleum' rawng'tawp' na' reu'." ²² Cawo' Pi'lat eun lah' a ri ce loe' pok ti pok, "A ci' meuh kop keunhaw'? Eun ci' yeuh ku' kleuc' keunhaw'? Ui' hkuin' nyu yeuh Eun ku' kleuc' kaw hk'o' ri yeum saec' ti ceu. Kop awn' na, kaw ui' ta'veut ri ploé' Eun."

²³ Daecti ce gawm sae'caee' ta'ul' ri lah' tawk' Eun pang kleum' rawng'tawp' na'. Seng' ce na' a pe. ²⁴ Kop awn' na, punta cawo' Pi'lat kaw eun yeuh a seun' ku' lah' ce na', eun taws' a deut. ²⁵ Seun' hk'o' ce a na', eun plo'e' peue fuin kuing' toh peue ut' nang htawng' na' eun. Hawc' ko', seun' ku' sum' yeuh ce na', eun ap Yesu' Eun ri ce.

Tawk' Yesu' Eun pang kleum' rawng'tawp'

²⁶ Yam va ce Yesu' Eun pucti heul' na', ce yat ri tec' Si'mon peue veng Sai'rin' ing' neum yung' hk'a'nok veng na' eun klawm' kleum' rawng'tawp' na' hot' Yesu' Eun heul'. ²⁷ Peue cum heun' na' ce hot' Eun heul'. Beun' na' ce ta'ul' ri yam kop Heun ri. ²⁸ Yesu' Eun hpawt' ri keue' ri lah' a ri beun' na' ce, "Kon' beun' veng Yeru' salaem na' pe', pawlaee yam pun Ui'. Yam pun tu' pe' na' mae'e' kon' hk'i pe' na' ce reu'. ²⁹ Kopti seunyi meuyam awn' kaw a rot, a meuh yam kaw pe' lah', 'Mun' keuting ri beun' tan' na' ce mae'e' keuteul un' duing nyhel' na' mae'e' pui kon' nyom un' duing pui ce na' reu'. ³⁰ Yam awn' na, ce kaw lah' a ri gong leuang' na' ce, 'Lhu' ghuim' ye reu'.

Ce kaw lah' a ri gong aet' na' ce, 'Ghuim' htum' ye reu'.*

³¹ Kopti ce lawn yeuhki' ri hku' seungal na', hku' hk'oh' na' a ci' na' yeuh sa'nhaw'?"

³² Ce ku va peue rai lal' peue kaw toh ri mae'e' Heun na' ka heul' yeut. ³³ Yam rot ce vang lah' peue muis Dohcing' na', ce tawk' Eun pang kleum' rawng'tawp' mae'e' peue con' lal' peue na' ka. Ce tawk' ku' ti peue na' eun hk'a' a'tawm' Eun na', ku' ti peue na' eun hk'a' a've' Eun na'. ³⁴ Yesu' Eun lah', "A'kuiing', plo'e' map' ce na' reu'. Kopti

* **23:30** 23:30 Haw'se 10:8

un' yawng ce ku' yeuh ri na'." Hawc' ko', ce cop puri gvah hk'eung Eun na'.

³⁵ Peue heun' na' ce cawng ri keue'. Ro'kan na' ce lah' ku' pleh jaing keunyas Eun. Ce lah', "Eun teum'kawm htut peue ri lawtpon pun. Eun lawn meuh Hkrit meuh peue Peucawo' leuk Eun ri ti ko', tae' Eun lak' teum'kawm htut ri lawtpon meun reu'."

³⁶ Saec' meuh peue suik' na' ce ku ing' pleh jaing keunyas Eun. Ce ing' tuil' leuum' pli' bui na na' ri Heun.

³⁷ Ce lah', "Mi lawn meuh hkun'haw'hkam' ce peue Yu'da ko', teum'kawm htut tu' Mi na' lawtpon meun reu'."

³⁸ A tem' ri hk'a'pang cing' Eun na' yeuh keutit', "Hkaen' meuh Eun Hkun'haw'hkam' ce peue Yu'da na'."

³⁹ Peue con' tawk' ri pang kleum' rawng'tawp' na' eun lah' leukah' un' nawpsang ri Yesu' Eun, "Meuh mi Hkrit, un' meuh ka aw? Teum'kawm htut tu' mi na' maeé' ya ri lawtpon reu'."

⁴⁰ Daecti ku' ti peue na' eun tawk eun lah', "Un' lhat'til mi ri Peucawo' Eun aw? Kopti mi tup hkam' hk'a' taws' a'mu seun' Heun ri. ⁴¹ Seun' pun a' ri hkam' a yeuhki' na' cawp' ka yeut. Kopti kuing' a maeé' ku' yeuh a' na', a' pun ri hkam' a. Daecti peue aen' Eun un' yeuh ku' kleuc' saec' peunae'."

⁴² Hawc' ko', eun lah', "Yesu', yam ing' lec Mi nang kuing' ri na', hk'o' Mi kuit rot ri ui' yeut."

⁴³ Yesu' Eun top' a, "Kaw Ui' lah' a ri mi neum. Seun-yaen', kaw mi pun ri ut' maeé' Ui' tiduih' vang ren'kawn kuit sam'ran muis Paradi'su[†] na'."

Yesu' yeum Eun

⁴⁴ Yam awn' na, a meuh hk'ao ri peunnyi keuting na'. Bhen' keute' na' a duim'lawng euc' rot hk'a'pul loe' nali

† 23:43 23:43 Tuh' ri tuil' 2:7

na', ⁴⁵ kopti seunyi na' a yut' ceng' ri na'. Hpen' kang' nang nya hk'o' mun' keuting na' a res meuh la' glawk'. ⁴⁶ Yesu' Eun klawng ri lah' seng' laws', "A'kuiing', kaw Ui' ap civit ri na' nang ti' Mi." Hawc' lah' Eun a yeuh keutit' na', Eun hpum' deut.

⁴⁷ Yam po' suik' na' pun eun ri nyu yeuh a keutit' na', eun suk'seun' Peucawo' Eun. Eun lah', "Peue aen' meuh Eun taeng peue leupaws seumeu' neumneum." ⁴⁸ Yam peue kaw meuh sa'hki' cu ri ing' na' pun ce ri nyu yeuh a keutit' na', ce kuit nyhap' dah nuk' ri ing'. ⁴⁹ Daecti peue yawng Yesu' Eun na' ce mae' beun' hot' Eun tang' neum kuing' Galilae' na' ce cawng ri seucon' Eun vang ca ri seungai na'.

Puing' Yesu' Eun

⁵⁰ A kue' peue muis Yo'saep ti peue. Eun meuh peue ut' nang muk ce peue taws' kan' na'. Eun meuh peue chak' peue leupaws seumeu'. ⁵¹ Eun un' sahpaw' kan' taws' ce deut na' mae' ku' yeuh ce na'. Eun ing' neum veng Ari'mahtia kuing' Yu'da. Eun meuh peue keutui' hpum' ko' kuing' Eun Peucawo'. ⁵² Eun heul' hk'o' ri ti tu' Eun Yesu' na' ri cawo' Pi'lat eun. ⁵³ Hawc' ko', eun ti tu' Eun Yesu' na' lih. Eun bawl' tu' Eun na' ri hpen' linin, seue' Eun nang leuang' jhec' ri meuh keutui' leumuic na'. Keutui' leumuic awn' a hkuin' nang duing seue' peue yeum saec' ti peue. ⁵⁴ Seunyi awn' a meuh seunyi rangraen pawe. A kaw hkaws' rot seunyi Sin' na'.

⁵⁵ Beun' hot' Yesu' Eun tang' neum kuing' Galilae' na' ce ku hot' Yo'saep eun ing' nyu keutui' leumuic na' yeut. Ce ci' uin' tu' Eun Yesu' na' yeuh sa'nhaw' na', ce ku pun ri nyu a. ⁵⁶ Hawc' awn' na, ce ing' rangraen bai' hom' mae' lamawn hom' na'. Daecti ce keului' ri nang seunyi Sin' na' tam' ritroe ri.

24

Yesu' tang kuh' im' Eun

¹ Peunggup cawo ka seunyi nanggal' ka vung na', beun' na' ce pin' bai' hom' rangraen ri na' heul' nang keutui' leumuic na'. ² Ce pun ri nyu meul' seumu dho' ka keutui' leumuic na' cut' a ri tec ri hawc'. ³ Daecti yam ing' lec ce hk'a'naee ka na', ce un' laee nyu tu' Eun Yesu' na'. ⁴ Yam buih kuit nyhap' kvang'mawo ce ri lawng aen' a na', a keulawn' kue' peue lal' peue ka cuip' hk'eung seungung seun' cak'cal' pucti cawng mae' ce. ⁵ Beun' na' ce lhat', ce nghup' ti pang keute' na'. Daecti peue lal' peue na' ka lah' a ri ce, "A ci' meuh kop keunhaw', pe' vae' heul' sok peue im' ri vang ut' peue yeum?" ⁶ Hpaw Eun ca' laee ut' maen', kuh' im' Eun hawc'. Kuit rot ri leukah' lah' Eun ri pe' yam kawn' ut' Eun mae' pe' nang kuing' Galilae' na' reu'. ⁷ Lah' Eun, 'Kon' ai' peue na' kaw Eun pun ri hkam' hk'a' ap ri nang dak ti' ce peue map' na', hkam' tawk' peue ri pang kleum' rawng'tawp' na'. Na' a rot loe' seunyi ko', Eun na' tang kuh' im'." ⁸ Yam awn' na, ce tang kuit rot ri ku' lah' Eun Yesu' na'.

⁹ Hawc' ing' ce neum keutui' leumuic na', ce ing' ris tapae' kul'ti peue na' ce mae' peue seubu na' ce mhawng' lawng awn' na. ¹⁰ Beun' ing' ris peue caee na' ce mhawng' lawng awn' a na' a meuh Mari' ku' meuh peue veng Magadala', Yo'hanna', Mari' ku' meuh ma Yakop' mae' beun' seubu na' ce. ¹¹ Daecti ce un' yum' ku' lah' ce beun' na', kopti seun' a ku' kaw un' duing meuh ko'. ¹² Daecti Petru' eun yuk ri kuh' hk'uih heul' ri keutui' leumuic na'. Eun gaw' ri nom' a. Eun nyu hpen' linin na' uin' a ri koe. Eun ing' kuit ri am' ri lawng ku' meuh na'.

Lang' hk'a' yung' E'ma'us'

¹³ Hk'a'naee seunyi awn' na, tapae' la' peue na' ka buih hot' hk'a' heul' nang yung' E'ma'us' na'. Yung' E'ma'us' na' a seungai veng Yeru'salaem na' a' res lak'. ¹⁴ Ka u puri lawng ku' meuh na' ce gawm'euc' ka. ¹⁵ Yam buih u ka puri lawng awn' a na', Yesu' Eun ku ing' long hk'a' heul' meu ka. ¹⁶ Daecti Eun yeuh ka un' pawn ri.

¹⁷ Yesu' Eun mhaing' ka, "Yam long pa' hk'a' heul' na', pa' ci' u puri lawng keunhaw'?"

Ka cawng ri mhong' mhil'. ¹⁸ Ku' muis Hkleo'pas' na' eun mhaing' Eun, "Chec' ing' nang veng Yeru'salaem un' yawng lawng ku' meuh nang veng a' loe' seunyi na' meuh a Mi ri ti peue koe aw'?"

¹⁹ Yesu' Eun tang mhaing' ka, "A ci' meuh lawng keunhaw'?"

Ka top' a, "Meuh a lawng Eun Yesu' peue veng Nasaraet' na'. Eun meuh peue suip leukah' Eun Peucawo'. Eun kue' ti'ca keuting hk'a'naee ku' lah' ku' yeuh Eun nanggal' Eun Peucawo' na' mae' nanggal' peue gawm'euc'. ²⁰ Ro' peue jhawp' rit keuting na' ce mae' ro'kan ye na' ce taws' a' mu yeum ri Heun. Ce tawk' Eun pang kleum' rawng'tawp' na'. ²¹ Daecti ye ku tawn keutui' hpum' meuh Eun Cawo' kaw teum'kawm htut peue I'sarela' na' ce lawtpon. Tang' neum lawng aen' meuh ka na', pun ka loe' seunyi seunyaen' hawc'. ²² Lheu' awn' na, beun' ut' nang muk ye na' ce ngon' ce ku yeuh ku' hk'o'am' ri ye. Peunngup cawo awm, ce heul' nang keutui' leumuic na' ²³ daecti ce un' laee nyu tu' Eun na'. Ce ing' lah' nyu ri het' in'hpom la' peue ka lah' Eun kawn' im' yeut. ²⁴ Peue ye na' ce ngon' heul' ce nang keutui' leumuic na', ce ku pun ri nyu seun' a ku' lah' ce beun' na', daecti ce un' laee nyu Eun."

²⁵ Yesu' Eun lah' a ri ka, "Peue nga' aen' pa', saec' hpum' pa' na' a ku yak yum' leukah' lah' ce peue suip leukah' Eun Peucawo' na' gawm'euc' ka. ²⁶ Hkrit kaw Eun

pun ri tukhka yeuhki', hawc' ko', Eun na' pun ri lec nang munhpung' ri, un' meuh ka aw?" ²⁷ Hawc' ko', Eun lah' ka mhawng' vangdoh' ka htawm Seunga' vang lah' a lawng Eun na' tang' neum Mo'se eun mae' peue suip leukah' Eun Peucawo' ku' seubu na' ce gawm'euc' ka.

²⁸ Yam kaw ka hk'aws' rot ti yung' vang kaw ri heul' na', Yesu' Eun rang ri kaw heul' nanggal'. ²⁹ Daecti ka sae'caee' hk'o' lah' a ri Heun, "Puing ing' ut' mae' ya, seunyi na' kaw a hk'aws' lec, a kaw fec' hawc'." Kop awn' na, Eun ku ing' keului' ri mae' ka.

³⁰ Yam mok' Eun ri som' mae' ka na', Eun ti hkawomun' na' Eun mun' keuting ri Peucawo' Eun. Hawc' ko', Eun ves ri tuil' hkawomun' na' ri ka. ³¹ Yam awn' na, ngai' ka na' a ceng', ka pawn meuh a Yesu' Eun. Yesu' Eun keulawn' rai' nanggal' ka na'. ³² Ka lah' a ri puri, "Yam leukah' Eun mae' a' hot' hk'a' heul' na' mae' yam lah' Eun a' mhawng' vangdoh' ka leukah' htawm Seunga' na', a yeuh a' hpum' huk' nyawk', un' meuh ka aw?"

³³ Ka keulawn' yuk ri ing' nang veng Yeru'salaem na'. Ka ing' pun ri nyu tapae' kul'ti peue na' ce mae' peue heun' na' hk'om ce puri. ³⁴ Ce buih lah' a ri puri, "Meuh a neum, Yesu' tang kuh' im' Eun hawc'. Tuil' Eun Si'mon eun nyu tu' ri na'." ³⁵ Hawc' ko', ka ku ris ce mhawng' lawng ku' hk'eup' ka lang' hk'a' na' mae' pawn ka meuh a Yesu' Eun yam ves Eun hkawomun' na'.

Yesu' tuil' Eun tapae' na' ce nyu tu' ri

³⁶ Yam buih lah' ce a ri puri yeuh keutit' na', Yesu' Eun ku cawng nang ngon' ce na'. Eun lah', "Kah hk'a' kuit nyawk' kuit sam'ran cumyen' na' kue' ri pe' reu'."

³⁷ Ce lhat' ruing, ce hteum' ri nyu seuca'. ³⁸ Eun lah' a ri ce, "A ci' meuh kop keunhaw', pe' vae' hpum' suksak? A ci' yeuh keunhaw', pe' vae' hpum' kangkae? ³⁹ Keue' ri

ti' cung Ui' na' reu', meuh ka Ui' ri neum. Hpuil'hp'al paic' ri nawk Ui' reu'. Seuca' na' hpaw a ca' kue' keune seuang' seun' nyu pe' Ui' ri kue' Ui' na'."

⁴⁰ Hawc' lah' Eun a yeuh keutit' na', Eun tuil' ce nawk ti' cung ri na'. ⁴¹ Yam un' nang yum' ce meulamlam ri na', kopti ce ku ren' ce ku am' na'. Eun mhaing' ce, "Kue' pe' ku' hk'a ti ri ceu aw?" ⁴² Ce ku tuil' ka' ngat' na' ri Heun ti glawk'. ⁴³ Hawc' ko', Eun ti ri hk'a a nanggal' ce na'.

⁴⁴ Eun lah' a ri ce, "Aen' meuh a ku' lah' Ui' ri pe' yam kaw'n ut' Ui' mae' pe' na'. Ku' tem' ri lah' lawng Ui' nang htawm ritroe eun Mo'se na', nang htawm ce peue suip leukah' Eun Peucawo' na' mae' nang htawm Suk'seun' na' kaw a kah ri htonnuk."

⁴⁵ Hawc' awn' na, punta kaw ce yawng vangdoh' ka htawm Seunga' na', Eun tuh' hpum' ce na'. ⁴⁶ Eun lah' a ri ce, "Nang htawm Seunga' na' tem' a ri yeuhki', 'Hkrit kaw Eun pun ri hkam' ri tukhka. Na' a rot loe' seunyi ko', Eun na' tang kuh' im'. ⁴⁷ Tang' neum veng Yeru'salaem na', lawng taws' hpum' fuin map' na' mae' lawng plo'e' map' na' kah ri sangsawn' a hk'a'ruim muis Eun ri peue ceu gawm'euc'. ⁴⁸ Meuh pe' sa' hki' ka lawng aen' ce. ⁴⁹ Kaw Ui' bu' ku' Kuiing' Ui' yeuh Eun kati ri na' ri pe'. Rot ti na' pe' pun ti'ca neum pang lhung' na', pe' na' ko' nang veng aen' na reu'."

Yesu' huk' Eun kuing' pang mao'

⁵⁰ Hawc' va Eun ce heul' rot keunam yung' Betani' na', Eun yuk ti' ri nap mun' ri ce. ⁵¹ Yam buih nap Eun mun' ri ce na', Eun gah' hk'ai' ce. Eun pun ri rap ri ti yuk ri huk' kuing' pang mao' na'. ⁵² Ce suk'seun' fae' Eun. Hawc' ko', ce ren'kaw'n keuting nyawk' tang ing' nang veng Yeru'salaem na'. ⁵³ Ce ut' nang nya hk'o' mun' keuting na' laleung, ce suk'seun' Peucawo' Eun.

Plang
The New Testament in the Blang language of Myanmar

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

PDF generated using Haiola and XeLaTeX on 19 Oct 2021 from source files dated 14 Jul
2021

0468b0b5-acb2-59c4-92d3-4fa09a4d091c